

Le Décaméron de Jean
Bocace, traduit d'italien en
françois par maistre Antoine
Le Maçon, avec notice, notes
et [...]

Boccace (1313-1375). Le Décaméron de Jean Bocace, traduit d'italien en françois par maistre Antoine Le Maçon, avec notice, notes et glossaire par Frédéric Dillaye. 1882.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus est libre et gratuite dans le respect de la législation en vigueur et notamment du maintien de la mention de source.
- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :


- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.
- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.


4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.


5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.


6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.


7/ Pour obtenir un document de Gallica en haute définition, contacter utilisationcommerciale@bnf.fr.











Conservé en bibliothèque
179

Le Décaméron DE IEAN BOCACE

TRADUICT D'ITALIEN EN FRANÇOYS

Par maistre

ANTOINE LE MAÇON

Avec Notice, Notes et Glossaire

PAR

FRÉDÉRIC DILLAYE

TOME TROISIÈME



PARIS
ALPHONSE LEMERRE, ÉDITEUR
27-31, PASSAGE CHOISEUL, 27-31

M D CCC LXXXIII

Le Décaméron

DE

JEAN BOCCACE

8°Y²

5698

Le Décaméron

ou

JEAN BOCCACE

Le Décaméron DE IEAN BOCACE

TRADUICT D'ITALIEN EN FRANÇOYS

Par maistre

ANTOINE LE MAÇON

Avec Notice, Notes et Glossaire

PAR

FRÉDÉRIC DILLAYE

TOME TROISIÈME



PARIS
ALPHONSE LEMERRE, ÉDITEUR
27-31, PASSAGE CHOISEUL, 27-31

M D CCC LXXXII



Le Dictionnaire

DE JEAN BOCCACCIO

TRADUIT DE L'ITALIEN EN FRANÇOIS

Par

ANTOINE DE MONTAIGNE

Avec des Notes de l'Editeur

FREDERIC BOCCACCIO

ALPHONSE BOCCACCIO EDITEUR

7, rue de la Harpe, 7, Paris



NOUVELLE SIXIESME.

*Denotant les accidens de fortune, & les puissances
d'amour auffi.*

*Vne ieune fille nommee Andree aymant vn ieune
homme nommé Gabriel, luy raconta vn songe
qu'elle auoit fait, & luy vn autre à elle,
& mourant soudainement Gabriel entre ses
bras, elle & ja chambriere furent prises ainsi
qu'elles le portoient deuant sa maison par les
ministres de la seigneurie, où elle dist comme
le faict estoit allé, & voulant le Potestat la
prendre à force, elle ne le voulut souffrir, dont
son pere qui en ouyt les nouuelles, monstra son
innocence, & la fit deliurer. Et elle refusant
apres cela de plus viure au monde, se rendit
religieuse.*



A nouuelle que madame Philomene
venoit de conter, fut trefaggreable
aux Dames : par ce qu'elle auoit
ouy chanter plusieurs fois la chan-
son, sans auoir iamais peu sçauoir

pour demande qu'elles en fissent, à quelle occasion elle auoit esté faicte. Mais quand le Roy eut ouy la fin d'icelle, il commanda à Pamphile que il fuyuist son ordre. Alors Pamphile dist : Le songe qui a esté raconté en la precedente nouuelle, me donne matiere pour en conter vne en laquelle est faicte mention de deux songes. Lesquelz deuinerent aussi bien ce qui estoit à aduenir, comme en l'autre ce qui estoit aduenu, & à peine furent ilz acheuez de dire, de ceux qui les auoient songez, que les effectz de tous deux s'en enfuyurent. Or vous deuez sçauoir (gracieuses Dames) que c'est vne generale passion à chacun qui vit, de voir plusieurs & diuerses choses en dormant, lesquelles combien qu'elles semblent à celuy qui dort, toutes tres-veritables, & que quand il est esueillé, il iuge les aucunes vrayes, les autres vray-semblables, & partie d'icelles hors de toute verité, neantmoins il s'en trouue plusieurs qui sont aduenues, qui est la cause que beaucoup de personnes adioustent autant de foy à chacun songe qu'ilz font comme ilz feroient à la chose qu'ilz verroient en veillant tellement que par leurs songes, ilz se contristent ou resiouissent, selon que par iceux ilz craignent ou esperent, & au contraire il en y a qui n'en croient pas vn, sinon apres que ilz se voyent cheuz au danger et peril qui leur auoit esté premonstré. Dont ie ne loue ne les vns ne les autres : parce qu'ilz ne sont tousiours veritables,

ne pareillement tousiours menfongiers. Et qu'ilz ne soient tous veritables, chacun de nous le peut auoir congneu bien fouuent. Auffi qu'ilz ne soient tous menfongiers, il s'est defia congneu cy deffus en la nouuelle de madame Philomene : & encor le vous veux ie monftrer en la mienne, comme ie vous ay dict cy deuant. Parquoy ie fuis d'opinion qu'ès chofes de bien viure, & bien faire, on ne doit craindre aucun fonge qui y foit contraire, ne pour cela delaiſſer les bonnes œuures & bonnes delibera-tions. Et chofes auſſi peruerſes & mauuaiſes, encores que les fonges ſemblent fauorables à icelles, & qu'ils confortent par leur proſpère viſion ceux qui les fongent, ſi n'en doit on pourtant croire pas vn : auſſi es chofes con-traires, aiouſter à tous entiere foy. Mais venons à la nouuelle.

Il y eut iadis en la cité de Brefſe vn gentil-homme nommé meſſire Negro de Ponte Cararo : lequel entre pluſieurs ſes enfans auoit vne fille nommee Andree ieune & fort belle qui encor n'eſtoit mariee. Laquelle par fortune deuint amoureuſe d'un ſien voſin qui ſe nommoit Gabriel, homme de baſſe condition : mais au demourant plein de louables complexions, & ſi eſtoit beau & gracieux perſonnage. Si fit ſi bien ceſte ieune fille par le moyen & ayde de la chambriere de la maiſon, que Gabriel non ſeulement ſceut qu'il eſtoit aymé d'Andree : ains outre ce fut mené par pluſieurs fois en vn

iardin du pere d'elle prendre plaisir l'un de l'autre, & afin qu'aucune occasion (sinon la mort) ne peut iamais separer ceste leur delectable amitié, ils se marierent secrettement par parolles de present, & continuans ainsi à la desrobée leur iouissance, il auint que la ieune fille songea vne nuit quelle estoit en son iardin avec Gabriel, & qu'elle le tenoit entre ses bras avec tresgrand plaisir de tous deux : & que ce pendant qu'ils estoient ainsi, luy sembloit qu'elle voyoit sortir de son corps vne chose obscure & terrible : la forme de laquelle elle ne pouuoit cognoistre, luy estant pareillement aduis, que ceste chose noire prenoit Gabriel & que malgré elle le luy arrachoit d'une merueilleuse force d'entre les bras : puis se mussoit avecques luy en terre, & iamais plus ne pouuoit veoir ne l'un ne l'autre, dont elle souffroit fort grande & inestimable douleur, qui la fait esueiller. Et quand elle fut esueillée, combien qu'elle fut ioyeuse de veoir qu'il n'estoit rien de ce qu'elle auoit songé, il luy entra neantmoins en l'entendement vne grande paour de ce songe. Au moyen dequoy, voulant Gabriel la venir veoir la nuit ensuyuant elle s'effaya le plus qu'il luy fut possible de faire tant qu'il n'y vint point. Et toutesfois voyant son affection, & aussi de peur qu'il eust soupçon de quelque autre chose, elle le receut en son iardin, où ayant cueilli plusieurs roses blanches & vermeilles (pource qu'il en estoit la saison)

elle s'en alla asseoir avec luy au pied d'une tresbelle & claire fontaine qui estoit au iardin. Et là apres qu'ils eurent longuement fait grand chere ensemble, Gabriel luy demanda pour quelle occasion elle luy auoit deffendu le iour precedent qu'il ne vint point. La ieune fille le luy dist, en luy faisant le conte du songe qu'elle auoit songé la nuit precedente, & le soupçon qu'elle en auoit prins. Gabriel oyant cecy, se mit à rire & luy dist que c'estoit une grande sottise d'ajouter aucune chose aux songes : pource qu'ilz auiennent le plus souuent, ou de trop ou de peu manger : & voyt l'on à toute heure, qu'ilz sont tous mensongiers : & apres luy dist : Si i'eusse voulu croire aux songes : ie ne fusse venu icy, non pas tant pour le tien, comme pour vn que i'ay fait pareillement ceste nuit passée : lequel fut, qu'il me sembloit que i'estoye en une belle & delectable forest, où i'alloye chassant : & auoye une biche, la plus belle & la plus plaifante beste que ie vey iamais : me semblant qu'elle estoit plus blanche que neige : & qu'en peu de temps elle deuint si priuee de moy qu'elle ne m'abandonnoit point : toutesfois il me fut auis que ie l'aymoye tant que de paour qu'elle s'en allast d'avec moy, ie luy auoye mis vn collier d'or au col, attaché à une chaine d'or, que ie tenoye en la main, & apres cecy que se reposant une fois ceste biche, & tenant la teste sur mon giron, il fortit ie ne scay d'où, une lionnesse

noire comme charbon, affamee & fort espouventable à voir qui s'en vint vers moy : à laquelle me sembloit que ie ne faisoie aucune resistance : ains m'estoit auis qu'elle me mettoit le museau dedans le foin du costé gauche, & qu'elle le rongeoit si fort qu'elle paruenoit iusques au cœur : lequel me sembloit qu'elle m'arrachoit par force pour l'emporter : dont ie sentoie telle anguoiſſe, que mon songe se rompit : & aussi tost que ie fus esueillé ie courus mettre la main à mon costé, s'il y auoit rien : mais n'y trouuant aucun mal, ie me moquay de moy mesmes de ce que i'y auoye cherché. Que penſes tu donques que celuy vueille dire ? certes i'en ay long temps a songé de semblables & de plus espouventables : toutesfois il ne m'en est iamais auenu, pour cela ne plus ne moins : & par-ainſi laiſſe les courir, & penſons ſeulement à faire grand chere. La ieune fille qui estoit aſſez espouventee de ſon ſonge, le deuint encores dauantage quand elle ouit ceſtui-cy : mais pour ne donner occaſion d'aucune marrifſon à Gabriel, elle diſſimula ſa peur tant qu'il luy fut poſſible. Et combien qu'elle paſſaſt le temps avec luy le baiſant & embrallaſſant & pareillement eſtant embrasſee & baiſee de luy, elle ſouſpçonnant & ne ſachant quoy, le regardoit au viſage plus ſouuent qu'elle n'auoit accouſtumé : & pareillement ſi par le iardin elle voyoit point venir de quelque lieu aucune choſe noire. Et eſtant en ce pen-

cement, il auint que Gabriel, iettant vn grand fouspir l'embrassa : & luy dist : Helas m'amie ayde moy : car ie me meurs. Et cecy dict, tumba en terre sur l'herbe du preau. Ce que voyant la ieune fille & l'ayant tiré sur son giron, luy dist en plourant : Las mon doux amy qu'est ce que tu sens ? Gabriel ne respondit rien : mais estant ainsi en vne grande fueur, sans pouuoir auoir son aleine : rendit l'esprit bien peu de temps apres. Combien cecy fut grief & ennuyeux à la ieune fille, qui plus l'aymoit que soy mesmes, chacun le peut penser. Elle le ploura beaucoup & l'apella plusieurs fois en vain : mais s'aperceuant finablement qu'il estoit mort du tout l'ayant tasté par tous les endroitz de sa personne, & le trouuant froid par tout (dont elle ne fauoit que faire ne que dire) s'en alla ainsi esploree comme elle estoit & pleine d'angoisse, appeller sa chambriere qui fauoit toute ceste amitié, & luy fit entendre l'occasion de sa douleur & misere. Et apres que toutes deux ensemble, eurent pleuré amèrement quelque espace de temps sur la face morte de Gabriel, la fille dist à la chambriere. Puis que nostre Seigneur m'a osté cestui cy, ie n'ay plus deliberé de demourer en vie, mais premier que ie vienne à me tuer ie voudrois bien que nous prinssions quelque conuenable moyen pour garder mon honneur, & l'amitié secrete qui a esté entre nous deux : & que le corps, duquel la gracieuse ame s'est separee

fust enterré. A qui la chambriere dist. Ne parle point ma fille de te vouloir tuer : pource que si tu l'as perdu icy, tu le perdroyς pareillement en l'autre monde, si tu te tuois : car tu t'en irois en enfert, où ie suis certaine que son ame n'est point allee : d'autant qu'il estoit trop honnestes ieune homme : mais il est beaucoup meilleur que tu te reconfortes, & penſes d'ayder à son ame, avec oraisons, ou quelque autre bien : si par fortune il en auoit beſoing, pour aucun peché qu'il eust commis. Quant est de l'enterrer, le moyen est tout préparé icy dedans ce iardin : ce que personne ne ſaura iamais : parce que nul ne fait qu'il y ſoit onques venu : & si tu ne veux qu'ainſi ſoit, mettons le icy hors du iardin, & le laissons là où il ſera trouué demain matin, & emporté en ſa maiſon : puis ſes parens le feront bien enterrer. La ieune fille, combien qu'elle fuſt pleine de tres-grande douleur & pleuraſt continuellement, ſi eſcouteoit elle pourtant le conſeil de la chambriere : & ne luy ſemblant la premiere opinion bonne, reſpondit à la ſeconde en diſant : la à Dieu ne plaſe, que ie ſouffre qu'un amy ſi cher comme ceſtui-cy, qui a eſté tant aimé de moy (& qui plus eſt mon mary) ſoit enterré comme un chien : ou ietté en la rue ſur le paué : il a eu mes larmes, & ſi ie puis il aura celles de ſes parens, & deſia m'eſt tombé ſur le cœur, ce que nous auons affaire en cecy. Parquoy elle enuoya querir ſoudainement par


la chambriere, vne piece de drap de foye qu'elle auoit en vn sien coffre : & quand elle l'eut apportee elles l'estendirent en terre, & mirent sur icelle le corps de Gabriel : puis luy ayans mis la teste sur vn oreiller, & avec plusieurs larmes clos les yeux & la bouche, & fait vn chapeau de roses, le couurant presque tout de celle qu'elles deux cueillirent, la fille dist à la chambriere : Il n'y a gueres loin dicy à la porte de sa maison, où toy & moy le porterons ayfément ainsi accoustré comme il est : & le mettrons deuant icelle, puis il ne tardera gueres apres qu'il ne soit iour : & lors il fera recueilly : & combien que cecy ne soit aucune consolation à ses parens, toutesfois se fera à moy (entre les bras de qui il est mort) grand plaisir. Et cecy dit, elle se ietta de rechef avec tresabondantes larmes, sur sa face, plorant longuement sur icelle. Puis estant fort sollicitée de sa chambriere, par ce que le iour s'aprochoit elle se dressa & tira de son doigt le mesme anneau, avec lequel Gabriel l'auoit espousée par parolles de present, & le mit en celuy de son amy en disant. Mon cher Seigneur, si ton ame voit maintenant mes larmes, ou que quelque cognoissance ou sentiment reste és corps apres qu'elle en est partie, reçois benignement le dernier present de celle là que tu as aymée si chèrement. Et cecy dit, retomba toute esuanouie sur son corps. Mais apres qu'elle fut reuenue, elle se leua, & prenant

avec la chambriere le drap sur quoy le corps estoit estendu, fortirent du iardin, & prindrent leur chemin vers la maison du mort. Où allans, aduint par fortune qu'elles furent rencontrees & prinſes avec le corps mort par les gens de la garde du Poteſtat, qui estoient à celle heure par pais pour quelque accident qui estoit suruenue. La ieune fille desirant plus la mort que la vie, ayant cogneu les gens du Guet, leur dist franchement, Je cognoy qui vous estes : & ſay bien qu'il ne me ſeruiroit rien de fuyr, ie ſuis toute preſte de m'en aller avec vous & deuant la Seigneurie, & luy conter la verité du fait. Mais que nul de vous ſoit ſi hardy de me toucher, puis que ie vous ſuis ainſi obeiffante, ne pareillement d'oſter rien de choſe qui ſoit ſur ce corps, ſi vous ne voulez que ie vous en accuſe. Au moyen dequoy ſans que perſonne luy touchaſt elle ſ'en alla à tout le corps mort deuers ſa ſeigneurie. Ce que ayant entendu le Poteſtat il ſe leua & informa d'elle (qui auoit eſté menee en ſa chambre) de qui estoit interuenue : puis fit regarder par certains Medecins ſi le ieune homme auoit point eſté empoisonné, ou autrement tué. Mais tous affermerent que non, ains que quelque apoſtume qu'il deuoit auoir pres du cœur ſ'eſtoit creuee qui l'auoit eſtouffé. Le Poteſtaſt oyant cecy, & cognoiſſant que la fille n'eſtoit point ou bien peu coupable, ſe parforça de monſtrer & luy faire entendre qu'il luy vouloit donner ce qu'il ne

uy pouuoit vendre, & dist que si elle luy vouloit faire vn bon tour, il la deliureroit, mais voyant que ses parolles ne seruoient de rien, il voulut contre toute raison vser de force, toutesfois la fille enflambee de desdain & luy augmentant la force, se deffendit virillement, le repouffant avec 'parolles iniurieuses & hautes, puis quand le iour fut venu estant ces choses racontees au pere d'elle, il s'en alla dolent iusques au mourir, avec plusieurs de ses amis au palais. Où estant arriué & informé de tout le faict par le Potestat, il demanda que sa fille luy fut renduë. Le Potestat se voulant plustost accuser de la force qui luy auoit voulu faire, que d'attendre qu'elle mesmes l'accusast, louant premierement la ieune fille & sa constance, vint à dire (pour icelle approuuer) ce qu'il auois fait : parquoy la voyant de si grande & bonne fermeté, il auoit mis si fort son amour en elle que là où il plairoit à Messire Noir (qu'estoit son pere) & à elle, encores que son premier mary eust esté de basse condition, qu'il la prendroit volontiers pour sa femme. Ce pendant que ceux-cy parloient ainsi, Andree vint en la presence de son pere & en plorant se ietta à ses piedz, & luy dist : Je croy mon pere qu'il n'est point besoin que ie vous raconte l'histoire de ma hardiesse & de mon malheur : car vous l'auez ouy dire & le fauez, & par-ainsi ie vous demande pardon de ma faute le plus humblement qu'il m'est pos-

fible, c'est à fauoir d'auoir fans vostre sceu & congé, pris pour mary celuy que plus i'amoye, & le pardon que ie vous en demande, n'est pas à fin que la vie me soit pardonnée, mais pour mourir vostre fille & en vostre bonne grace, & cecy dit luy tomba sur les pieds. Messire Noir qui estoit desia vieil & homme naturellement bening & gracieux : oyant ces parolles commença à plorer : & en plorant leua sa fille tout doucetttement, luy disant : Ma fille i'eusse beaucoup mieux aimé que tu eusses eu tel mary comme il m'eust semblé t'estre conuenable & encores que tu en ayes pris vn comme il t'a pleu, ne pour cela m'en doit il desplaire : mais bien me plains-ie grandement que tu le m'aies celé, & du peu de fiance que tu as eu en moy-mesmes, voyant que tu las perdu premier que ie l'aie sceu, toutesfois puis que les choses sont telle ie vueil que tout ainsi que pour le contenter ie luy eusse fait autant d'honneur s'il viuoit, comme à mon gendre, que en semblable il luy soit maintenant fait à la mort, & se retourna deuers ses enfans & parens, ausquelz il commanda qu'on preparast grandes & honorables obseques à Gabriel. Durant toutes ces choses les parens & parentes du trespasé, qui en auoient esté aduertis, y arriuerent & pareillement presque tous les hommes & femmes qui estoient en la ville, parquoy le corps mis au milieu de la court, sur le drap d'Andree, avec toutes ses

roses, il ne fut seulement plouré d'elle & des parens de luy mais quasi publiquement de toutes les femmes de la ville, & aussi de plusieurs hommes. Et apres cela le mettant hors de la court ouuerte à vn chacun, fut porté en sepulture (non pas à la mode d'un Bourgeois seulement, mais d'un Seigneur) sur les espauls de plusieurs nobles citoyens avec tresgrand honneur & reuerence. De là à quelques iours apres pourfuyuant le Poteftat sa demande, & le pere en voulant parler à sa fille, elle n'y voulut entendre aucunement : dont desirant son pere luy complaire, il la rendit avec sa chambriere en vne Religion fort renommee de saincteté & deuotion : où elles vesquirent longs temps apres en grande honnesteté.





NOUVELLE SEPTIESME.

Qui fait entendre qu'amour & mort vsent également de leur force tant contre pauvres & roturiers que contre riches & nobles.

Simonne aimant Pasquin estant avecque luy en vn iardin : aduint que Pasquin se frotta les dents d'une feuille de fauge : dont il mourut : icelle Simonne fut prise de la Iustice, & se frotta pareillement d'une de ces feuilles de fauge les dents dont semblablement elle mourut.



AMPHILE auoit acheué sa nouvelle, quand le Roy, monstrant auoir eu aucune compassion d'Andree, regarda ma-dame Emilie, luy faisant signe qu'il luy pleust en disant la sienne de continuer apres les autres : laquelle sans faire aucune demeure, commença ainsi : Mes cheres compagnes, la nouvelle qu'a dite Pamphile me fait venir la volonté d'en

dire vne autre, qui reffemble la fienne en aucune chose, finon que tout ainsi comme Andree perdit son amy en vn iardin, aussi fit celle de qui ie vueil parler, laquelle estant apres pareillement prinse comme Andree fut, se deliura des mains de Iustice, non par force ne par sa vertu, mais avec mort inopinee. Et combien qu'amour (ainsi que nous auons autresfois dit) face volontiers son habitation és maisons des personnes nobles si ne refuse il pourtant l'empire sur celles des pauvres : Ains monstre en icelles mesmes quelquesfois ses forces tout ainsi comme (puissant Seigneur qu'il est) il se fait faire craindre des plus riches. Ce que ie vous feray cognoistre en tout ou en grand partie par ma nouuelle : avec laquelle ie vueil rentrer en nostre cité, de laquelle en parlant diuersement de plusieurs & diuerses choses & tournoyant par diuerses parties du monde, nous nous sommes tant esloignez.

Il n'y a pas encor long temps qu'il y eut à Florence vne ieune fille fort belle & gracieuse selon sa qualité : de qui le pere estoit pauvre, laquelle se nommoit Simonne : & combien qu'il luy conuint gagner sa vie au trauail de ses bras en filant de la layne, pour qui luy en vouloit bailler à filler, elle ne fut pourtant de si peu de cœur, qu'elle ne print la hardiesse de receuoir amour en son entendement : lequel auoit long temps fait semblant d'y vouloir

entrer par le moyen des actes & paroles gracieuses d'un ieune garçonneau, non point de plus grande estoffe qu'elle qui s'en alloit bailant de la layne à filler pour un faiseur de draps son maistre. L'ayant doncques receu en foy, par les regards gracieux du ieune garçon qui l'aymoit (lequel se nommoit Pasquin) elle fort desireuse, & ne taschant point de faire rien davantage, iettoit en fillant (à chacun tour de layne fillee qu'elle entortilloit à son fuseau) mille sospirs plus cuisans que feu : se souvenant de celuy qui la luy auoit baillé à filler, Pasquin de l'autre part deuenu fort soigneux & diligent à solliciter que la laisne de son maistre fust bien fillee, sollicitoit plus souuent celle que Simonne filloit que nulle autre : quasi comme si elle seule & non aucune autre deust fournir toute la piece. Parquoy sollicitant l'un & prenant l'autre plaisir d'estre sollicitée, il aduint que l'un prenant plus de hardiesse qu'il ne fouloit auoir, & l'autre chassant beaucoup de la peur & honte qu'elle fouloit auoir il firent si bien qu'ilz mirent leurs fuseaux ensemble. A quoy l'un & l'autre prindrent si grand plaisir que non seulement l'un n'attendoit à y estre inuité par l'autre : ains qui plus est pour s'y deuoir entre iniurier, alloient l'un au deuant de l'autre en s'inuitant : & en continuant ainsi leur plaisir d'un iour à autre, & s'embrasans tousiours plus en ceste continuation, Pasquin dist un iour à Simonne, qu'il

desiroit sur toute chose qu'elle trouuast moien de venir en vn iardin, où il la vouloit mener, afin qu'ilz peussent estre là ensemble, plus à leur aise & avec moins de soupçon, Simonne dist qu'elle en estoit contente : & ayant donné à entendre à son pere vn dimanche apres dîner, qu'elle vouloit aller gagner les pardons à saint Gal s'en alla avec vne sienne compagne, nommee Lagine au iardin que Pasquin luy auoit enseigné, où elle le trouua avec vn sien compagnon, qui se nommoit Puccin : toutesfois on l'appeloit le Strambe. Et là s'estant forgee vne autre nouvelle amitié, entre le Strambe & Lagine, Pasquin & Simonne se retirerent en vn endroit du iardin pour prendre leur plaisir, & laisserent Strambe & Lagine en vn autre. Or y auoit à l'endroit du iardin où Pasquin & Simonne estoient, vne belle & forte grande plante de fauge, au pied de laquelle s'estans assis, & ayans bonne piece passé le temps ensemble, & deuisé longuement d'un gouster qu'ilz deliberoient faire vne autrefois en ce iardin à leur beau loisir, Pasquin se retournant deuers la plante de fauge en cueillit vne feuille, & commença à se frotter les dents, & les genciues avec icelle, disant qu'il n'y auoit chose meilleure au monde pour mieux les nettoyer de toute ordure, apres le past. Et quand il les eut ainsi frotées quelque temps il retourna sur son propos du gouster dont il auoit parlé au parauant : mais il ne continua gueres


en deuifant que tout le vifage luy commença à changer, & apres ce changement, il perdit auffi toft la veuë & la parolle, & en brief mourut. Ce que voyant Simonne commença à pleurer & à crier & appella Strambe & Lagine, qui y coururent promptement. Et voyant Pasquin non feulement mort, mais defia tout enflé, & que le vifage & tout le corps eftoient pleins de taches noires, Strambe commença foudainement à crier : Ha mefchante garce tu l'as empoifonné. Et faifans ainfi grand bruit furent ouyz de plufieurs voifins, qui habitoient pres de ce iardin : lefquelz y eftant accouruz & trouuans cefui-cy mort & enflé, & oyans que Strambe s'en plaignoit & accufoit Simonne de l'auoir empoifonné & que elle quafi hors du fens pour douleur du foudain accident que luy auoit ofté, fon amy, ne fe fauoit excufer, il fut creu de tous qu'il eftoit ainfi comme Strambe le difoit. Au moyen dequoy cefte pauvre dolente fut prinfe, & menee toufiours pleurant tresfort, au palais du Poteftat : là où eftant accufée de Strambe & de deux autres, nommez l'un l'Attitiato, & l'autre le Malaifé, compagnons de Pasquin, qui y eftoient furuenuz, le iuge fans donner intermiffion à l'affaire, fe mit à l'examiner du cas : & ne pouuant aucunement comprendre qu'elle euft vfé en cefte chofe d'aucune malice, ne que elle en fust coupable : il voulut veoir en la prefence d'elle le corps mort & le lieu où il eftoit trespaffé : & qu'elle luy racon-

taft la maniere comment il eftoit mort : par ce qu'il ne pouuoit par fes parolles le comprendre affez bien. L'ayant doncques fans grand bruit fait mener là où le corps de Pasquin gifoit encores enflé, comme vn crapaut, & l'ayant fuiue apres, luy s'esmerueillant du mort, luy demanda comment cela auoit esté fait. Ceste-cy s'estant aprochee de la plante de fauge, & luy ayant raconté toute l'hiftoire predecante, d'un bout à l'autre, pour mieux luy donner à entendre le cas aduenü, fit ne plus ne moins comme auoit fait Pasquin & se frotta les dents d'une des feuilles d'icelle fauge. Regardant les quelles chofes, Strambe & les autres amys & compagnons de Pasquin, comme par moquerie en la prefence du Iuge, & comme vaines & frivoles, ilz accufoient avec plus grand instance fa mefchanceté, & ne demandoient autre chofe finon que le feu en fift la punition dont la pauvette qui du dueil d'auoir perdu fon amy, & auffi de la peine requife par Strambe, demouroit fans fonner mot, tomba pour s'estre frotté les dents de celle fauge, en ce mefme accident où premierement eftoit tombé Pasquin : qui ne fut fans grand esbahiffement de tous ceux qui eftoient prefens. O heureufes ames, aufquelles il aduint tant d'heur que de mettre fin tout en vn iour, à leur feruente amour, & à ceste vie mortelle : & plus heureufes, fi vous vous en eftes alees enfemble en vn mefme lieu : & encor tresheureufes, fi l'on s'aime en l'autre

vie, & que vous vous aymez comme vous vous aimastes par deçà. Mais trop plus heureuse est l'ame de Simonne au iugement de nous autres viuants, que nous qui sommes demourez en vie apres elle, l'innocence de laquelle la fortune ne voulut pas laisser cheoir fouz le tefmoignage de Strambe, de l'Atticiato, & de Malaisé, qui paraduenture estoient Cardeurs de layne, ou peut estre plus vile condition : ains luy trouua plus honnestes voyes pour se desueloper de l'infamie d'eux, & pour suyure l'ame de son amy, tant aymé d'elle, la faisant mourir d'une semblable mort à celle de Pasquin. Le Iuge quasi tout estonné & pareillement tous ceux qui y estoient, de l'accident adueni, ne sachant que dire, demoura longuement sans parler. Et apres qu'il fut reueni en meilleur sens, dist : Cest inconuenient demonstre assez que ceste fauge est venimeuse : ce que toutesfois on n'a accoustumé de veoir auenir de fauge : mais à celle fin qu'elle ne puisse plus offencer personne en ceste maniere, il faut qu'elle soit couppee iusques aux racines, & ietee dedans le feu. Ce que faisant celuy qui estoit gardien du iardin en la presence du iuge, il n'eut iamais si tost abbattu ceste grande plante de fauge enterree, que l'occasion de la mort des deux miserables amants apparut : car on trouua deffouz la plante de ce faugier vn crapaut d'une merueilleuse grandeur : du vent mortifere duquel on iuge que celle fauge deuoit estre deuenue

enuenimee. Et n'ayant aucun la hardieffe de s'approcher de ce crapaut : on fit faire vn fort grand cerne, & là le bruslerent avec ladite fauge. Et lors fut acheué le proces de monsieur le iuge sur la mort du pauvre Pasquin : lequel, ensemble sa Simonne, furent portez en terre ainsi enflez qu'ilz estoient par Strambe & ses compagnons dessus nommez, en l'eglise de saint Paul : dont paraduenture ilz estoient paroissiens.





NOUVELLE HVICTIESME.

*Monstrant encores la sotise de qui pense esteindre
l'amour de celuy qui ayme ardamment, avec
les inestimables puissances d'amour.*

*Hierofme aymant vne ieune fille nommee Sil-
uestre s'en alla contrainct par les prieres de sa
mere à Paris : retournant duquel il trouua
s'amie mariee : en la maison de laquelle il entra
secretement, & mourut aupres d'elle dedans le
lict, puis estant porté en vne eglise pour estre
enterré, elle mourut semblablement sur luy.*



A nouuelle de ma-dame Emilie
estoit acheuee, quand ma-dame Nei-
phile par le commandement du
Roy, commença à dire ainsi : Il
me semble (dames de valleur) qu'il
se trouue assez de gens, qui pensent fauoir plus
que tous les autres, & toutesfois ilz sçauent
moins : presumans par cecy d'employer & op-
poser leur sens & entendement à entreprendre,

non seulement contre le conseil & opinion des hommes, mais encor contre la nature des choses. De laquelle presumption il en est desia auenu de tresgrands maux : & n'a l'on iamais veu qu'il en soit forty aucun bien. Et pource qu'entre les choses naturelles celle qui moins reçoit conseil ou operation au contraire, c'est amour : la nature duquel est telle, qu'il se peut plustost consommer par soy-mesmes qu'estre chassé par admonnestement d'autrui, il m'est venu en l'entendement de vous raconter vne nouuelle d'une femme laquelle voulant paroistre plus sage qu'il ne luy apartenoit, & qu'elle n'estoit, & qu'aussi la chose en quoy elle estudioit de monstrier son sens ne le meritoit, fit tant qu'en vne mesme heure, elle tira l'amour & l'ame du corps de son filz, pensant chasser amour hors d'un cœur amoureux, où paraventure la faueur du ciel l'auoit mis.

Il y eut donc en nostre cité (selon que les anciens racontent) vn tresgrand & riche marchand, qui se nomma Leonard Segulier : lequel eut de sa femme vn filz nommé Hierosme : apres la natiuité duquel ayant mis tous ses affaires en bon ordre, il passa de ceste vie en l'autre. Les tuteurs de l'enfant gouvernerent avec la mere, bien & loyaument tous ses affaires : & deuenant l'enfant grand, il s'aprioisa avec les autres enfans ses voisins, plus d'une petite garce de son aage, fille d'un

cousturier que nulle autre de son quartier : & croissant tous les iours plus grand, la frequentation se conuertit en si grande & ardente amytié, que Hierosme n'auoit aucun bien, sinon quand il voyoit ceste fille : & certainement elle ne l'aymoit moins que luy elle. La mere de l'enfant s'estant aperceue de cecy, l'entença, & chastia plusieurs fois : mais voyant qu'il ne s'en abstenoit point, s'en plaignit à ses tuteurs : & comme celle qui pensoit pour la grande richesse de son filz, faire d'une espine un orenger, dist ainsi : Ce garçon icy (lequel n'a pas encores quatorze ans) est si fort amoureux d'une fille d'un cousturier nostre voisin, nommé Siluestre, que si nous ne l'ostons de sa presence, il la prendra parauenture un iour pour femme, sans que personne en sache rien : dont ie mourroye de dueil : ou bien il se consummera pour elle, s'il voit qu'on la marie à un autre : & par ainsi il me sembleroit bon, que pour y obuier, vous le deuriiez enuoyer quelque part loin d'icy pour seruir en quelque boutique : par ce que quand il ne la verra plus, elle luy sortira de l'entendement, & apres nous le pourrons marier à quelque ieune fille de bonne maison. Les tuteurs dirent qu'elle parloit tresbien, & qu'ilz le feroient, s'il leur estoit possible. Parquoy faisans appeller le garçon en la boutique, l'un d'eux luy commença à dire fort amyablement : Mon filz tu es desormais grandet, ce fera bien fait que tu commences à

veoir toy-mesmes tes affaires : & à ceste cause nous ferions fort contans que tu t'en allasses demourer quelque temps à Paris, où tu verras vne grande partie de ta richesse comme elle se traffique : & outre ce tu deuiendras là beaucoup mieux conditionné & plus honneste homme que tu ne ferois icy : en voyant ces seigneurs, ces Barons, & ces gentilshommes : dont il y a grand nombre : & apprendras leurs meurs & conditions : puis apres tu t'en pourras retourner icy. Le garçon les escouta ententiuement, & en peu de parolles leur respondit qu'il n'en vouloit rien faire : parce qu'il pensoit auoir aussi bien dequoy demourer à Florence comme vn autre. Ces gens de bien oyans cecy, le reprindrent encor avec plusieurs parolles : mais voyans qu'ilz n'en pouuoient tirer autre responce, le dirent à sa mere. Laquelle courrouffee desesperément de cecy, non pas de ne vouloir aller à Paris : mais de ce qu'il estoit ainsi amoureux, luy dist toutes les iniures du monde, & apres par douces parolles l'apaisant, commença à le flatter & le prier doucement, pour le persuader de faire ce que ses tuteurs vouloient : & tellement le sceut prescher qu'il accorda d'aller demourer vn an à Paris, & non plus : & ainsi fut fait. Estant donques Hierosme allé demourer à Paris, & tousiours amoureux plus que iamais de sa Siluestre, on le l'y tint sous promesse de l'enuoier querir d'un iour à l'autre deux ans entiers : & luy retournant

de là plus amoureux que iamais, trouua s'amie mariee à vn bon ieune filz tentier : dequoy il fut dolent outre mesure, toutesfois voyant qu'il n'en pouuoit estre autrement, s'effaya de le porter patiemment. Et ayant sceu le lieu où elle se tenoit, il commença (comme la coutume des ieunes amoureux est) à passer & se promener deuant elle : pensant qu'elle ne l'auoit non plus oublié que luy elle : mais le cas alloit bien autrement : car elle ne se fouuenoit de luy, non plus que si elle ne l'eust iamais veu : ou bien si elle s'en fouuenoit quelque peu, son semblant monstroït tout le contraire : dequoy le ieune garçon s'aperceut bien tost, & non sans grande melancolie : neantmoins il faisoit tout ce qu'il luy estoit possible pour r'entrer en sa grace. Mais luy estant auis que tout ce qu'il faisoit ne luy seruoit de rien, il se delibera quand bien il deuroit mourir, de parler luy mesmes à elle. Et s'estant informé de quelques voisins des estres de sa maison, entra secrettement dedans, vn soir que son mary & elle estoient allez vueiller avec leurs voisins : & se cacha en sa chambre derriere les rideaux d'un liēt de camp, qui y estoit tendu : où il attendit tant qu'apres que ceux-cy furent retournez & couchez, & que le mary fut endormy, il s'en alla tout droit au lieu où il auoit veu que Siluestre s'estoit couchee : & luy ayant mis la main sur son estomach, luy dist tout bellement, Helas m'amie dors tu desia ? La ieune

femme qui ne dormoit point, voulut crier : mais Hierosme luy dist soudainement : pour Dieu ne crie point : car ie suis ton Hierosme. Ce qu'oyant ceste-cy luy dist tout en tremblant, He pour l'amour de Dieu Hierosme vaten, ce temps est passé auquel il n'estoit point mal feant à nostre grande ieunesse de s'entraimer, ie suis maintenant comme tu vois mariee, au moyen dequoy il ne me fiet plus bien de penser à autre homme qu'à mon mary : parquoy ie te prie pour Dieu que tu t'en voises : car si mon mary te sentoit (encores qu'autre mal n'en auint) si en auiendroit-il toutesfois que ie ne pourroye iamais viure en paix, ne en repos avec luy : là où il m'aime maintenant, & viuons paisiblement ensemble. Le ieune filz oyant ces parolles sentit vne douleur inestimable : & combien qu'il luy ramentust le temps passé, & comment son amitié n'estoit pour aucune distance iamais diminuee, y entremellant plusieurs prieres & promesses tresgrandes, il ne sceut pourtant obtenir iamais aucune chose d'elle. Parquoy desirant de mourir, la pria à la fin que pour toute recompense de tant d'amitié qui luy auoit porté & portoit, elle souffrist qu'il se couchast aupres d'elle tant qu'il se fust rechauffé : par ce qu'il s'estoit tout gelé en l'attendant, luy promettant qu'il ne luy diroit ne feroit aucune chose : & que aussi tost qu'il feroit vn peu rechauffé il s'en iroit. La ieune femme ayant quelque compassion de luy,

l'accorda avec les conditions deffusdictes. Hierosme se coucha aupres d'elle sans point la toucher : & se fouenant de la longue amitié qu'il luy auoit portee, & de la presente cruauté qu'il voyoit en elle, cognoissant aussi que toute son esperance estoit perdue, delibera de ne viure plus en ce monde : & s'estans retirez en luy ses esprits sans dire aucune parolle, il ferra les poings, & mourut aupres d'elle. Laquelle apres quelque espace de temps s'esmerueillant de sa contenance, & craignant que son mary s'esueillast, commença à dire : He Hierosme que ne t'en vas tu, mais sentant qu'il ne respondit rien, elle pensa qu'il fust endormy. Parquoy ayant estendu sa main iusques à luy, afin qu'il s'esueillast, elle commença à le pousser, & en le touchant le trouua plus froid que glace, dont elle s'esmerueillait fort : & le touchant plus fort, & sentant qu'il ne se mouuoit point, apres l'auoir retouché plusieurs fois elle cogneut qu'il estoit mort : dequoy dolente outre mesure, elle fut grand piece sans sçauoir qu'elle deuoit faire. A la fin elle print pour conseil de vouloir esprouuer (parlant en la personne d'autrui) ce que son mary diroit, qu'il en feroit de faire : & l'ayant esueillé, elle feignit d'estre auenu à vn autre, ce que presentement luy estoit auenu, luy demandant si cela luy auenoit quel conseil il luy en donneroit. Le bon homme respondit qu'il luy sembleroit qu'on deust porter secretement à sa maison celui qui

feroit ainfi mort, & le laifier là, fans en porter aucune malueillance à la femme, qui ne luy fembloit auoir aucunement failly. Alors la ieune femme dift : Ainfi donc nous faut-il faire. Et luy ayant prids la main, luy fit toucher le ieune homme mort : dont tout marry, il fe leua incontinent debout : puis allumant de la chandelle, fans entrer autrement en parolles avec fa femme, il chargea fur fes efpaules le corps mort, reueftu de fes mefmes habillemens & fans y fonger autrement, fe confiant de fon innocence, le porta à l'huys de fa maifon, où il le pofa : puis s'en retourna. Or le iour venu qu'on trouua celtuy-cy mort & eftendu deuant fa porte, il en fut fait vn grand bruit : & mefmemment par la mere, laquelle cercha & regarda par toute fa perfonne, ne luy trouuant ne coup ne playe, fi fut generalement creu par les medecins qu'il eftoit mort de dueil, comme la verité eftoit. Ce corps doncques fut porté à l'Eglife : & là vint la dolente mere avec plufieurs autres parens & voyfines, & commencerent à plorer trefamerement fur luy, comme eft noftre couftume & à mener grand dueil, & ce pendant qu'on menoit ce grand dueil, le bon homme en la maifon duquel il eftoit mort, dift à fa femme, metz quelque cappe fur ta teſte, & va t'en à l'Eglife où l'on a porté Hierofme, & fourre toy entre les femmes, & eſcoute de ce qu'on dit de ce cas : & ie feray le femblable entre les hommes, à fin

que nous sâchons si on en dit quelque chose contre nous. La ieune femme qui deuenoit trop tard pitoyable en fut contente : comme celle qui desiroit voir mort celuy auquel quand il viuoit elle n'auoit voulu complaire seulement d'un baïser, & s'y en alla : c'est chose merueilleuse à penser combien les forces d'amour sont difficiles à retrouver : car le cœur de ceste femme, lequel la prospere fortune de Hierosme n'auoit peu ouurir, fut ouuert par la miserable : & s'estans là resuscitees les anciennes flammes, elles se muerent soudainement en vne si grande compassion, qu'aussi tost qu'elle vit le visage mort, elle se mit (estant ainsi cachee de sa cappe) au trauers toutes les femmes, & ne cessa iusque à ce qu'elle fut arriuee au corps mort. Et là ayant ietté vn treshaut cry, elle ietta son visage sur le ieune homme mort, lequel elle ne baigna gueres de larmes : par ce qu'elle ne l'eut si tost touché, que tout ainsi comme la douleur auoit osté la vie au ieune homme, ainsi l'osta elle à la ieune femme. Mais apres que les femmes la voulurent reconforter, luy disans que elle se leuast vn peu, ne la cognoissans encores & la voulans leuer, puis qu'elle ne se leuoit, aussi qu'elle ne se remuoit en façon que ce fust, elles la voulurent aucunement souzleuer : mais en vne mesme heure elles cognurent qu'elle estoit morte, & que c'estoit la pauvre Siluestre. Dequoy toutes les dames qui estoient là, vaincues de double com-

passion, recommencerent leurs pleurs plus grans qu'auparavant. Le bruit s'espandit hors de l'Eglise entre les hommes, lequel venu aux oreilles du mari (qui estoit parmy eux) il plora longuement sans vouloir ouir consolation ou confort de personne. Et apres ayant raconté à plusieurs de ceux qui y estoient l'histoire qui auoit esté la nuit precedente entre le ieune homme & sa femme, chacun sceut manifestement l'occasion de la mort de tous deux, dont tous furent desplaifans. Ayant donques prins la ieune femme morte, & accoustumé comme on accoustre les corps mortz, on la coucha sur ce mesme lit, aupres du corps du ieune homme. Puis quand ilz furent longuement plorez, on les enterra tous deux en vne mesme sepulture. Et ceux qu'amour (quand ilz viuoient) n'auoit peu conioindre ensemble, la mort assembla en inseparable assemblée.





NOUVELLE NEUVVIESME.

Pour signifier en quelle fin peuuent encourir ceux qui ayme contre raison, faisant tort à l'amitié & au mariage ensemble.

Messire Guillaume de Rossillon donne à manger à sa femme le cœur de messire Guillaume Gardastain qu'il auoit tué & qu'elle aimoit. Ce qu'elle sachant par apres se ietta d'une haute fenestre en bas, & mourut, puis fut enterree avec son amy.



UANT la nouuelle de ma-Dame Neiphile fut finie, non sans auoir meu à grande compassion toutes ses compaignes, le Roy qui ne vouloit enfreindre le priuilege donné à Dioneo (ne restant plus autres qu'eux à parler) commença ainsi : Il me vient au deuant (pitoyables Dames) vne nouuelle, laquelle (puis que vous estes ainsi dolentes des malheureux accidens d'amour) il vous conuiendra auoir non moins de compassion, que de la

precedente par ce que ceux ausquelz auint ce que ie diray estoient de plus grosse estoffe, & si fut l'accident plus cruel que ceux dont on a parlé.

Vous deuez doncques sçauoir (ainsi que racontent les Prouenceaux) qu'il y eut autresfois en Prouence, deux nobles cheualiers, ayans chacun chasteaux & vassaux, dont l'un se nommoit messire Guillaume de Rossillon, & l'autre messire Guillaume Gardastain. Et pource que l'un & l'autre estoient vaillans en faits d'armes, ilz s'aimoient tresfort, & auoient de coustume d'aller tousiours ensemble à tous les tournois, ioustes, ou autres faits d'armes qui se faisoient, & se vestoient de mesme parure. Et combien que chacun demourast en vn sien chasteau distant l'un de l'autre bien cinq lieuës, il aduint toutesfois qu'ayant messire Guillaume de Rossillon vne tresbelle & desirable dame pour femme, messire Guillaume Gardastain en deuint demesurément amoureux, nonobstant l'amitié & la confraternité qui estoit entr'eux : & fit tant par vn moyen & par autre, que la dame s'en aperceut : dont elle fut tresaise, le cognoissant tref-vertueux cheualier, & commença à mettre son amour en luy, de forte qu'elle n'aymoit ne desiroit rien de ce monde, sinon luy & n'attendoit autre chose, sinon qu'il la priaist, ce qui ne tarda gueres, & furent ensemble, non seulement vne fois, mais aussi plusieurs. Donques s'entr'aymans fort & frequen-

tans indiscrettement ensemble, auint que le mary s'en apperceut, dont il fut tellement indigné, que la grande amitié qu'il portoit à messire Guillaume Gardastain, se conuertit en haine mortelle : mais il sceut mieux celer qu'eux n'auoient fait leur amytié, & delibera de tout en soy-mesme de le tuer. Parquoy estant messire Guillaume de Rossillon en ceste deliberation, il furuint qu'on publia à son de trompe vn grand tournoy qu'on deuoit faire en France, ce que messire Guillaume de Rossillon enuoya incontinent faire fauoir à messire Guillaume Gardastain, le priant de le venir voir, si c'estoit son plaisir, & qu'ilz delibereroient ensemble s'ilz y yroient, & comment. Messire Gardastain trefsiouyeux de cecy respondit, qu'il s'en yroit soupper sans aucune faute le lendemain auecques luy, dont messire Guillaume de Rossillon (oyant la responce) pensa en soy-mesmes que l'heure estoit venue qu'il le pourroit tuer. Et s'estant armé, le iour ensuyuant, monta à cheual auec quelques seruiteurs siens, & se mit en embusche demye lieuë par aduenture de sa maison en vn bois par où deuoit passer messire Gardastain & apres l'auoir attendu vne bonne espace de temps, il le vit venir, auec deux seruiteurs apres luy tous desarmez, comme celuy qui ne se doutoit de rien, & aussi tost qu'il le vit au lieu où il le desiroit, il luy courut sus, tout felon & plein de mauuaise volonté, auec vne lance au poing en luy escriant,

Traistre meschant tu és mort, & disant ces parolles le frapa de sa lance en l'estomach : dont ne pouuant le Gardastain se deffendre aucunement, ne dire seulement vne parolle, estant percé d'outre en outre du coup de lance il tomba par terre, & peu apres mourut, & ses seruiteurs tournerent bride, & s'enfuirent le pluystost qu'ilz peurent vers le chasteau de leur seigneur, sans cognoistre celuy qui auoit commis le meurtre, & messire Guillaume de Rouffillon descendit de cheual ouurant avecques vn couteau, l'estomach du trespasé, & de ses propres mains luy arracha le cœur : puis l'ayant fait enuveloper en vne banderolle de lance, commanda à vn de ses seruiteurs qu'on l'emportast, & qu'il n'y eut si hardy d'eux de iamais parler de ce fait : puis remonta à cheual, estant desia nuiét, & s'en retourna en son chasteau. La dame qui auoit entendu que messire Gardastain deuoit venir à soupper, & qui l'attendoit avec grand desir, ne le voyant venir s'esmerueilla fort & dist à son mary : Comment est il possible que messire Guillaume Gardastain n'est point venu ? à qui le mary respondit : i'ay eu nouuelles de luy, qu'il ne peut venir iusques à demain. Dequoy la Dame estant vn peu marrie n'en parla plus. Le mary, quand il fut descendu de cheual fit appeller son cuyfinier, & luy dist prend ce cœur de sanglier & l'apreste en la meilleure & plus plaifante forte pour manger que tu sauras, & quand ie feray à table, enuoye le

moy en vn plat d'argent. Le cuyfinier le print, & ayant mis toute sa science pour le bien accoustrer : en fait vn hachis le meilleur du monde. Messire Guillaume quand l'heure du dîner fut venue se mit à table avec sa femme, & la viande fut servie : mais il mangea peu, à cause du malefice qu'il avoit commis, & ne faisoit que penser. Le cuyfinier luy fit porter le hachis qu'il fit servir devant sa femme, & faisant semblant d'estre ce soir tout desgouté, le luy loua grandement. La dame qui n'estoit point desgoutée en commença à manger & luy sembla bien bon : parquoy elle le mangea tout. Quand le cheualier vit qu'elle l'avoit tout mangé, il luy dist : Comment vous a semblé bonne ceste viande? En bonne foy monsieur respondit la dame, elle m'a plu merueilleusement. Si m'aide Dieu (dist le cheualier) ie vous en croy, & ne m'esbahy point si vous avez trouué bon mort, ce qui vous a tant plu vif. La dame oyant cecy fut quelque temps sans parler, puis luy dist : Comment? Qu'est-ce que vous m'avez fait manger? Le cheualier respondit, ce que vous avez mangé est pour certain le cœur de messire Guillaume Gardastain, que vous meschante aimiez tant, & sachez pour vray que c'est luy mesmes, parce que ie le luy arrachay de la poitrine avec ces propres mains, vn peu avant que ie retournasse. Si la dame fut dolente oyant dire cecy de celui qu'elle aymoit sur toute autre chose, il ne faut point demander.


Et quelque peu apres elle dist : Vous auez fait ce qu'un desloyal & meschant Cheualier doit faire : car si ie l'auois fait Seigneur de mon amour, sans qu'il m'eust fait aucune force, & vous estiez en cecy outragé, i'en deuois porter la peine & non luy. Mais i'a à Dieu ne plaïse que sur vne si noble viande comme a esté celle du cœur d'un si vaillant & courtois Cheualier tel que fut messire Guillaume Gardastain, iamais y entre nulle autre viandes. Et s'estant leuee de table se ietta du haut en bas sans autre deliberation par vne fenestre qui estoit derriere elle, laquelle estoit fort haute de terre. Dont en tombant elle non seulement se tua : mais aussi se meit quasi toute en pieces. Ce que voyant messire Guillaume fut fort estonné, & cogneut bien qu'il auoit mal fait. Parquoy craignant les païsans & les gens du Comte de Prouence, il fit feller ses cheuaux & s'enfuyt, laquelle chose fut sceuë le lendemain par toute la contree, ainsi comme elle auoit esté faicte. Au moyen dequoy les deux corps recueilliz tant par les gens de messire Guillaume Gardastain, que par ceux de la Dame, avec tresgrandes doleances & pleurs furent mis ensemble en l'Eglise du Chasteau de la Dame en vne mesme sepulture sur laquelle furent escritz certains vers signifians, qui furent ceux qui estoient enterrez là dedans, & l'occasion & maniere de leur mort.



NOUVELLE DIXIESME.

Comprenant qu'aucunes fois aduventure, plustost que raison, iecte l'homme hors de diuers perilz, & principalement en cas d'amour.

La femme d'un Chirurgien mit pour mort en vne huche un sien amy, qui auoit beu d'une eau qui faict endormir les gens, dedans laquelle huche deux larrons vsuriers l'emporterent en leur maison, puis se resueillant cest amy, & estant prins pour larron, la chambriere de la Dame s'alla accuser à la iustice, de l'auoir mis en ceste huche & par ce moyen il eschappa d'estre pendu, & les larrons pour l'auoir defrobé furent condamnez en amende pecuniaire.



PRES que le Roy eut mis fin à son dire, il restoit seulement à Dioneo dire la sienne. Ce que luy cognoissant, & aussi que le Roy le luy auoit desia commandé, commença ainsi : Les miseres qu'on a racontées des

amitez malheureufes, ont faict deuenir tout triftes les yeux & les cœurs, non feulement de vous autres (mes Dames) mais auffi de moy-mefmes. Parquoy i'ay grandement fouhaitté que la fin en fust venue. Or loué foit Dieu qu'elles font finies, fi ce n'eftoit que ie vouluffe faire à cefte mauuaife denree, vne mauuaife adition, dont Dieu me garde, fi commenceray fans plus fuyure vne fi douloureuse matiere, vne nouuelle qui fera quelque peu plus ioyeufe & meilleure. Laquelle donnera par auenture bon argument, à ce que on deura raconter la iournee enfuyuant.

Vous deuez fçauoir (mes belles ieunes Dames) qu'il n'y a pas encor long temps, qu'il y eut à Salerne vn Chirurgien fort renommé, qu'on appelloit maiftre Mazzeo de la montaigne, lequel eftant defia venu fur la fin de fon aage, espoufa vne belle & gentille fille de fa ville, qu'il contentoit de riches & triomphans habillemens, de bagues, & de tout ce qui pouuoit plaire à vne femme, mieux que nulle autre de la ville. Il eft vray qu'elle eftoit le plus du temps morfondue comme celle que le maiftre couuroit tres-mal dedans le liët, lequel (tout ainfi comme meffire Richard de Quinzica dont nous auons cy deuant parlé¹, enfeignoit les eftes à la fienne) monftroit pareillement à cefte-cy, que pour auoir couché feulement une fois avecque vne femme, il falloir fe reposer plusieurs iournees apres pour fe mettre en

nature, & mille autres semblables follies, dont elle viuoit trefmal contente. Toutesfois comme sage & de bon esprit qu'elle estoit, delibera pour foulager le maistre de la maison de se iecter à l'escarmouche, & vser du bien d'autrui. Au moyen dequoy ayant veu plusieurs ieunes hommes, il y en eut finablement vn qui luy entra en l'entendement, auquel elle mit toute son esperance, tout son cœur, & tout son bien. Dequoy s'estant le ieune homme apperceu, il tourna toute son amitié vers elle. Cestuy-cy estoit nommé Roger de Ieroli, de noble parenté : mais de si mauuaise & vituperable vie, qu'il n'auoit parent ne amy qui l'aymast, ou qui le voulut voir tellement qu'il estoit réputé par tout le pays de Salerne pour vn larronneau & mauuais garçon : dont la Dame ne se soucia gueres, luy plaissant pour autre occasion. Et de faict elle sceut ordonner son cas de forte, que par le moien d'une sienne chambriere, ilz se trouuerent ensemble seul à seul, & apres qu'ilz eurent prins quelque plaisir l'un avec l'autre, la Dame luy commença à blasmer la vie qu'il auoit tenue par le passé, & à le prier que pour l'amour d'elle il se chastiaist de telles choses, & pour luy en donner le moyen elle le secourut quelque fois d'une somme d'argent, & quelque fois d'une autre. Or perseuerans en ceste maniere ensemble fort discrettement, aduint que le Chirurgien eut entre mains vn patient qui auoit vne des iambes toute gastee, & congnoissant

d'où procedoit le mal, diët à ses parens, que si on ne luy ostoit vn oz pourry en la iambe, il la luy faudroit couper, ou qu'il mourust : mais luy tirant l'oz qu'il pourroit guerir : toutesfois ne l'entreprendroit sinon le tenant desia pour mort. A quoy s'estans accordez ceux de qui il estoit allié, ilz le luy baillèrent pour tel. Le Chirurgien pançant que si le patient n'estoit endormy, il ne sçauroit endurer la peine, & ne se voudroit laisser pançer, fit son conte de recommencer à faire ceste œuvre iusques au soir ensuyuant, si fit distiller au matin eau d'une fienne certaine composition, laquelle (quand le patient en auroit beu) le feroit dormir autant de temps comme il mettroit à le pançer : puis la faisant apporter en sa maison, la mit en vne fenestre d'icelle sans dire à personne ce que c'estoit. Quand la nuit approcha que le maistre Chirurgien deuoit aller voir cestuy-cy, il vint deuers luy vn messagier d'aucuns de ses plus grandz amys de Melse qui le prioient trefin-stamment qu'il ne faillist incontinent de venir, parce qu'il y auoit eu vne grande batterie, où plusieurs personnes auoient esté bleçees. Parquoy prolongeant la cure de ceste iambe iusques au lendemain matin, il monta sur vne barquette, & s'en alla à Melse. Au moyen dequoy la Dame sçachant que son mary ne reuiendrait ce soir au logis, enuoya secretement querir (comme elle auoit accoustumé) son amy Roger, & l'enferma dedans sa chambre,

iufques à ce que certaines autres pèrsonnes de la maifon s'en fuſſent allees coucher. Eſtant doncques Roger en la chambre en attendant la Dame, & ayant pour la peine qu'il auoit eüe le iour (ou bien qu'il auoit mangé fallé, ou parauenture par vne longue accouſtumance) tref-grand ſoif, il luy aduint par fortune, de trouuer en la feneftre la fiole d'eau que le Chirurgien auoit faiète pour le patient, & croyant qu'elle fuſt bonne à boire, la mit à la bouche & la beut toute. Parquoy il n'arreſta gueres qu'un grand ſommeil le print, & s'endormit. La Dame s'en vint le pluſtoſt que il luy fut poſſible, & trouuant Roger qui dormoit le commença à pouffer, & à luy dire tout bas qu'il ſe leuaſt debout : mais tout cela ne ſeruoit de rien : car il ne reſpondoit, & ne ſe remuoit aucunement, dont la Dame eſtant quelque peu courroucée le pouſſa plus fort en diſant : Or ſus dormart lieue toy, ſi tu auois talent de dormir tu t'en deuois aller en ton logis, non pas venir icy. Roger eſtant ainſi pouſſé tomba à terre de deſſus vn coffre ſur lequel il eſtoit, & ne fit aucun ſemblant de s'en reſſentir, ne plus ne moins qu'eufſt faièt vn corps mort. Dequoy la Dame ſe trouuant aucunement eſtonnée, commença à le vouloir releuer, & à le remuer plus fort qu'au parauant, puis à le prendre par le nez, & luy arracher la barbe : mais tout cela ne ſeruoit pareillement de rien, car il auoit attaché ſon Afne à trop bonne cheuille. Par-

quoy la Dame entra en soupçon qu'il estoit mort, toutesfois elle commença à pincer plus aigrement qu'elle n'auoit faict, & à le brusler avec vne chandelle allumee encor tout cela n'estoit rien. Au moyen dequoy elle qui n'estoit point medecine, combien que son mary le fust, creut que sans point de faute il estoit mort. Dont il ne faut demander (l'aymant sur toute autre chose comme elle faisoit) si elle en fut dolente. Et n'osant en faire aucun bruit, commença sans crier à pleurer sur luy, & à se douloir d'une telle malencontre : mais apres quelque temps, craignant d'adiouster honte à sa perte, elle pensa qu'il falloit trouuer moyen sans y songer plus longuement comme on le pourroit (estant ainsi mort) mettre hors de la maison. Et ne sçachant conseiller en cecy elle appela tout bellement sa chambriere, à laquelle elle remonstra sa defortune, & luy demanda conseil. La chambriere s'esmerueillant fort le voulut elle mesme tirer & le pincer, & congnoyssant qu'il n'auoit aucun sentiment dist ce que la dame disoit : c'est asçauoir qu'il estoit pour certain mort, & fut d'auis qu'on le deuoit mettre hors de la maison. Et où le pourrons nous mettre (dist la Dame) qu'on ne soupçonne au matin (quand on le trouuera) qu'il n'ayt esté tiré de ceans? A qui la chambriere respondit : Madame i'ay veu ce soir qu'il estoit encores tard, deuant la boutique de ce menuisier nostre voisin vne huche qui n'est pas trop grande

laquelle (si le maistre ne l'a ferree) viendra le mieux à propos du monde pour faire ce que nous voulons, parce que nous le pourrons mettre dedans, & luy donner deux ou trois coups de cousteau & le laisser là. Je ne sçay pas pourquoy celuy qui le trouuera en celle huche, croira plustost qu'on le y ayt mis de ceans que d'ailleurs. Et suis certaine qu'on croira plustost (parce qu'il a esté mauuais garçon) qu'il ayt esté tué d'aucun sien mal-veillant, en allant faire quelque meschanceté, & puis apres mis dedans ce coffre, que d'estre party de ceans. Le conseil de la chambriere fut trouué bon du tout par la maistresse, fors que de luy donner aucuns coups de cousteau : en disant qu'elle ne pourroit souffrir cela pour chose du monde. Et enuoya la chambriere voir si la huche estoit là où elle l'auoit veue, laquelle retourna, & dist qu'ouy, puis chargea, elle qui estoit ieune & forte, Roger sur ses espaules, avec l'ayde de la Dame, qui marchoit deuant pour voir si personne venoit, & quand elles eurent trouué la huche, elles le mirent dedans, & le laisserent là. Ce mesme iour deux ieunes hommes s'estoient allez loger en celle rue vn peu plus haut que le logis du menuysier, lesquels prestoient de l'argent à interest, & desirans de gagner beaucoup, & despendre peu, ayans besoing de meubles, auoient veu le iour precedent ceste huche, & auoient faict leur complot de l'emporter en leur logis, si elle y demouroit la nuit,

laquelle venue ilz fortirent hors, & ayans trouué la huche, l'emporterent incontinent en leur logis, fans entrer en autre dispute : encore qu'elle leur semblast vn peu pesante, & la mirent aupres d'une chambre où leurs femmes couchoient, fans se foucier pour l'heure de la ranger mieux, & la laiffans là s'en allerent dormir. Roger qui auoit dormy trefgrande piece, & auoit digéré defia son breuuage, auffi que la vertu d'iceluy estoit confommee, s'esueilla vn peu deuant iour. Et combien que son sommeil fust rompu, & que les sens eussent recouuré leur vertu, si est-ce qu'il luy demoura vu estonnement au cerueau qui le tint tout estourdy, non seulement celle nuict : mais plusieurs autres apres : puis ayant ouuert les yeux, & ne voyant chose qui fust, il estendit ses mains çà & là, & se trouuant en ceste huche commença à refuer, & à dire en soy mesme : Qu'est cecy ? où suis-ie ? dors ie, ou si ie veille ? Si me fouient il bien que ie vins arsoir en la chambre de m'amie, & maintenant il me semble que ie suis en vne huche. Que veut dire cecy ? Le chirurgien feroit-il point retourné ? ou quelque inconuenient surueni, pour lequel elle me voyant endormy m'eust icy caché ? Le le croy, & que certainement il fera ainsi. Parquoy il pensa à demourer coy, & escouter s'il orroit quelque chose. Et ayant demouré ainsi assez long temps plus mal à son ayse qu'autrement, en celle huche qui estoit petite, & luy faisant

douleur le costé sur lequel il estoit couché, & luy se voulant tourner sur l'autre, il le fit si dextrement, que donnant des rains à l'un des costez de la huche, laquelle n'auoit esté mise sur lieu qui fust vny, il la fit pancher & apres tomber, & en tombant fit vn si grand bruit, que les femmes qui estoient couchees là aupres s'esueillerent, & eurent paour, toutesfois qu'elles n'oserent sonner mot. Roger doutant fort, pour la cheute de la huche, & sentant que par ce moyen elle s'estoit ouuerte ayma mieux (si autre chose luy suruenoit de fortune) estre dehors que demourer dedans, & tant pour ne sçauoir où il estoit, que pour vne chose & autre, il commença à s'en aller chancelant par la maison, pour sçauoir s'il trouueroit degré ou porte par où sortir. Ce qu'oyant les femmes qui estoient esueillées commencerent à dire : Qui est là ? Roger ne congnoissant point leurs voix, ne leur respondit rien. Parquoy les femmes commencerent à appeller leurs maris lesquels dormoient fort, parce qu'ilz auoient veillé beaucoup, & n'ouyrent chose que ce fust de tout cecy. Au moyen dequoy estans les femmes deuenues plus paoureuses que deuant se leuerent, & se mettant aux fenestres se prindrent à crier au larron, au larron. Au cry desquelles plusieurs des voisins accoururent, les vns par dessus les maisons, les autres par vn endroit, & autres par diuers lieux & entrèrent en la maison. Les marys pareillement s'esueillerent à ce

grand bruit, & prindrent ce pauvre Roger, lequel estoit presque hors de son sens, de grande merueille, de se voir là, sans sçavoir par quel endroit il deuoit ou pouuoit eschapper. Et quand il fut prins ilz le mirent és mains des sergens du gouuerneur de la ville, qui estoient couruz à ce bruit. Et estant amené deuers le gouuerneur fut mis incontinent (d'autant qu'il auoit reputation d'estre tresmauuais garçon) à la question, sur laquelle il confessa, que voirement il estoit entré en la maison de ces presteurs pour les desrober, par quoy le gouuerneur delibera sans trop songer de le faire pendre par la gorge. La nouvelle courut la mesme matinee, par tout Salerne, que Roger auoit esté prins, en voulant desrober la maison des presteurs. Ce qu'oyans la Dame & la chambriere, elles s'en esmerueillèrent si fort, qu'elles se vouloient quasi faire accroire n'auoir point faict ce que toutesfois elles auoient faict la nuit precedente, ains plustost auoir seulement songé de le faire. Et outre cecy, la Dame connoissant le peril enquoy estoit Roger, s'en trouuoit tellement troublee, qu'elle estoit en danger d'en deuenir folle. Vn peu apres huit heures du matin, le Chirurgien retourna de Melfe, & demanda son eau, pour ce qu'il vouloit aller pançer son patient, & trouuant la fiolle vuide, fit vn tel bruit au logis, que rien ne s'osoit trouuer deuant luy. La Dame qui estoit bien tourmentee d'autre chose respondit tout

en courroux. Vrayement nostre Maistre, vous feriez beau bruit d'une grande chose, quand pour vne fiolle d'eau seulement qui a esté versée vous criez tant : ne s'en trouue il plus au monde? A qui le maistre Phisicien dist : Ma femme tu as peut estre pensé que ce fust eau claire : mais il n'est pas ainsi, ains est vne eau composee pour faire dormir, & luy conta pour quelle occasion il auoit faicte. Incontinent que la Dame eut ouy cecy elle s'aduifa que Roger l'auoit beue, & que c'estoit la cause qui leur auoit faict croire qu'il estoit mort, & dist : Nostre maistre nous n'en sçauions rien, & par ainsi, refaiçtes en vne autre si vous voulez. Peu de temps apres la chambriere qui par le commandement de la Dame estoit allé sçauoir qu'il auendroit de Roger, retourna & dist : Madame tout le monde parle en mauuaise sorte de Roger, & à ce que i'ay entendu, il n'a parent n'amy qui se soit remué pour luy vouloir ayder, & tient lon pour certain que le Preuost le fera demain pendre, & outre ce ie vous veux bien dire vne chose, qu'il me semble auoir compris en mon entendement, comment il arriua à la maison des Presteurs, & oyez la maniere. Vous congnoissez bien le menuysier deuant lequel estoit la huche où nous le mismes, il estoit tout à ceste heure avec vn homme auquel ceste huche ce semble appartient, dont ilz ont eu le plus gros debat du monde ensemble, de ce que cestuy là demande, que le menuysier luy

paye sa huche, & le menuifier respond qu'il ne l'a point vendue : mais qu'elle luy a esté defrobee, & l'autre luy disoit, il n'est pas vray : ains tu l'as vendue à ces deux ieunes Presteurs d'argent, comme eux-mesmes m'ont dict ce matin, quand ie l'ay veue en leur maison à l'heure que Roger a esté pris. A qui le Menuifier dist, ils mentent par la gorge : par ce que iamais ie ne la leur vendy : mais trouuerez qu'ilz me l'auront ceste nuict defrobee, allons vers eux. Et ainsi s'en font allez tous d'un accord en la maison des Presteurs, & ie m'en suis retournee. Parquoy (comme vous pouuez voir) ie comprens que Roger a esté transporté en ceste forte, au lieu où il a esté trouué : mais de sçauoir comment il est ressusité ie ne le puis penser. La Dame comprenant lors tresbien comment le cas estoit allé, dist à la chambriere, ce qu'elle auoit ouy dire à son mary, & la pria que elle voulust faire tout son possible, pour sauuer Roger, comme celle qui en vne mesme heure le pouoit faire & garder l'honneur d'elle. La chambriere dist : Madame enseignez moy comment, & ie feray volontiers tout ce que ie pourray. La Dame (comme celle à qui le faict touchoit de bien pres) pensa soudainement ce que estoit de faire, & en informa la chambriere de poinct en poinct, laquelle s'en alla premierement au Chirurgien, & en plorant luy commença à dire : Monsieur il fault que ie vous demande pardon d'une grand

faute que i'ay commise enuers vous. Son maistre luy dist, & dequoy? Lors elle luy dist en pleurant : Monsieur vous cognoissez bien quel homme c'est que Roger de Ieroli : auquel luy venant volonté de m'aymer, il fallut moitié par force, moitié par requeste, que ie l'aymasse, il y a environ vn an. Et luy sçachant hier au soir que vous n'estiez point ceans, il me flatta tant que ie le menay en vostre maison dedans vne chambre, coucher avec moy, où il luy print vne grande soif, & pource que ie ne sceu lors à quoy recourir plustost ou à l'eau ou au vin, moy ne voulant que ma maistresse qui estoit en la salle, me vist, me va souuenir que i'auoye veu en vostre chambre vne fiolle d'eau que ie couruz prendre, & la luy donnay à boire : puis ie remis la fiolle où ie l'auoye prise, dont ie voy que vous auez faict vn si grand bruit par la maison, & certes ie confesse que i'ay mal faict : mais qui est celuy qui quelques-fois ne faille? Il me desplaist grandement de l'auoir faict, non tant seulement pour l'eau comme pour ce qui s'en ensuiuit depuis : car Roger est pour en perdre la vie. Parquoy ie vous supplie tant que ie puis, qu'il vous plaise me pardonner, & me donner permission que ie m'en voise le secourir en ce qu'il me fera possible. Le Chirurgien oyant ceste-cy (encore qu'il fut tout courroucé) luy respondit en la gaudissant : Il est bien employé si tu en portes la penitence toy-mesmes : parce que là où tu

pensois auoir ceste nuit vn gentil galant qui te deust bien secouer le pelisson, tu as eu vn grand dormart. Et par ainsi va & pourchasse la deliurance de ton amy si tu peux, & garde toy bien dorefnauant de l'amener iamais ceans : car ie te payeroye de ceste fois & de l'autre. Oyant laquelle responce, il sembla bien à la chambriere qu'elle auoit tresbien commencé son entreprinse, & s'en alla le plustost qu'elle peut à la prison où estoit Roger, où elle flatta tant le Geollier que il la laissa parler à Roger, & apres qu'elle l'eut instruit de ce qu'il auoit à respondre au Preuost s'il vouloit eschapper, fit tant qu'elle s'en alla deuant luy. Lequel Preuost premier que luy vouloir donner audience, voulut (pource qu'elle estoit fresche & rebondie) attacher son croq à la paureté de Dieu. A quoy elle, pour estre ouye de meilleur cœur, ne fit point de refus, & apres qu'elle se fut leuee de la besongne luy dist, Monsieur, vous auez icy Roger de Ieroli, qui a esté prins pour larron : mais la verité n'est pas ainsi. Et commençant l'histoire, la luy conta toute de fil en esguille, & luy dist, comme estant s'amie elle l'auoit mené en la maison du Chirurgien, & comme elle luy auoit donné à boire l'eau composee pour faire dormir, ne congnoissant quelle eau c'estoit, pareillement elle luy conta en quelle maniere elle l'auoit porté pour mort dedans la huche, & apres cecy, luy dist les parolles qu'elle auoit ouyes entre le menuifier & celui à qui la

huche appartenoit, luy faifant entendre par cela, comment Roger auoit peu eſtre trouué en la maifon des Preſteurs. Le Preuoſt voyant que c'eſtoit choſe facile à ſ'enquerir ſi cecy eſtoit vray ou non, enuoya premierement querir le Chirurgien, pour ſçauoir ſ'il eſtoit vray qu'il euſt faiſt ceſte eau : duquel il trouua qu'il eſtoit ainſi, & apres fit venir le menuifier, & celuy à qui la huche appartenoit, & pareillement les Preſteurs, & apres pluſieurs parolles, il trouua que les Preſteurs auoient la nuit paſſee deſrobé la huche, & portee en leur maifon. A la fin il ſe fit amener Roger, & luy demanda où il auoit couché la nuit precedente. Lequel reſpondit qu'il ne ſçauoit où : mais qu'il ſe ſouuenoit bien qu'il eſtoit allé pour coucher avec la chambriere de maiftre Mazzeo de la montaigne, en la chambre de laquelle il auoit beu de l'eau par grande ſoiſ qu'il auoit : mais qu'il deuint depuis (ſinon quand il ſe trouua dedans vne huche en la maifon des Preſteurs, apres que il fut eſueillé) il n'en ſçauoit rien. Le Preuoſt oyant toutes ces choſes, & y prenant grand plaifir, le leur fit redire à tous pluſieurs fois. A la fin congnoiſſant que Roger eſtoit innocent, il condamna les Preſteurs qui auoient deſrobé la huche, à dix onces d'argent, & deliura Roger. Dont il ne faut demander ſ'il en fut ioyeux, & encores plus ſa chere amie. Laquelle avec luy & la chambriere qui luy auoit voulu donner

les coups de cousteau, en rit & eut son passe-temps par plusieurs fois depuis : continuant toujours leur amitié & plaisir de bien en mieux. Le voudroye bien (mes Dames) qu'il m'en aduint ainsi. Mais non pas d'estre mis dedans la huche. Si les premieres nouvelles auoient contristé le cœur des Dames, cette derniere de Dioneo les fit tant rire (& mesmement quand il dist que le Preuost auoit attaché son croq) qu'elles se peurent bien restaurer de la compassion qu'elles auoient eu des autres. Mais voyant le Roy que le Soleil commençoit à se coucher, & que la fin de son gouuernement estoit venue, il s'excusa enuers les Dames avec plusieurs parolles gracieuses de ce qu'il auoit faict. C'est à sçauoir d'auoir faict deuiler d'une si cruelle matiere comme des malheurs des pauvres amoureux. Et quand il eut faict son excuse il se leua debout : & osta de dessus sa teste la couronne de Laurier : & attendans les Dames à qui il la voudroit poser, il la mit courtoisement sur la teste blonde de madame Flammette, en disant : Je te metz ceste couronne comme à celle qui sçaura mieux que nulle autre consoler demain ceste compagnie de la dure iournee d'aujourd'huy. Madame Flammette de qui les cheueux estoient crespeluz, longs & dorez, tombans vn peu sur ses blanches & delicates espauls, ayant vn visage rondelet, & vne vraye couleur de lis blancz, entremeslez de roses vermeilles, tout resplendissant, avec

deux yeux en la teste qui sembloient d'un Faucon passager, & vne petite bouchette, dont les leures ressembloient deux petits rubis, respondit en souzriant : Philostrate ie la prens volontiers : & (a fin qu'il te souuienne mieux de ce que tu as faict iusques à present) ie vueil & commande que chacun se prepare de deuifer demain de ce qu'est aduenu heureusement à quelque amoureux, apres certains cruels & malheureux accidens. Laquelle proposition pleut à tous. Et apres qu'elle eut fait appeller le maistre d'hostel, & ordonné avec luy de ce qu'estoit necessaire de faire, elle donna congé à toute la compagnie (qui s'estoit leuee) de s'en aller esbatre iusques à l'heure de souper, dont les vns s'en allerent par le iardin, la beauté duquel ne meritoit point qu'on s'en deust bien tost fascher, les autres vers les moulins, qui estoient hors d'iceluy, prenans iusques à l'heure de souper diuers plaifirs, selon leurs diuers appetitz. Laquelle venue & tous assemblez, ilz souperent comme ilz auoient de coustume aupres de la belle fontaine avec tresgrand plaisir & bien seruis. Puis quand ilz se furent leuez, se prindrent comme ilz fouloient à dancier & à chanter. Et menant ma-dame Philomene la dance, la Royne dist : Philostrate ie n'entends point me fouruoyer de ce qu'ont faict mes predecesseurs : mais tout ainsi qu'ilz ont faict ie veux que par mon commandement on die vne chanson : & pource que ie suis asseuree

que telles font tes chançons comme ont esté
tes nouvelles, ie veux, afin que dorefnauant
nous ne soyons plus ennuyees de tes malheurs,
que tu en dies celle qui plus te plaira.
Philoftrate respondit que volontiers le feroit, &
fans autre ceremonie commença à chanter
ainfi.

Mes pleurs font signifiance
Qu'à bon droict se deult le cœur
Subiect à autruy fiance.

Lors que premier celle pour qui fouspire,
De defefpoir m'entra en la penfee,
Tant de vertus en elle vey reluire,
Que i'estimay legier tout le martire
De toy receu Amour, quoy qu'offensee,
En eut esté ma liberté laiffée,
Mais maintenant ie congnois mon erreur,
Et non fans grand'douleur.

Car moy lassé par l'orde tromperie
De celle-là en qui seul esperoye,
I'ay apperceu fa fausse piperie
Lors que sa grace est de moy plus chérie,
Et lors que plus sans craincte au mal tiroye
De mon ennuy fuiuy ou i'aspiroye,
I'ay veu qu'elle a receu autruy valeur,
Me chassant de tel heur.

Dont vint au cœur le regret douloureux
Que porte encor, maudissant l'heure & iour
Que premier vy son visage amoureux
De grand' beauté enrichy & heureux,

Et ce qui plus m'enflambe tout autour
L'esprit mourant en desplaisant autour
Va maudissant aigrement mon malheur,
Foy, espoir & chaleur.

Parquoy tu peux Seigneur, Amour sentir
Quel est mon dueil despourueu de confort :
Je te dy tel est il sans en mentir,
Que pour souffrir par moy moindre martir
Inuoque & quiers vne cruelle mort :
Vienne donc tost, & d'un coup fier & fort
Face finir ma vie & ma fureur
Qui sera moindre ailleurs.

Nulle autre voye ou confort me demeure,
Pour de l'ennuy où suis me deffaisir,
Sinon la mort, fay donc tant que ie meure :
Que dueil ie perde, & la vie en mesme heure :
Puis qu'à tort vis priuee de tout plaisir,
L'ayse qu'elle a de tel amy faisir
Donne luy telle en ma mort : ô Seigneur
De tous les Dieux maieur.

Bien peu me chaut piteuse chansonnette
S'autre que moy n'apprend à te chanter,
Car nul te peut comme moy faire feste,
Mais bien te veux charger de chose honneste,
C'est qu'à Amour te voise presenter,
Pour à luy seul mon piteux cas conter,
Et le priant que luy pour son honneur
Me mette à port meilleur.

Les parolles de ceste chanson demonstroient
assez clairement ce que vouloit Philostrate, &
plus encor l'auroit parauenture déclaré le regard

de la Dame dont il parloit, qu'estoit en la dance, si l'obscurité de la nuit survenue n'eust caché la rougeur qui luy estoit montée au visage : mais apres qu'il eut acheué celle-là, lon en chanta plusieurs autres iusques à ce que l'heure de s'aller coucher fut venue, parquoy chacun se retira en sa chambre comme il pleut à la Royne.





CINQVIESME IOVRNÉE.

CINQUANTE-SEPTIEME



CINQVIESME IOVRNÉE.


*La cinquieme iournee du decameron, En laquelle
on deuise souz le gouuernement de ma-
Dame Flammette de ce qu'est aduenu heureu-
sement à quelque amoureux apres plusieurs
grandes mal-aduentures.*

LE Soleil commençoit desia à se
leuer, quand madame Flamette
incitee du doux chant des oyseaux
qui au poinct du iour chantoient
gayement sur les petitz arbres, se
leua du liect. Et ensemble fit leuer toutes les
autres Dames, & pareillement les trois ieunes
gentilzhommes avec lesquels elle descendit aux
champs, & s'en alla tout le petit pas à l'esbat
par vne grande plaine, marchant sur la rosee
iusques à ce que le Soleil fut vn peu haussé,
deuisant d'une chose & d'autre, avec sa compa-
gnie : mais sentant que les rays du Soleil se

commençoient à eschauffer, elle reprint son chemin vers le logis, auquel quand ilz furent arriuez, elle fit restaurer le peu de trauail qu'on auoit eu avecque vins excellens, & confitures de massepans, puis s'en allerent promener par le iardin, iusques à l'heure de disner, laquelle venue & toute chose appareillée par le maistre d'hostel, apres auoir dict quelque petit mot de chanson, chacun se mit volontiers à table, ainsi pleut à la Royne. Et quand ilz eurent dîné avec bon ordre & plaisir, ilz commencerent (pour ne desaccoustumer l'ordre encommencé) quelques petites dances, avec les instrumens & chansons. Apres lesquelles la Royne donna congé à vn chacun, iusques à ce que l'heure du dormir fust passée : desquelz les vns s'en allerent dormir : & les autres demourerent à foulas au beau iardin : mais vn peu apres que midy fut passé, chacun s'assembla à la mode accoustumee aupres de la belle fontaine, ainsi qu'il pleut à la Royne de commander, laquelle s'estant assise en son siege Royal, & iectant son regard vers Pamphile, luy commanda en souz-riant qu'il commençast à reciter les heureuses nouuelles, lequel tresuolontiers se disposa, & dist ainsi : Plusieurs nouuelles (gracieuses Dames) se presentent en mon entendement, pour donner commencement à vne si plaisante iournee, comme fera ceste-cy, desquelz il y en a vne qui me plaist plus que toutes les autres, par ce que vous pourrez comprendre par elle,

non seulement l'heureuse fin, pour laquelle nous commençons nostre iournee, mais aussi combien les forces d'amour sont pleines de grand bien, dignes d'estre reuerrees, & de toute autorité, lesquelles plusieurs sans sçauoir qu'ilz veulent dire, blasment & damnent à grand tort ce que si ie ne faux (vous croyant toutes amoureuses) vous deura plaire grandement.





NOUVELLE PREMIERE.

*En laquelle est demonstéré que souuentes fois
l'amour faict l'homme sage & vaillant.*

*Chymon deuint sage par estre amoureux, & con-
quist par force s'amyne Ephigene sur la mer,
dont il fut mis en prison à Rhodes, & vn
nommé Lysimaque l'en tira hors, avec lequel
il print de rechef Ephigene & Cassandre
au milieu de leurs nopces, & s'enfuyrent
avec elles en Candie, dont apres les auoir
espousees ilz furent rappelez en leurs mai-
sons.*



L y eut au Royaume de Cypre
(comme nous auons long temps a
leu és histoires anciennes des Cy-
priens) vn gentilhomme nommé
Aristippe, qui fut plus riche en
tous biens terriens que nul autre du pays, & si
la fortune ne l'eust faict dolent d'une chose, il

se pouuoit contenter plus que nul autre. C'est qu'entre ses enfans il auoit vn filz qui surpasseoit en grandeur & beauté de corsage, tous les autres ieunes enfans qu'on eust sceu voir : mais il estoit presque tout fol, & tel qu'il n'en falloit rien esperer de bon : le nom duquel estoit Gallois : toutesfois pource que iamais pour aucun trauail de precepteur, ne pour flatterie ou bterie que luy fist son pere, ou par industrie d'autrui, on ne luy auoit peu mettre en la teste lettres, ne aucune ciuilité, ains auecques vne voix grosse & difforme, auoit les gestes & façons de faire beaucoup plus conuenables à beste brute que à homme, il estoit appelé d'un chacun comme par mocquerie, Chymon : qui vaut autant à dire en leur langue, comme il faict aussi en la nostre, grosse beste. La perdition de la vie duquel le pere supportoit auec grand ennuy, & desia ayant du tout perdu l'esperance qu'on pouuoit auoir de luy, il commanda (pour n'auoir tousiours deuant ses yeux l'occasion de son dueil) qu'il s'en allast à vn sien village aux champs, & qu'il demourast là auec ces payfans. Ce qui fut fort agreable à Chymon, par ce que les façons de faire & conditions des grosses gens & ruraux luy plaisoient plus que celles de la ville. Estant doncques Chymon allé au village de son pere, & s'exercitant aux choses appartenantes à rusticité, il aduint vn iour, passée l'heure de midy, qu'en trauerfant d'un champ en autre, auecque vn

baston qu'il portoit sur son col, il entra en vn petit bois lequel estoit reputé en ce quartier là pour tresbeau, & pource que c'estoit au mois de May, il estoit tout fueillu. En cheminant par lequel il se trouua (comme fortune le guida) en vn preau enuironné de tresbeaux arbres, en l'un des coins duquel il y auoit vne fort belle fontaine, & froide : aupres de laquelle il veid sur l'herbe verde, vne tresbelle ieune fille, qui dormoit, vestue d'un tant deslié accoustrement qu'il ne cachoit quasi rien de sa blanche charneure, & estoit seulement couuerte depuis la ceinture en bas, d'une cotte picquée, tresblanche & desliee & à ses piedz dormoient pareillement deux femmes, & vn sien seruiteur. Ayant Chymon apperceu laquelle, il commença incontinent à la regarder tresententiuement, estant appuyé sur son baston, sans sonner vn seul mot, avec tresgrande admiration : comme si iamais au parauant il n'eust veu forme de femme. Si sentit lors qu'en son dur & rural entendement (auquel iamais au parauant n'estoit peu entrer, ne par doctrine, ne par enseignemens que on luy eust peu faire aucune impression d'honneste ciuilité) s'esueilla vn penser, qui luy dist en son gros & materiel esprit, que ceste fille estoit la plus belle chose que iamais vist homme vivant. Et lors il commença à distinguer les parties d'elle, en louant ses cheueux, qu'il estimoit estre d'or, le front, le nez, la bouche, la gorge & les bras, & sur tout son sein, qui com-

mençoit seulement à poindre : tellement que d'homme champestre, il devint soudainement iuge de beauté : desirant singulierement en soy-mesmes, de veoir les yeux qu'elle appesantie de fort sommeil, tenoit clos & fermez : & pour les veoir, il eut plusieurs fois volonté de l'esueiller : mais luy semblant plus belle sans comparaison, que toutes les autres femmes qu'il eust iamais veu, il doutoit que ce fust quelque Déesse. Et en cela il auoit encor tant de congnoissance qu'il iugeoit que les choses diuines doiuent estre plus reuerrees que les humaines : parquoy il se contenoit, attendant qu'elle s'esueillast de soy-mesmes. Et combien que le tarder luy sembla trop long, toutesfois surprins d'un plaisir non accoustumé il ne pouuoit partir de là. Aduint doncques qu'apres longue espace de temps, la ieune fille (qui auoit nom Ephigene) s'esueilla premier que personne des siens : & ayant leué la teste, & ouuert les yeux, veid Chymon tout au deuant d'elle, appuyé sur son baston, dont elle se esmerueilla fort, & luy dist, Chymon que vas tu cherchant à ceste heure par ce bois. Chymon (qui tant par sa contenance que par sa lourderie, & aussi par sa noblesse & richesse de son pere, estoit quasi congneu de tous ceux du pays) ne respondit aucune chose aux parolles d'Ephigene. Mais tout aussi tost qu'il veid ses yeux ouuers, il commença à les regarder fermement, luy estant aduis en soy-mesmes que d'iceux partoît vne

douceur qui le remplissoit d'un plaisir, non encor iamaïs esprouvé par luy. Ce que voyant la ieune fille, elle commença à avoir peur que ce regard ainfi ferme, n'incitast sa rusticité à deshonneur : parquoy ayant appelé ses femmes, & s'estant leuee debout, elle luy dist : Chymon à Dieu te command. A qui Chymon respondit lors : Je m'en yray avec toy. Et combien que la ieune fille refusast qu'il l'accompagnaist, ayant tousiours peur de luy, elle ne sceut toutesfois iamaïs tant faire qu'il abandonnast sa compagnie iusques à tant qu'il l'eust conduite à sa maison : & de là il s'en alla à celle de son pere, disant qu'il ne vouloit plus pour chose que ce fust retourner au village. Et combien que le pere en fust fort marry, & pareillement ses parens, toutesfois ilz le laisserent à la fin au logis, attendans de voir quelle occasion estoit celle qui luy auoit faict changer d'auis. Estant doncques entré à Chymon iusques au cœur (où iamaïs aucune doctrine n'estoit peu entrer) vne sagette d'amour pour la beauté d'Ephigene, il fit esmerueiller en peu de temps (paruenant d'un penser en autre son pere & ses parens, & tous ceux qui le cognoissoient :) car il requist premierement à son pere qu'il le fist habiller & mettre en ordre de mesmes ses autres freres : ce que le pere fit tresuolontiers : en apres frequentant avec les honnestes ieunes hommes, voyant les façons de faire propres à gentils-hommes, mesmement à ceux qui estoient amou-

reux, il apprint au commencement, & en bien peu de temps (avec grand estonnement d'un chacun) non seulement les premieres lettres, mais aussi devint treffcauant entre les scauans en philosophie : & apres cela, estant l'amour qu'il portoit à Ephigene occasion de tout cecy, il ne changea pas tant seulement sa voix grosse & rustique en douce & consonante, mais devint musicien parfaict, & bon ioueur d'instrumens : encores devint il tresexpert à bien piquer & voltiger cheuaux : & robuste en tous exercices de guerre, tant par mer que par terre, & pour le faire court (afin que ie ne m'amuse à raconter toutes les particularitez de ses vertus) iamais la quatriesme annee depuis qu'il devint amoureux, ne fut accomplie qu'il ne se fist congnoistre pour le plus honneste, le mieux conditionné & ayant plus de vertus & graces particulieres que nul autre gentilhomme qui fust en tout le royaume de Cypre. Que dirons nous doncques, mes gracieuses Dames de Chymon? Certes autre chose sinon que les vertus humaines du Ciel infuses dedans son gentil cœur, estoient par enuieuse fortune liees & enfermées de tres-forts liens en quelque petit coing de son cœur, lesquelz furent tous brisez & deffirez par Amour, comme trop plus puissant Seigneur que fortune, lequel comme excitateur des espritz endormis poussa de toute sa force icelles vertus hors des cruelles tenebres, où elles estoient offusquees, & les mit en claire lumiere : monf-

trant apertement de quel lieu il tire les espritz subiectz à foy, & où il les conduit avec ses traictz. Combien doncques que Chymon en ayment Ephigene se fouruoyast en aucunes choses, toutesfois Aristippe son pere considerant qu'Amour l'auoit faict de mouton retourner homme, non seulement le supportoit patiemment, mais aussi il luy suadoit de faire en cecy ce qui luy viendroit plus à plaisir : toutesfois Chymon (qui refusoit d'estre nommé Gallois, se souuenant qu'il auoit esté nommé Chymon par Ephigene) desirant mettre vne fin honneste à son desir, fit plusieurs fois prier Chipsee pere d'Ephigene qu'il luy pleust de la luy donner en mariage. A quoy Chipsee respondit tousiours qu'il l'auoit promise à vn gentilhomme Rhodien nommé Pasimonde, auquel il ne vouloit faillir de promesse. Parquoy estant venu le temps qui auoit esté accordé pour les nopces d'Ephigene, & que le mary l'auoit enuoyé querir, Chymon dist en foy-mesmes, il est temps maintenant que ie te monstre (ô mamye) combien ie t'ayme : ie suis deuenu homme pour toy : mais si ie te puis auoir vne fois, ie ne fais doute que ie ne deuienne plus glorieux que tous les Dieux viuans, & pour certain ie t'auray, ou ie mourray en la peine. Cecy dict, il pria certains ieunes gentilzhommes qui estoient ses amys, & fit armer secretement (sans que personne en sceust rien) vn vaisseau avec toutes choses necessaires pour faire la

guerre nauale, puis se mit en mer attendant le vaisseau sur lequel s'amyé Ephigene deuoit estre menee à Rhodes à son mary, laquelle apres plusieurs honneurs qui furent faictz par le pere d'elle aux parens du mary, entra avecques eux en mer : puis dresserent la prouë vers Rhodes, & s'en allerent leur voye : Chymon qui ne dormoit pas, les atteignit le iour ensuyuant avecque son vaisseau, & estant sur la prouë d'iceluy, il cria à haute voix à ceux qui estoient sur le vaisseau d'Ephigene : Demourez. abbaissez les voyles : ou vous deliberez d'estre prins & submergez en mer. Les ennemis de Chymon auoient les armes toutes tirees sur le tillac, & se preparoient pour se deffendre, pourquoy Chymon apres les parolles dictes ayant prins vn harpic de fer le iecta de grande force sur la poupe des Rhodiens qui gaignoient pays viftement, & la ioignit par force à la prouë de son vaisseau, & fier comme vn Lyon, sans attendre qu'il fust suiuy d'aucun des siens, faillit sur la nef des Rhodiens comme s'il n'eust faict conte d'eux tous, & esguillonné d'amour, se iecta l'espee au poing avec vne force esmerueillable entre les ennemis, & frappant ores l'vn, & tantost l'autre, les abbatoit comme brebis. Ce que voyant les Rhodiens & iectant les armes en terre, quasi tous d'une voix se rendirent ses prisonniers, ausquelz Chymon dist : Mes amys le desir de gaigner butin ne hayne que i'aye contre vous autres ne m'ont faict partir de

Cypre, pour vous venir assaillir en mer les armes au poing : mais ce qui m'a meu m'est tresgrande chose, si ie puis dire que ie l'aye conquise par armes, & à vous aysee à la me donner avec paix. C'est que ie demande Ephigene, que i'ayme sur toute autre chose, n'ayant peu auoir laquelle de son pere comme amye & en mariage. Amour m'a contraint de la conquerir de vous autres comme ennemy, & avec les armes en main. A ceste cause ie delibere de luy estre ce que luy deuoit estre vostre Pasimonde : pource donnez la moy & vous en allez en la bonne heure. Les ieunes gens plus contrains de force que de liberalité baillerent avec les larmes aux yeux, Ephigene à Chymon. Lequel voyant qu'elle ploroit, luy dist : Noble dame, ne te desconforte point, ie suis ton Chymon : qui ay plus merité de t'auoir pour la longue amitié que ie t'ay portee, que n'a Pasimonde : à qui tu n'as seulement esté que promise : puis la fit monter sur sa nef : & s'en retourna vers ses compagnons, sans prendre ne toucher aucune chose des Rhodiens, & les en laissa aller. Estant ainsi content Chymon plus que nul autre de la conquete d'une si chere proye, apres qu'il eust consommé quelque peu de temps pour rappaiser Ephigene qui pleuroit, il auisa avec ses compagnons qui ne feroit bon de s'en retourner pour lors en Cypre, parquoy tous d'une mesme deliberation drefferent la prouë de leur nef vers Candie, là

où chacun & mefmement Chymon penfa que tant pour les anciennes & nouvelles parentez, comme pour les grandes amytez qu'il y auoit, ilz pourroient demourer feurement avec Ephigene. Mais fortune laquelle auoit donné à Chymon avec grande ioye la conquête de la belle dame, changea foudainement (comme inconstante) en triste & amer pleur, la ioye inestimable du ieune amant par ce qu'il n'y auoit point encores quatre heures complètes depuis le congé donné par Chymon aux Rhodiens : que suruenant la nuit, laquelle (estant avec s'amy) il esperoit deuoir estre la plus heureuse que nul autre qu'il eust iamais sentie, il se leua vn temps tresdiuers & plein d'orage qui remplit le ciel de nuees, & la mer de vents tempestueux, dont il n'y auoit personne qui sceust veoir ce qu'il deuoit faire, ne où se mettre : ne encor qui se peust tenir sus la nef pour faire quelque deuoir. Combien cecy estoit desplaissant à Chymon il ne faut point demander : car il luy sembloit que les dieux luy eussent ottroyé son desir afin que le mourir luy fust plus ennuyeux, duquel sans iceluy desir il ne s'en feroit gueres foucié au parauant. Ses compagnons estoient pareillement tous dolens mais sur tout Ephigene, qui ne cessoit de plorer & se tourmenter merueilleusement, ayant peur de chacune vague qui donnoit contre la nef, & en ces doleances elle maudissoit tant qu'elle pouuoit l'amour de Chymon, & blasmoit

grandement sa hardieffe, affermant que telle fortune de tempeste n'estoit venuë d'autre chose, sinon pource que les dieux ne vouloient pas que luy, qui la vouloit auoir pour femme contre leur volonté, peust iouyr de son desir presumptueux : ains que la voyant premiere-ment mourir il mourut apres miserablement. Et avec telles & semblables lamentations, & encor plus grandes ne sçachans les mariniers que faire, & deuenant à toute heure le vent plus fort, arriuerent (sans sçauoir où ilz estoient) tout aupres de l'Isle de Rhodes, & ne congnoissans encores en estre si pres comme ilz estoient, se parforcerent tant qu'ilz peurent, pour leurs personnes de prendre terre en celle Isle, s'il estoit possible. A quoy fortune leur fut fauorable, & les poussa en vn petit goulphe de mer, auquel vn bien peu au parauant les Rhodiens, à qui Chymon auoit osté Ephigene, estoient arriuez avec leur nef : & ne s'apperceurent oncques d'estre entrez en icelle Isle, iusques à ce que se leuant l'aube du iour (qui leur rendit le ciel vn peu plus clair) ils se veirent à vn traict d'arc ou enuiron, pres de la nef que ils auoient laissée le iour de deuant, dequoy estant Chymon dolent outre mesure, craignant ce qui luy auint, il commanda qu'on s'efforçast tant qu'on pourroit de fortir de là, & que fortune les transportast apres, où il luy plairoit : car ils ne pouuoient estre en pire lieu que là. Parquoy on fit tresgrand effort d'en fortir, mais on

perdit temps, car le vent qui estoit trespuissant, pouffoit au contraire : tellement qu'ilz ne furent oncques non seulement fortir de ce petit goulphe : mais voulussent ilz, ou non, le vent les ietta en terre : là où aussi tost qu'ilz furent abordez, ilz furent recogneus des mariniers Rhodiens qui estoient descendus de leur nef, desquelz il y en eut quelqu'un qui courut soudainement à un petit village prochain de là, où les gentilzhommes Rhodiens estoient allez, & leur conta comment Chymon estoit là arriué comme eux par fortune de mer, & Ephigene avec luy sur la nef : dont eux tresioyeux d'une telle nouvelle, prindrent plusieurs hommes dudit village, & s'en coururent incontinent à la mer : où ilz empoignerent Chymon, qui estoit desia descendu en terre avec tous ses gens, en deliberation de s'enfuyr en quelque forest prochaine de là, avec toute sa compagnie, & pareillement Ephigene. Et furent tous emmenez audict village, & de là à Rhodes. Là où quand ilz furent arriuez, Pasimonde le mary (qui desia en auoit ouy les nouvelles) s'en alla sur l'heure plaindre au Senat, lequel ordonna à un gentilhomme Rhodien nommé Lisimacque, qui celle annee tenoit le souuerain magistrat des Rhodiens, d'aller incontinent bien armé, & accompagné prendre Chymon & sa compagnie : & les mener tous en prison, ce qui fut fait. Et en telle maniere le malheureux amoureux Chymon perdit s'amy qu'il auoit gaignee peu de temps

au parauant, sans auoir eu autre chose d'elle que quelque pauvre baiser. Quand à Ephigene elle fut receuë de plusieurs gentilzhommes & femmes de Rhodes, & reconfortee, tant du dueil qu'elle auoit eu de sa prinse que de l'ennuy & peine du tourment de la mer : & demoura chez icelles gentilzfemmes iusques au iour déterminé pour faire les nopces : toutesfois la vie fut sauuee à Chymon & à ses compagnons : à la requeste des ieunes gentilzhommes Rodiens, ausquelz Chymon l'auoit sauuee le iour precedent. Et combien que Pasimonde sollicitast tant de les faire mourir, ilz furent seulement condamnez à prison perpetuelle, en laquelle, (comme on peut croire) ilz demouroient tristes & dolents, & sans esperance de iamais en sortir. Mais ce pendant que Pasimonde sollicitoit tant qu'il pouuoit les preparatifs des prochaines nopces, la fortune se repentant quasi de la foudaine iniure faicte à Chymon, mit en auant vn nouuel accident pour son salut. Ce fut que Pasimonde auoit vn frere moindre d'aage que luy, mais non de vertu, qui se nommoit Hormisde, lequel auoit esté longuement en parolles de prendre à femme vne belle ieune gentilsfemme de Rhodes nommee Cassandre, laquelle Lisimacque aymoît grandement, & s'estoit le mariage plusieurs fois interrompu par diuers accidens. Or voyant Pasimonde qu'il auoit à celebrer ses nopces avec vne tresgrande chere, il pensa que ce seroit tresbien fait si en

ceste mesme feste, & pour ne rentrer plus en des-
pence de faire festins, il pouuoit faire que son
frere Hormisde espoufast Cassandre : au moyen
dequoy il remit les propos fus, avec les parens
de la fille & le conduisit à effect, & conclurent
ensemble, que le mesme iour que Pasimonde
espouferoit sa femme, Hormisde espouferoit pa-
reillement la sienne. Ce qu'attendant Lifimaque,
il en fut desplaissant outre mesure, par ce qu'il
se voyoit indubitablement priué de l'esperance
qu'il auoit d'espouser Cassandre si Hormisde la
prenoît : toutesfois comme sage qu'il estoit il
dissimuloit son ennemy, & commença à penser
par quel moyen il pourroit empescher que cecy
ne vint à effect, mais il n'en veit point de pos-
sible, sinon de la raur. Ce qu'il luy sembla aisé
à faire pour l'office qu'il auoit, mais aussi il le
reputoit plus deshonesté que s'il ne l'eust point
eu. Ce nonobstant apres longue deliberation,
l'honneur ceda à la mort : & conclud en son
entendement de la raur quoy qu'il en deust
auenir. Et pensant à la compagnie qu'il luy
seroit necessaire pour le faire, & à l'ordre qu'il
auroit à tenir, il se va souuenir de Chymon
qu'il tenoit prisonnier avec ces compagnons, &
imagina qu'il ne sauroit auoir vn meilleur ne
plus fidelle compagnon en ceste affaire que
Chymon. Parquoy la nuict ensuyuant il le feit
secretement venir en sa chambre : & luy com-
mença à parler de ceste maniere. Chymon tout
ainsi comme les dieux donnent liberallement,

& en grande abondance les choses aux hommes, tout ainſi ſcauent ilz treſſagement eſprouuer leur vertu, & ceux qu'il trouuent fermes & conſtants à tous les accidens qui peuuent ſuruenir, ilz les font dignes (comme vaillans) de plus grans merites : or ont ilz voulu auoir plus certaine eſperance de ta vertu, que de celle que tu euſſes peu monſtrer ſans ſortir de la maiſon de ton pere : lequel ie cognoy trefabondant en richelles : car ilz t'ont premierement r'amené (comme i'ay entendu) moyennent les poygnantes ſollicitudes d'amour, d'animal incenſé à deuenir homme, apres par vne dure fortune, & preſentement par vne priſon ennuyeuſe, ilz veulent veoir ſi ton courage ſe change point de ce qu'il eſtoit nagueres : quand tu fuſ (par bien peu de temps) content de la proye que tu auois gaignee : parquoy ſi le courage t'eſt tel qu'il a eſté, les dieux ne te donnerent oncques aucune choſe ſi agreable comme fera celle qu'ilz preparent te donner maintenant : laquelle (aſin que tu reprenes tes forces accouſtumees, & que tu deuiennes courageux) ie delibere de te declarer. C'eſt que Paſimonde ioyeux de ton malheur, & diligent procureur de ta mort, ſe haſte tant qu'il peut de celebrer les nopces de t'amie, aſin qu'en icelle il iouyſſe de la proye que fortune, quand elle t'a voulu rire t'auoit premierement donnee : & ſoudainement quand elle ſ'eſt vouluë monſtrer courroucee, t'a oſtee. Or combien il t'en doit deſplaire (au moins ſi


tu aymes ainfi comme ie croy) ie le cognoy par moy-mefmes, à qui Hormifde fon frere prepare faire pareille iniure en vn mefme iour m'oftant Caffandre que i'ayme fur toute autre chofe. Et pour euter vne telle iniure, & vn fi grand ennuy, ie ne voy point que fortune nous ait laiffé autre voye ouuerte, finon la vertu de nos courages : & la force de nos mains dextres : efquelles il nous conuient auoir les armes : & nous faire faire voye à toy au deuxième rauiffement, & à moy au premier de nos deux amies. Parquoy fi tu as grand defir de recouurer, ie ne vueil feulement ta liberté (car ie croy que tu t'en foucies peu fans t'amy) mais t'amy auffi, & que tu me vueille fuyure à mon entreprife, les dieux te l'ont mise entre les mains. Ces parolles firent reuenir tout le cœur à Chymon : & fans trop prendre de defpit pour faire la refponce, il dift : Lifimacque tu ne faurois auoir en cefte affaire vn plus fort ne plus fidelle compagnon que moy : aumoins s'il m'en doit auenir ce que tu me dis : & par ainfi commande moy ce qu'il te semblera que ie deuray faire, & tu verras que l'excuteray courageufement. A qui Lifimacque dift : D'aujourd'huy en trois iours les nouuelles mariees doyuent faire leurs nopces en la maifon de leurs maris : en laquelle toy & tes compagnons & moy (auec quelques vns des miens en qui ie me fie fort) entrerons quand la nuit fera venuë, & les ayans prinſes au milieu du feſtin nous les

menerons en vne nef que i'ay desia fait aprestre
secretement : & tuerons tous ceux qui presu-
meront de nous empescher. Cest ordre pleut
grandement à Chymon, qui demoura en prison
sans en dire mot à personne des siens iusques
au temps limité. Quand le iour des nopces fut
venu, le triumphe fut grand & magnifique, &
n'y eut coing en la maison des deux freres qui
ne fust remply de ioye. Lisimacque apres auoir
donné ordre à tout ce qui estoit necessaire, &
qu'il veit son heure venuë separa en trois par-
ties Chymon & ses compagnons, & pareillement
ses amis : tous armez sous leurs habillemens,
les ayans premierement animez par plusieurs
parolles à son entreprinse, dont il enuoya vne
partie secretement au port afin que personne
ne les eust peu empescher de gagner le nauire
quand il en seroit besoin : & s'en venant avec
les deux autres parties à la maison de Pasi-
monde il en laissa vne à la porte à ce que per-
sonne de ceux qui estoient dedans ne les peust
enfermer ou empescher qu'ilz ne sortissent : &
monta avec Chymon & le demourant de leur
compagnie en haut par l'escalier : puis quand
ilz furent entrez en la salle, où les nouuelles
espousees avec plusieurs autres dames s'estoient
desia assises par ordre pour souper, ilz s'auance-
rent & ietterent les tables par terre prenant
chacun s'amy, lesquelles ilz mirent entre les
mains de leurs compagnons : & commanderent
qu'on les menast sur l'heure à la nef qui estoit

preparee. Les mariees commencerent à plorer & crier, aussi firent les autres femmes & les seruiteurs : dont toute la maison fut soudainement remplie de bruit & de criz : mais Chymon, & Lifimacque avec leurs compagnons ayans desgaigné leurs espees, se firent faire sans contradiction place par vn chacun : & vindrent à gagner l'escallier : & comme ilz descendaient, Pasimonde se trouua au deuant d'eux, qui couroit, avec vn gros baston en la main, veoir quel bruit c'estoit, lequel fut frappé si courageusement de Chymon sur la teste qu'il la luy fendit à moitié & le fit tomber mort à ses piedz : au secours duquel courant Hormisde son frere, il fut pareillement tué d'vn des coups de Chymon : & quelques autres qui se voulurent aprocher des compagnons de Lifimacque & de Chymon furent par eux blecez & repoussez. Laissans donques la maison pleine de sang, de bruit, de pleurs & de tristesse, ilz se ferrent ensemble, & sans aucun empeschement s'en vindrent avec leurs proye à la nef, sur laquelle ayans mis les deux dames, & estant eux & leurs compagnons entrez dedans, voyans que le riuage de la mer estait desia plein de gens armez qui venoient à la recousse des dames ilz donnerent des rames en l'eau & s'en allerent ioyeusement faire leurs affaires en Candie. Là où estans arriuez ilz furent les biens receuz de plusieurs leurs amys & parens, & apres auoir espousé leurs amies & fait grande chere, ilz

iouyrent à leur plaisir de leur proye. Pour raison dequoy il y eut par vn longs temps apres de grans troubles en Cypres & en Rhodes. A la fin par le moyen des parens & amys tant d'un costé que d'autre qui s'en empescherent, on trouua moyen qu'apres quelque bannissement, Chymon s'en retourna ioyeusement avec Ephigene en Cypre, & Lifimacque pareillement avec Cassandre à Rhodes, viuans chacun en son pays avec s'amie longuement, & en grand contentement.





NOUVELLE DEUXIESME.

*Pour denoter la fermeté d'un vray amour,
& comment fortune abaisse quelque fois les
hommes pour en fin les releuer à plus haut
estat.*

*Constance ayment Martuccio Gomito, oyant
qu'il estoit mort, se meit seule par désespoir
en vne barque qui fut transportee du vent à
Suse en Barbarie & de là s'en alla à Tunes,
où elle le trouua encores viuant, auquel elle
se descouurit, & luy estant en grande autorité
du conseil priué du Roy espousa ladite Con-
stance, & s'en retourna riche avec elle en
l'Isle de Lipare.*



VOYANT la Royne que la nou-
uelle de Pamphile estoit acheuee,
laquelle elle loua grandement,
elle commanda à ma-dame Emilie
qu'elle fuyuist à dire la fienne,
laquelle commença ainsi. Chacun se doit à bon

droit delecter des choses auxquelles on voit
suyure la recompense selon les affections,
& pource que aymer merite au long aller
plustost plaisir qu'affection, ie obeirey à la
Royne avec trop plus grand plaisir en parlant
de la presente matiere, que ie ne fey hier au
Roy en parlant de la precedente.

Vous deuez fauoir (mes delicates dames)
qu'il y a aupres de Sicile vne petite Isle qu'on
appelle Lipare¹ : en laquelle n'agueres y eut
vne bien belle ieune fille nommee Constance,
nee de fort honnestes gens, d'icelle mesme
Isle : de laquelle fille deuint amoureux vn
ieune homme de ladite Isle, qui auoit nom
Martuccio Gomito fort gracieux bien condi-
tionné, & sauant en son art : laquelle fille s'em-
brafa semblablement de luy de si bonne sorte
qu'elle n'auoit nul bien, sinon quand elle le
voioit. Et desirant Martuccio de l'auoir en
mariage, il la fit demander à son pere : lequel
respondit qu'il estoit trop pauvre : & que pour
cela il ne la luy donneroit point. Martuccio
tres depit de se voir refusé par pauvreté : arma
vn petit vaisseau avec certains ses amis & pa-
rens, & fit serment de ne retourner iamais à
Lipare qu'il ne fust riche. Parquoy partant de
là, il commença en faisant le mestier de cor-
saire à costoyer la Barbarie : en pillant & des-
robant tout ce qu'il trouuoit moins fort que
foy : en quoy fortune luy fut fort fauorable,
s'il eust sceu bien conduire son bon heur : mais

ne se contentant luy & ses compagnons d'estre deuenuz en peu de temps fort riches, il auint que cerchans de l'estre dauantage, ilz furent tous pris par certains vaisseaux de Sarrazins : & tout ce qu'ilz auoient pillé apres s'estre toutesfois defendus longuement, encor y en eut il la plus grand part de tuez par lesditz Sarrazins. Lesquelz apres qu'ilz eurent mis à fons son vaisseau, le menerent à Tunes², où il fut mis en prison, & gardé en grande misere. La nouvelle vint à Lipare, non pas d'un seul, mais de plusieurs, que tous ceux qui estoient partis sus le petit vaisseau avec Martuccio auoient esté noyez. Quoy oyant la ieune fille (qui auoit esté desplaifante outre mesure de son partement) plora longuement avec les autres : & delibera en soy-mesmes de ne vouloir plus viure : toutefois ne pouuant souffrir son cœur de se tuer de soy-mesme par quelque violence, elle pensa de donner nouvelle necessité à sa mort : parquoy sortant un iour secrettement de la maison de son pere, & s'en allant au port, elle trouua de fortune vne petite barque de pescheurs separee quelque peu des autres nauires, laquelle (pource que les maistres d'icelles n'en faisoient que de descendre à ceste heure là) elle trouua fournie de mast, de voile, & de rames dont elle entra incontinent dedans : & se iettant avec les rames quelque peu auant en mer, sachant un petit nauiguer (comme fauent generalement toutes les femmes de ceste

Isle) elle fit voile, & meit à bas les rames & le timon : & s'abandonna du tout à la puissance du vent : imaginant qu'il deuoit auenir par necessité : ou que le vent renuerferoit la barque non chargée & sans gouuerneur : ou qu'il la feroit fraper contre quelque rocher & la romproit : au moyen dequoy elle ne fauroit eschaper, quand bien elle voudroit : ains faudroit necessairement qu'elle se noyast. Et en ceste deliberation elle s'enuelopa la teste en vn manteau, & s'en alla coucher en plorant au fonds de la barque : mais il en auint autrement qu'elle n'auoit pensé : par ce que le vent de bise tiroit & estoit lors fort doux sans qu'il fist quasi point de mer : si conduisit la barque de forte qu'il la porta depuis la nuict qu'elle estoit montee dessus iusques au lendemain sur le vespre, bien cent mile au dessus de Thunes : en vne plage prochaine d'une ville apellee Suse³. La ieune fille ne sentoit point si elle estoit en terre ou en mer, comme celle qui pour aucun accident n'auoit leué la teste n'y n'entendoit la leuer iamais. Or y auoit-il de fortune, lors que la barque frapa sur la riue, vne pauvre femmette à la marine qui ostoit du Soleil les filetz de ses Pescheurs, laquelle voyant la barque s'esmerueilla fort de ce qu'on l'auoit laissée à plaine voile donner en terre : & pensant que les pescheurs dormissent en icelle, elle alla dedans où elle ne veit personne que ceste ieune fille qu'elle apella par plusieurs

fois par ce que elle dormoit fort : à la fin elle l'esueilla. Et cognoissant à son habit qu'elle estoit Chrestienne, luy demanda en parlant latin, comment, il estoit possible qu'elle fust arriuee là ainsi seulette en ceste barque. La ieune fille oyant le langage latin, doubta que quelque autre vent l'eust ramenee paraduventure à Lipare : & se leuant soudainement, elle regarda tout autour d'elle : mais ne cognoissant le païs, & se voyant en terre, elle demanda à la bonne femme où elle estoit. Qui luy respondit : Ma fille tu es pres de Suse en Barbarie. Ce qu'oyant la fille dolente de ce que Dieu ne luy auoit voulu enuoyer la mort craignant de receuoir quelque deshonneur : & ne sachant que faire, s'asseit au pied de la barque, & commença à plorer. La bonne femme voyant cecy en eut pitié : & la pria tant quelle la mena en sa petite cahute de maison, où elle la flata si bien qu'elle luy dist comment elle estoit arriuee là. Parquoy cognoissant la bonne femme qu'elle estoit encor à ieun, luy donna de son pain dur avec quelque poisson, & de l'eau : & la pria tant qu'elle mangea vn peu. Constance luy demanda apres (voyant qu'elle parloit ainsi latin) qui elle estoit. A qui la vieille dist qu'elle estoit de Trapani⁴, & se nommoit Chereprise qui seruoit en ce païs certains pescheurs chrestiens. La ieune fille (combien qu'elle fust grandement dolente) si est-ce qu'oyant nommer Chereprise,

print en soy mesmes bonne augure d'auoir ouy ce nom sans sauoir pourtant qu'elle occasion la mouuoit à cecy, & commença à esperer sans sauoir quoy : & à cesser quelque peu de desirer la mort comme elle faisoit au parauant : & sans luy declarer autrement qu'elle estoit, ne de quel païs, pria chèrement la bonne femme que pour l'amour de Dieu elle eust pitié de sa ieunesse : & qu'elle luy donnast quelque conseil, par lequel elle peust euitier qu'il ne luy fust fait iniure. Chereprise oyant ceste-cy, comme bonne femme qu'elle estoit, la laissa en sa cahnette, & s'en alla soudainement ferrer ses fillez, puis s'en retourna à elle, & apres l'auoir couuerte & toute enuelopee de son manteau mesme, la mena à Suse quand & foy, où quand elles furent arriuees, la bonne femme luy dist : Constance ie te meneray en la maison d'une tresbonne dame Sarrazine : à laquelle ie fay bien souuent seruice en ce qu'elle me commande : elle est femme ancienne & charitable : ie te recommanderay à elle le plus que ie pourray, & suis trescertaine qu'elle te receura volontiers, & te traitera comme si tu estois sa fille : aussi de ton costé, quand tu seras avec elle, tu te parforceras tant qu'il te sera possible, en la seruant bien, d'acquiescer sa grace iusques à tant que nostre Seigneur t'enuoye meilleure fortune, & comme elle le dist, ainsi le fit elle. La Dame qui estoit desia vieille, apres qu'elle eut ouy Chereprise, regarda la ieune fille au

visage, & commença à plorer : & la prenant luy baïsa le front, & apres la mena par la main en la maison où elle demouroit avec quelques autres femmes sans aucun homme, qui toutes besongnoient de leurs mains en diuerses choses de foye, de cuir, & de palmes, & plusieurs autres ouurages : desquelz Constance en peu de iours en aprint quelque'un, & commença à besongner avec elles : & vint tant en la bonne grace & amour de la bonne dame & de toutes les autres que c'estoit merueilles : encor aprint elle en peu de temps par les enseignemens d'elles leur langage. Demourant donc la ieune fille à Suse, qui auoit esté desia ploreë pour perdue & morte en la maison de son pere, il aduint qu'estant Roy de Thunes vn qui se nommoit Mariabdele⁵ : il y eut vn ieune seigneur de grand lignage & fort puissant : lequel estoit en Grenade, qui disoit que le Royaume de Thunes luy appartenoit : & pour ceste cause il assembla vne puissante armee, & s'en vint assaillir le Roy pour l'en chasser. Lesquelles choses venues aux oreilles de Martuccio Gomitto, qui fauoit fort bien parler la Langue Barbarefque, & oyant dire que le Roy faisoit vn merueilleux effort pour sa defense, il dist à vn de ceux qui gardoient luy & ses compagnons. Si ie pouuois parler au Roy, ie me fais bien fort que ie luy donnerois conseil par lequel il auroit bien tost gaigné la bataille. La garde dist ces parolles à son maistre : lequel

les alla incontinent rapporter au Roy, qui fut cause que le Roy commanda qu'on luy amenaſt Martuccio : & luy demanda quel conſeil eſtoit le ſien : lequel luy reſpondit ainſi : Sire, ſi au temps que i'ay frequenté vos païs, i'ay bien prins garde à la façon de faire que vous tenez en voz batailles, il me ſemble que vous les faites plus avec archers qu'avec autres gens : & par-ainſi ſ'il eſtoit poſſible de trouver le moyen que les fleches faillirent à voz ennemis, & que les voſtres en euſſent en abondance, ie penſe que vous gagnerez la bataille. A qui le Roy diſt : Sans doute ſi cecy ſe pouvoit faire, ie penſerois bien eſtre vainqueur. Lors Martuccio luy diſt : Sire, ſi vous voulez, il ſe pourra faire, & oyez comment : Il faut que vous faciez faire les cordes des arcs de voz Archers plus deliees que celles dont on a accouſtumé d'uſer : & apres il faut faire les fleſches de forte que les coches ne poiſſent ſervir ſinon à ces cordes deliees : mais il faut que cecy ſoit fait ſi ſecretement que voſtre ennemy ne le ſache : car il y pouruoiroit : Et la raiſon pourquoy ie le dy eſt, qu'apres que les Archers de voſtre ennemy auront, tiré toutes leurs fleſches, & les voſtres les leurs, vous devez entendre qu'il faudra par neceſſité, que voz ennemis ramalſſent les fleſches qu'on leur aura tiré, pour retirer contre les voſtres, tant que la bataille durera : & autant en feront les voſtres, des leurs : mais voz ennemis feront

bien trompez : car ilz ne se pourront seruir de celles de voz gens, d'autant que les petites coches ne receurent point les grosses cordes : ce qui aduiendra tout au contraires aux vostres, de celles de voz ennemis. Parce que la corde deliée receura trespas la fiesche qui aura la coche grande, & par ainsi les vostres en auront trespas habondance, & les autres neccésité. Ce conseil pleust grandement au Roy, comme sage prince qu'il estoit, & le fuyant entierement il trouua par cela qu'il auoit vaincu son ennemy, dont Martuccio vint grandement en sa grace, & par consequent riche, & en grande autorité. Le bruit de toutes ces choses courut par tout le païs, tellement qu'il vint iusques aux oreilles de Constance que Martuccio Gomitto (qu'elle auoit des long temps pensé mort) estoit en vie. Parquoy l'amour qu'elle luy portoit, qui estoit desia presque estainte dedans son cœur, se r'aluma avec soudaine flamme, augmentant laquelle, elle refuseita l'esperance du tout morte. Parquoy elle conta tout son affaire à la bonne dame avec qui elle demouroit, & luy dist qu'elle desiroit fort d'aller à Thunes, à fin de faouler les yeux de ce dont les aureilles les auoient par leur ouye faitz desireux. La bonne dame loua grandement son desir, & comme si elle eust esté sa mere, se mit avec elle sur vne barque, & s'en alla à Thunes, où elle fut receuë, & Constance pareillement fort honorablement en la maison d'une

fienne parente. Et ayant mené avec soy Che-
reprise, elle l'enuoya voir quelles nouvelles
elle pourroit trouuer de Martuccio. Laquelle
apres auoir entendu qu'il estoit en vie, & en
grande autorité, luy en vint faire le raport.
Lors la bonne gentillefemme voulant estre celle
qui auertiroit Martuccio que s'amie Constance
estoit venuë iusques là pour le trouuer : s'en alla
vn iour au lieu où il estoit, & luy dist. Martuccio,
il est arriué en ma maison vn tien seruiteur
qui vient de Lipare qui voudroit bien parler
secretement à toy : & pour ne m'en fier à
autrui moymesmes (comme il m'en a prié) te
le suis bien voulu venir dire. Martuccio la
remercia : & s'en alla apres elle en sa maison.
Quand la ieune fille le vit il ne s'en faut gueres
qu'elle ne mourut de ioye, & ne se pouuant
contenir, luy falta soudainement au col, les
bras ouuers en l'embrassant : & pour la com-
passion des malheurs qu'elle auoit euz & aussi
pour la presente ioye (sans pouuoir dire vn
seul mot) commença à plorer chaudement.
Martuccio voyant s'amie s'en esmerueillit gran-
dement, & fut quelque peu sans sauoir que
dire, puis en soupirant dist : Helas m'amie
Constance, es tu maintenant en vie ? Il y a desia
long temps que i'oy dire que tu estois perdue,
ne iamais depuis on n'a ouy nouvelles de toy
en nostre maison. Et, cecy dict, en plorant
tendrement il l'embrassa & la baïsa. Constance
luy conta toutes ses fortunes, & l'honneur

qu'elle auoit receu de la gentil-femme avec qui elle auoit demouré. Et apres plusieurs deuis qu'ilz eurent ensemble, Martuccio se partit d'avec elle, & s'en alla deuers le Roy son maistre, à qui il conta tout. C'est à sauoir toutes ses fortunes & celles de s'amie, disant outre qu'il deliberoit, avec sa permission toutesfois de l'espouser selon nostre loy. Le Roy s'esmerueillla fort de toutes ces choses, & ayant fait venir la fille, & entendu d'elle qu'il estoit ainsi comme Martuccio le luy auoit conté, il dist. En bonne foy m'amie tu l'as bien merité pour mary. Parquoy apres qu'il eut fait apporter de tresgrans & riches presens, il luy en donna vne partie, & l'autre à Martuccio leur donnant congé de faire entr'eux ce qui plus leur feroit agreable. Martuccio fit grand honneur à la gentillefemme avec qui Constance auoit demouré, & l'ayant remerciee de ce qu'elle auoit fait pour elle, & luy fit des presens conuenables à elle, puis quand il eut prins congé, non sans les larmes de Constance, la commanda à Dieu. Et depuis avec le congé du Roy, ilz monterent sur vne petite barque, & Chereprise avec eux, & ayant bon vent retournerent à Lipare, où la chere fut si grande, qu'on ne la pourroit iamais dire. Et lors Martuccio l'espousa qui fit de belles & grandes nopces, iouyssans par apres ensemblément de leur amour en paix & en repos.



NOUVELLE TROISIÈME.

*Qui monstres encores les puissances de fortune
& d'amour.*

Pierre Boccamasse s'ensuyant avec vne fille qu'il aymoit, nommee Angeline rencontra des brigans en chemin, dont la fille s'enfuit par vne forest, d'où elle fut menee en vn chasteau & Pierre prins par les brigans, des mains desquelz il echappa depuis, & apres arriua par accident audit chasteau où estoit Angeline, qu'il espousa : & puis s'en retournerent ensemble à Rome.




L n'y eut personne en la compagnie qui ne louast la nouuelle de ma-Dame Emilie, & cognoissant la Royne qu'elle estoit acheuee se tourna vers ma-Dame Elisse, & luy commanda qu'elle continuaist. Laquelle desirant d'obeir commença ainsi : Gracieuses Dames il

me vient de souuenir d'une mauuaise nuit qu'eurent deux ieunes personnes encore peu discrettes : mais pource qu'apres ilz eurent plusieurs plaifantes iournees, ie suis contente puis qu'elle vient à propos de la vous raconter.

En la cité de Rome, qui fut au temps passé Chef du monde, comme elle en est auourd'huy la queuë, y eut nagueres vn ieune homme nommé Pierre Boccamasse, de famille entre celles de Rome fort honorable : lequel deuint amoureux d'une tresbelle & amiable ieune fille nommee Angeline : fille d'un qui se nommoit Gigliuoffe Saulle, homme de basse condition : mais fort estimé des Romains, & en l'aymant il sceut tant faire que la ieune fille commença à ne l'aimer moins qu'il l'aymoit. Parquoy se sentant contraint d'amour feruente, & ne luy estant aduis qu'il deust plus souffrir la peine dure que luy donnoit le desir qu'il auoit d'en iouyr, il la demanda en mariage. Ce que sachans ses parens, ilz allerent tous parler à luy, le blasmans fort, & de ce qu'il vouloit faire, & d'autre par firent dire au pere de la fille, qu'il ne prestast l'aureille en aucune maniere aux parolles de Pierre, par ce que s'il le faisoit ilz ne le tiendroient iamais pour amy ne pour parent. Pierre voyant qu'on luy empeschoit la voye, par laquelle (& non autre) il pensoit paruenir à son desir, voulut mourir de dueil & si le pere d'elle l'eust consenty, il l'eust espousee, contre le vouloir de tous ses parens,

toutesfois il se mit en la fantaisie de faire tant (s'il plaisoit à la fille) que la chose sortiroit à effect. Et ayant sceu par personne interposee qu'elle en estoit trescontente, il conclut avec elle de s'en fuir de Rome. Aquoy ayans donné ordre, Pierre se leua vn matin de fort bonne heure, & monterent ensemble à cheual, & prindrent leur chemin vers Alaigne, où Pierre auoit quelques amis, ausquelz il se fioit fort, & allans ainsi par pais, n'aians loysir de faire les nopces (par ce qu'ilz craignoient d'estre fuyuis) deuisans ensemble de leurs amours ilz se baisoient quelquefois l'un l'autre. Or auint que quand ilz furent à quatre lieuës loin de Rome, Pierre ne sachant gueres bien le chemin, au lieu de prendre à main droite print à gauche, tellement qu'ilz ne cheuaucherent gueres plus d'une lieuë qu'ilz se virent pres d'un petit Chasteau : duquel ayans esté aperceuz il fortit incontinent douze Rustres, lesquelz veuz par Angeline (mais non plustost qu'il furent pres de Pierre & d'elle) elle s'escria pour Dieu mon amy sauuons nous : car nous sommes assailliz. Pierre tourna lors son cheual le mieux qu'il peut vers vne fort grande forest : & luy ferrans les esperons aux flancs se tenoit à l'arçon, le cheual se sentant picqué l'emportoit en courant par la forest, & Pierre qui regardoit plus au visage d'elle qu'au chemin, & ne s'estoit si tost aperceu comme elle des gallans, fut (ce pendant qu'il alloit regardant de quel costé ilz

venoient, & ne les voyant encores) surprins d'eux, & empoigné. Et l'ayant fait descendre du cheual : & demandé qu'il estoit, & luy le leur ayant dit, ilz commencerent à conseiller entr'eux & dire : Cestuy-cy est des amis de noz ennemis qu'en deuons nous faire autre chose, sinon de le despouiller & le pendre par despit des Vrfins¹ à vn de ces chesnes ? A quoy s'estans accordez, ilz commenderent à Pierre qu'il se despouillast, quoy faisant & pouruoyant desia son malheur aduint qu'une embusche de bien vingt cinq bons compagnons, leur coururent sus, en criant tue tue tue, lesquels ainsi surprins abandonnerent Pierre & se mirent en deffence : mais voyans qu'ilz estoient moins de gens que ceux qui les assailloient, ilz commencerent à fuir, & ceux cy à les suyure. Ce que voyant Pierre il se reuestit incontinent & monta sur son cheual : puis commença tant qu'il peut à fuyr par la voye où il auoit veu que s'amie s'en estoit fuye. Mais ne voyant voye ne sentier par la forest, & ne cognoissant aucun train de cheual, & encores qu'il luy semblast bien estre en seureté & hors des mains de ceux qui l'auoient prins, & aussi des autres qui les auoient assaillis, ne retrouvant point toutesfois en s'amie, il fut plus dolent qu'homme du monde, & commença à plorer, & à aller ores icy, & tantost là, en l'appellant par la forest. Mais personne ne luy respondoit. Toutesfois, luy n'osant tourner en



arriere, cheminant tousiours plus outre, & ne fauoit où il deuoit arriuer. Et d'autre part ayant ouy parler des bestes fauages qui ont accoustumé d'estre és forests, il auoit peur en vn instant de soy-mesmes, & de s'amie, qui luy sembloit veoir à toute heure estre estranglee de quelque ours, ou de quelque loup. Ce pauvre Pierre s'en alla ainsi mal fortuné tout au long du iour par ceste forest en criant & en appellant, & quelque fois allant en arriere cuidant aller en auant, & estoit desia si foible, tant pour le crier, plorer, & la peur qu'il auoit, comme pour le long temps qu'il auoit esté sans manger, qu'il ne pouuoit plus. Parquoy voyant que la nuit estoit venuë, & ne sachant quel autre conseil prendre, il descendit de son cheual, & le lia à vn gros cheſne qu'il trouua, sur lequel il monta de peur d'estre deuoré la nuit de quelque beste fauage, & peu de temps apres s'estant leuee la Lune, & le temps esclaircy n'ayant eu toutesfois la hardiesse de s'endormir de peur de cheoir (combien que s'il en eust eu bon loysir le dueil & le souuenir qu'il auoit de s'amie ne l'eussent laissé dormir) il fut contraint de veiller toute ceste nuit en souſpirant, & plorant & maudissant en soy-mesmes sa fortune. La ieune fille (comme nous auons dit cy-deuant) ne sachant où aller sinon ainsi qu'il plaisoit plus à son cheual la porter, se meit si auant en la forest qu'elle ne pouuoit voir le lieu par où elle y estoit entree. Parquoy

ne plus ne moins que Pierre auoit fait, elle s'en alla tout au long du iour tournoyant par ce lieu sauuage, ores attendant & maintenant allant plorant, appellant, & tantost plaignant son malheur. A la fin voyant que Pierre ne venoit point, elle se meit en vn petit sentier qu'elle rencontra de fortune, estant desia presque nuit, lequel son cheual suiuit tant qu'apres qu'elle eust fait vn peu plus d'une lieuë, elle veit de loing au deuant de soy vne maisonnette où elle s'en alla le plustost qu'elle peut, & là elle trouua vn bon homme fort vieil avec sa femme qui estoit pareillement vieille, lesquels quand ilz la virent ainsi seule, luy dirent : O ma fille que vas tu à ceste heure faisant ainsi seule par ces quartiers. La fille en plorant respondit que elle auoit perdu sa compagnie par la forest & demanda combien elle estoit pres d'Alaigne. A laquelle le bon homme respondit : Ma fille cecy n'est pas le chemin pour aller à Alaigne, il y a plus de fix lieuës d'icy. Lors elle demanda & où est-ce doncques qu'il y a icy aupres quelques maisons pour loger ? Respondit le bon homme, il n'y en a point de si pres que tu y seusses aller de iour. La fille dist à l'heure : vous plaira-il doncques puis que ie ne puis aller ailleurs, me retenir icy pour l'amour de Dieu celle nuit ? Le bon homme respondit : Belle fille il nous plaist tresbien que tu demeures icy avec nous, pour ce soir. Mais toutesfois nous te voulons bien

aduertir que par ces bois il va & vient de iour & de nuict tout plein de mauuaife compagnies, d'amis & d'ennemis, qui nous font plusieurs fois de grand desplaifirs, & de grans dommages. Et fi par malheur (toy eftant icy) il en venoit quelqu'un te voyant belle & ieune comme tu es, ilz te feroient desplaifir & honte, & nous ne te pourrions ayder. Nous t'en auons bien voulu aduertir, à fin que puis apres (s'il aduenoit) tu ne te sceuffes plaindre de nous. La fille voyant que l'heure eftoit tarde, encores que les parolles du vieillard l'espouuentaffent, dist. S'il plaift à Dieu, il nous gardera vous & moy de ce malheur, lequel quand bien il m'auindroit, fi est-ce beaucoup moins de mal, d'estre à la mercy des hommes que d'estre deuoré par les bois des bestes fauages. Et cedit, & descendue de son cheual, elle s'en entra en la maison du pauvre homme où elle soupa pauurement avec eux de ce qu'ilz auoient, & apres souper elle se ietta toute vestue sur leur liét pour se coucher avec eux, où elle ne cessa de fouspirer, & plourer fa desconuenue, & celle de Pierre, duquel elle ne fauoit qu'esperer sinon mal. Et quand il fut presque iour, elle ouyt vn grand bruit de gens qui cheminoient au moyen dequoy elle se leua soudainement, & s'en alla en vn grande court qui estoit derriere la maisonnette, où elle vit en vn des endroiets d'icelle, vne grosse meulle de foin, dedans lequel elle se cacha, à fin que

si les gens venoient là elle ne fust si tost trouuée, & à peine s'estoit elle acheuée de cacher que ceux là qui estoient en grande compagnie & tresmauuais garçons, furent à la porte de la maisonnette, qui se firent ouurir, & quand il furent entrez dedans, & eurent trouué le cheual de la fille tout fellé ilz demanderent qui estoit leans. Le bon homme, ne voyant autour de soy la ieune fille, respondit, il n'y a ceans personne que nous : mais ce cheual, à qui qu'il soit eschappé, arriua au soir icy, & nous le mismes ceans, à fin que les loups ne le mangeassent. Alors dist le principal de la troupe, il fera doncques bon pour nous, puis qu'il n'a point d'autre maistre. Quand ceux-cy furent tous entrez & espandus dedans la petite maison, vne partie s'en alla à la court, & ayant laissé leur iauelines & rondelles, auint que l'un d'eux ne sachant que faire autre chose, fourra sa iaueline dedans le foin, & ne s'en salut gueres qu'il ne tuaist la fille, qui s'estoit cachée, ne rien moins qu'elle se fist cognoistre : car la iaueline luy vint si pres de la mamelle gauche, que le fer perça son habillement : au moyen dequoy elle cuida ietter vn grand cry, pensant estre blessée, mais confiderant le lieu où elle estoit, elle se tint coye sans sonner mot. La compagnie apres auoir fait cuyre des cheureaux & autre chair qu'ilz auoient, & qu'ilz eurent beu & mangé, s'en allerent deçà & delà à leur entreprise, & em-

menerent le cheual d'Angeline, & eux estans vn peu eslongnez, le bon homme commença à demander à sa femme : Qu'est deuenue nostre fille qui arriua hier au soir icy, laquelle ie n'ay point veüe depuis que nous sommes leuez? La bonne femme respondit qu'elle n'en sçauoit rien, & regardoit si on la verroit point. La fille oyant que ceux la estoient partis sortit du foin : dequoy le bon homme fut bien aise, quand il veit qu'elle n'estoit tombee entre les mains de ces paillards, & estant desia presque iour, luy dist : Deformais que le iour s'en veint, nous te menerons s'il te plaist iusques à vn chasteau qui est à deux lieuës & demie pres d'icy, là où tu seras en lieu seur : mais il te faudra venir à pied, par ce que ces mauuais garçons qui viennent à ceste heure de partir d'icy, ont emmené ton cheual. La pauvre fille se souciant peu de cela, les pria pour l'honneur de Dieu : qu'ilz la menassent en ce chasteau : ce qu'ilz firent, & y arriuerent entre sept & huit du matin. Le chasteau estoit à vn des Vrfins qui s'apelloit Lielle de champ de fleur, & de bonne fortune sa femme y estoit lors, qui estoit vne bonne & saincte Dame. Laquelle quand elle veit la fille, la recogneut incontinent, & la receut bien volontiers. Puis voulut sçauoir tout par ordre comment elle estoit arriuee là. Ce que la fille luy conta entierement : Dont la Dame (qui congnoissoit pareillement Pierre) fut marrie : par ce qu'il estoit

des amis de son mary. Et oyant dire le lieu où il auoit esté pris, elle va coniecturer qu'il auroit esté tué. Si dist à la fille : puis que tu ne sçais doncques où est Pierre, tu demoureras icy avecques moy, iusques à tant qu'il me viendra à propos de te pouuoir enuoyer seurement à Rome. Pierre estant sur le chefne le plus dolent qu'il estoit possible, veit venir sur l'heure du premier somme vne vingtaine de loups, lesquels tout aussi tost qu'ilz veirent son cheual, furent tout autour de luy. Le cheual quand il les sentit si pres de soy secoüa la teste, & rompit ses resnes & commença à s'en vouloir fuir : mais estant enuironné de tous costez, & ne pouuant fuyr, il se deffendit long temps avec les dents & à grand coups de pieds, & à la fin fut ietté par terre, & mis en pieces : puis esuentré soudainement, & se paiffans tous de luy, le deuorerent sans y laisser autre chose que les os, & apres s'en allerent. Dequoy le pauvre Pierre (qui sentoit auoir encor quelque compagnie de son cheual, & vn suport de ses trauaux) fut fort estonné : & pensa en soy-mesmes, qu'il ne pourroit iamais sortir de ceste forest. Et quand il fut presque iour, mourant de froid sur cest arbre, il veit (comme celuy qui tousiours regardait autour de soy) vn grand feu, qui estoit bien à vne grande demie lieuë loing de soy. Parquoy aussi tost qu'il fut iour clair, il descendit de se chefne (non sans grande peur) & prenant son adresse vers ce feu fit tant

qu'il y arriua. Autour duquel il trouua des bergers qui banquetoient, & se donnoient du bon temps, desquelz il fut receu par pitié. Et apres qu'il eut mangé & beu, & qu'il se fut reschauffé, il leur conta sa desconuenue, & comment il estoit là arriué : puis leur demanda s'il y auoit en tout ce quartier, village ou chasteau, où il sceust aller. Les bergers luy dirent que là aupres enuiron vne lieue & demie y auoit vn chasteau de Lielle de champ de fleur, & que sa femme y estoit pour l'heure, dont Pierre fut tresioyeux, & les pria que quelqu'un d'eux l'accompagnaist iusques là, ce que deux d'entr'eux firent volontiers. Et estant là Pierre arriué, & ayant trouué quelcun de sa congnoissance, il taschoit de trouuer le moyen qu'on allast chercher la fille par la forest, quand la Dame du chasteau le fit appeller, à laquelle il s'en alla incontinent. Et voyant s'amy Angeline avec elle, iamais ioye ne fut pareille à la sienne. Car il transsissoit tout de desir qu'il auoit de l'aller baïser : mais il s'en abstenoit de honte qu'il auoit de la Dame. Et si sa ioye fut grande, celle d'Angeline (le voyant aussi) ne fut pas moindre. La gentil-femme apres luy auoir faict bon recueil & sceu ce qui luy estoit aduenü, le reprint bien fort de ce qu'il vouloit faire contre la volonté de ses parens : mais voyant que nonobstant toutes ses remonstrances, il estoit tout resolu en cecy, & qu'il estoit fort agreable à la fille, dist en soy-mesmes : De-

quoy me tourmentay-ie ? Ceux cy s'entr'ayment. Ceux-cy se cognoissent, chacun d'eux est également amy de mon mary, leur desir est honneste, & outre ce, ie pense que Dieu le veut ainsi, puis que l'un est eschapé du gibet, & l'autre du coup de iaveline, & tous deux des bestes fauuges, & par ainsi qu'il se face. Puis se retournant deuers eux, elle leur dist : Si vous auez volonté d'estre mariez ensemble i'en suis trescontente, & veux que les nopces se facent ceans, aux despens de mon mary, & apres ie feray bien faire la paix entre vous, & voz parens. Pierre tresioyeux, & Angeline encor plus, s'espouserent en ce chasteau, & leur fit la gentilfemme honorables nopces, comme on le peut faire aux champs, où ilz sentirent tresdoucelement les premiers fructz de leur amour. Et quelques iours apres, la Dame & eux monterent à cheual, & s'en retournerent bien accompaignez à Romme, où ayant trouué les parens de Pierre fort courroucez de ce qu'il auoit faict, elle le remit en bonne paix & amour avec eux, & vesquit depuis en grand repos & plaisir avecque son Angeline iusques en vieillesse.





NOUVELLE QUATRIESME.

Signifiant la prudence d'aucuns, qui cherchent à couvrir plustost vne honte qui leur est aduenue par autrui, qu'en le punissant la publier à chacun.

Richard Menard trouué par messire Litio de Valbonne couché avec sa fille, l'espousa & vquirent depuis en bonne paix & amitié avec le pere d'elle.



VAND madame Elisse se fut teüe, escoutant les louanges que luy donnoient ses compaignes de sa nouuelle, la Royne commanda à Philostrate qu'il en dist quelqu'une: lequel en riant commença à dire : I'ay esté tant de fois, & si fort picqué de vous (mes Dames) de ce que hier ie vous mis en auant vne matiere fascheuse à deuiser, & pour vous faire plorer, qu'il me semble que si ie veux

aucunement recompenser cest ennuy, ie dois dire quelque chose qui vous face vn peu rire. Et par ainsi ie suis deliberé de vous conter par vne briefue nouuelle, vne amitié où il n'y eut autre ennuy que de fouspirs, & d'une courte peur, meslee de quelque honte, dont la fin fut neantmoins ioyeuse.

Il n'y a encores gueres de temps, qu'en la Romaigne¹ y eut vn Cheuallier fort honneste gentil-homme & bien conditionné, nommé messire Litio de Valbonne², lequel par fortune eut de sa femme nommee madame Iaquemine sur le commencement de sa vieillesse, vne fille qui deuint (à mesure qu'elle croissoit) la plus belle & gracieuse de tout le pays. Et pource que ilz n'auoient que celle-là, ilz l'aymoient & cherissoient grandement, & la gardoient fort songneusement, esperans de faire quelque grande alliance par elle, semblablement y auoit lors vn beau ieune filz, ayant le taint frais, nommé Richard, de la famille des Menards de Brettinote, qui frequentoit souuent en la maison de ce messire Litio, & ne bougeoit gueres d'auec luy. Duquel, messire Litio ne sa femme ne se doutoient non plus qu'ilz eussent faict de leur filz. Cestui-cy voyant à toute heure ceste fille qui estoit belle, gracieuse, pleine de bonnes mœurs, & desia preste à marier, en deuint desesperément amoureux : toutesfois qu'il mettoit toute la peine qu'il pouuoit à celer son amitié. Dequoy s'estant la

fille apperceue, commença pareillement sans point fuyr le coup, à l'aymer. Et ayans eu le ieune filz plusieurs fois grande volonté de luy dire quelque parolle (ce qu'il auoit tousiours differé en craincte) à la fin il choisit vn jour son heure, & prit la hardiesse de luy dire : Catherine ie te supplie que tu ne souffres que ie meure en t'aymant. La fille respondit soudainement pleust à Dieu que tu ne me fisses non plus mourir. Ceste responce augmenta beaucoup le plaisir & la hardiesse à Richard, dont il luy dist : Il ne tiendra iamais à moy que ie ne face tout ce qu'il te plaira : mais il est en toy de trouuer le moyen de nous rendre contens l'vn de l'autre. La fille luy dist lors, Richard tu vois comme ie suis tenue de court & par ainsi ie ne puis penser comment tu sceusses venir à moy : mais si tu sçais inuenter chose que ie puisse faire sans receuoir honte, dy le moy, & ie le feray. Richard ayant pensé plusieurs moyens, dist soudainement : Catherine mamye ie ne puis penser aucun moyen, sinon que tu fisses tant que tu peusses venir coucher sur la gallerie qui est pres du iardin de ton pere, là où si ie te sçauoye la nuict, ie me parforceray d'y venir sans faute, encor qu'il soit fort hault. A qui Catherine respondit : Si tu te fais fort d'y venir, ie pense bien de faire tant que i'y pourray coucher. Richard promit qu'il le feroit. Et cecy dict, s'entrebaiserent seulement vne pauvre fois à la defrobee, & puis

s'enfuyrent. Le iour enfuyuant qui estoit vers la fin du mois de May, la fille commença deuant sa mere à se plaindre de ce qu'elle n'auoit peu dormir la nuit precedente, pour le grand chault qu'il auoit faict. La mere luy dist : Qu'est-ce que tu dis ma fille ? quel chault faict il tant ? c'est bien tout au contraire : car il ne fait point de chault. A qui Catherine respondit : Ma mere vous le deuriez dire à mon pere, & paraenture que vous luy diriez verité, & dauantage vous deuiez considerer combien les filles sont plus chaleureuses, que les femmes d'aage. La mere dist alors, Ma fille la verité est ainsi : mais ie ne puis pas faire chault & froict à mon plaisir, comme paraenture tu voudrois : il faut endurer le temps comme la saison le donne, peut estre qu'il fera plus frais cest autre nuit, & tu dormiras mieux. Or Dieu le vueille, dist Catherine : mais on n'a pas accoustumé de voir que quand on va plus auant en l'Esté, les nuitz se voient refroidissant. Que veux-tu doncques qu'on face dist la mere ? Quand il plairoit à mon pere & à vous (respondit la fille) ie ferois faire volontiers vn petit liect sur la gallerie pres de sa chambre, & sur le iardin, où ie coucherois, & oyant chanter le Rossignol, estant le lieu fraiz, ie seray beaucoup mieux que ie ne suis en nostre chambre. La mere dist : Or fus, n'en parle plus ie le diray à ton pere, & nous en ferons comme il luy plaira. Lesquelles

choses ouyes par messire Litio de sa femme, pour ce qu'il estoit vieux, & vn peu difficile en cecy, il dist : Quel Rossignol est-ce, au chant duquel elle veut dormir ? Je la feray dormir au chant des Cygalles. Ce que sçachant Catherine non seulement elle ne dormit point la nuit ensuyuant plus de despit que de chaut : mais aussi ne laissa iamais dormir sa mere, ne se plaignant que du chaut. Parquoy quand le matin fut venu, la mere s'en alla deuers messire Litio, & luy dist : Vous vous souciez bien peu de ceste fille que vous importe il qu'elle couche en la gallerie ? elle n'a reposé toute la nuit en place, de grand chaut qu'elle auoit, & outre ce vous esmerueillez vous si ce luy fera plaisir (elle qui n'est qu'un enfant) d'ouyr chanter le Rossignol ? les enfans desirent tousiours les choses semblables à eux. Messire Litio oyant cecy dist : Or allez en la bonne heure, qu'on luy face faire un liest tel que voudrez, & qu'on y mette quelques rideaux de farge, & qu'elle y dorme, & oye chanter le Rossignol tout son saoul. Ce qu'ayant sceu Catherine, elle y fit dresser incontinent un liest, & se promettant qu'elle y coucheroit ceste nuit, fit tant qu'elle veid Richard, auquel elle fit un signe accordé entr'eux, par lequel il entendit ce qu'il auoit à faire. Messire Litio, quand il sceut que sa fille fut couchee, ferma un huys qui alloit en la gallerie, & s'en alla pareillement coucher. Tout aussi tost que

Richard entendit que tout le monde dormoit il monta avec vne eschelle qu'il auoit, sur vn mur, & de ce mur, se prenans à certaines attentes d'un autre mur (non sans grande peine & danger s'il fust tombé) gaigna la galerie, où sans mener grand bruit, il fut receu de la ieune fille avec tresgrande chere, & apres plusieurs baisers, ilz se coucherent ensemble, & prindrent presque toute la nuit plaisir l'un de l'autre, faisans chanter plusieurs fois le Rossignol. Or estant en celle saison les nuitz courtes, & le plaisir grand (& desia approchant le iour, à quoy ilz ne pensoient) & avec ce eux brulant de chaut, tant pour la chaleur qu'il faisoit, que pour les folies qu'ilz auoient faictes ilz s'endormirent sans auoir aucune couuerture sur eux : tenant la fille son amy embrassé avec le bras droict, & de la main gauche par la chose que vous auez plus de honte de nommer, quand vous estes entre les hommes, & eux dormans en ceste maniere sans s'esueiller, le iour furuint : parquoy messire Litio se leua, lequel se souuenant que sa fille dormoit en la galerie, ouurit tout bellement l'huys, & dist en soy mesmes : Que ie voye comment le Rossignol aura faict dormir ceste nuit Catherine. Puis quand il fut plus outre, il leua tout bellement les rideaux du liect, & veid Richard & elle couchez tous nuds : & embrassez en la forte cy deuant dicte. Parquoy congnoissant que c'estoit Richard, il

fortit de là, & s'en alla à la chambre de sa femme, & l'appella en luy disant : Sus ma femme leuez vous tost, & venez voir que vostre fille a esté si desireuse du Rossignol, & y a faict si bon guet qu'elle l'a prins, & le tient en la main. Comment est-il possible, dist sa femme? Vous le verrez dist messire Litio, si vous vous despechez de venir. La Dame s'estant hastee de se vestir, fuyuit tout bellement son mary, & quand ilz furent tous arriuez au liect, & qu'ilz eurent leué les rideaux, madame laquemine peut voir manifestement comment sa fille auoit prins & tenoit le Rossignol qu'elle desiroit tant d'ouyr chanter. Lors la dame se tenant fort trompee de Richard, voulut crier & luy dire iniure : mais messire Litio luy dist : Ma femme, sur tant que vous m'aymez, gardez vous bien d'en sonner mot : car pour certain, puis qu'elle l'a prins, il fera sien, Richard est gentilhomme & riche enfant, nous ne sçaurions faire sinon bonne alliance de luy, & s'il veut eschapper bon marchand de là où il est, il faudra premierement qu'il l'espouse, & lors il trouuera qu'il aura mis le Rossignol en sa propre cage, & non en celle d'autrui. Dequoy la mere se rappaisa, voyant que son mary ne s'en courrouçoit autrement. Et considerant que sa fille auoit eu bonne nuit, & qu'elle reposoit tresbien, ayans prins le Rossignol elle se teut. Peu de temps apres toutes ces parolles, Richard s'esueilla, & voyant

qu'il estoit iour clair se tint desia pour tout mort : & appella Catherines en luy disant : Helas m'amy comment ferons nous ? le iour est venu & m'a surprins icy. Ausquelles parolles messire Litio s'aduança, & en tirant les rideaux dist, nous ferons tresbien. Quand Richard le veid : il luy sembla qu'on luy arrachast le cœur du corps, & s'estant leué sur le liët dist : Monsieur ie vous requiers pour Dieu mercy, ie congnois comme traistre & meschant, auoir merité la mort : parquoy faiçtes de moy ce qu'il vous plaira, bien vous supplie que vous ayez s'il est possible mercy de ma vie, & que ie ne meure point. A qui messire Litio respondit : Richard, l'amour que ie porte, & la fiance que i'auoye en toy, ne meritoient point cecy, mais toutesfois puis qu'il est ainsi, & que ieunesse t'a transporté à faire vne si grande faute, afin que tu t'ostes la mort, & à moy le deshonneur, ie veux auant que tu partes d'icy que tu espouses Catherine pour legitime femme : à ce que tout ainsi qu'elle a esté tienne ceste nuit, elle le soit semblablement tant qu'elle viura, & en ceste maniere tu peux acquerir mon amour & ta saluation, & ou tu ne le voudras faire, recommande hardiment ton ame à nostre Seigneur. Ce pendant que ces parolles se disoient, la pauvre Catherine lascha le Rosignol, & s'estant recouuerte, commença à plorer bien fort, & à supplier son pere qu'il pardonnast à Richard : & d'autre part elle

prioit Richard qu'il fist ce que son pere vouloit : Mais il ne fallut trop grandes prieres en cecy : parce que d'une part la honte de la faute commise avec le desir de l'amander, & d'autre la peur de mourir, & le desir d'eschapper, & outre ce l'ardente amour & l'appetit de posseder la chose aymee, luy firent dire liberalement sans point y songer, qu'il estoit tout prest de faire ce qu'il plaisoit au pere. Parquoy messire Litio emprunta de la mere vn de ses anneaux, & sans partir du lieu où ilz estoient, Richard en leur presence espousa Catherine. Laquelle chose faicte, messire Litio & sa femme en les laissant, dirent : Or vous reposez desormais : car vous en auez peut estre plus de besoing, que de vous leuer. Quand ceux-cy furent partiz, les ieunes gens s'embrasferent ensemble, & n'ayant faict la nuict que six lieuës, ilz en firent encor deux auant que de se leuer, & là ilz firent fin à la premiere iournee : puis quand ilz furent leuez, & que Richard eut parlé plus à loisir à messire Litio, peu de iours apres l'espousa de rechef en la presence des parens & amys : comme il falloir, & avec grande feste la mena en sa maison où il fit belles & honorables nopces. Et longuement apres il volla avec elle en paix & consolation pour Rossignol de iour, & de nuict autant qu'il luy pleut.



NOUVELLE CINQUIESME.

Par laquelle on peut voir les querelles qui procedent d'amour, & en partie, la sincerité d'un loyal amy.

Guy de Cremonne allant de vie à trespas, laissa à Iaquemin de Pavie vne sienne fille laquelle Jeannot de Seuerin, & Minguin de Mingole aymerent en la ville de Fayence, dont ilz s'entrebattirent depuis, estant la fille recongneut pour sœur de Jeannot, elle fut donnee pour femme à Minguin.

TOUTES les Dames auoient tant ry en escontant la nouuelle du Roffignol qu'encores que Philostrate eust acheué de la dire, elles ne pouuoient pour tout cela cesser de rire, mais à la fin quand elles eurent ry leur faoul, la Royne dist : Veritablement si tu nous melancholias hier, tu nous as bien

aujourd'huy tant recreées, que piece de nous ne se doit par raison plaindre de toy. Et retournant ses parolles vers madame Neiphile, luy commanda qu'elle dist sa nouuelle, laquelle ioyeusement commença à parler ainsi : Puis que Philostrate est entré en deuissant en la Romaine, ie m'y veux pareillement promener, avec mon conte.

Ie dy doncques qu'il y eut autresfois en la ville de Fan¹ deux Lombards, qui y vindrent habiter, dont l'un se nommoit Guy de Cremonne, & l'autre Iaquemin de Pauie, hommes desia sur l'aage, & qui auoient esté en leur ieunesse presque tousiours à la guerre, & soldatz. Or venant Guy à mourir, & n'ayant aucun filz ne autre amy ou parent de qui plus il se fiait, qu'il faisoit de Iaquemin, il luy laissa (apres luy auoir longuement deuissé) vne fillette aagée parauenture d'enuiron dix ans, avecque tout le bien qu'il auoit en ce monde, & puis mourut. Aduint durant ce temps que la ville de Fayence², qui auoit esté longuement en guerre & en malheureté, retourna quelque peu en meilleur estat : & fut permis liberallement à chacun qui voudroit d'y pouuoir retourner. Parquoy Iaquemin qui y auoit demouré autresfois print plaisir d'y retourner, & s'y en alla avecques tout son bien, & mena quant & soy la ieune fille, que Guy luy auoit laissée, qu'il aymoît & traictoit comme sa propre fille. Laquelle deuenant grande, deuint pareillement

autant belle ieune fille que nulle autre de la ville, & si elle estoit encores autant honneste & bien conditionnee : parquoy plusieurs luy commencerent à faire la court : mais sur tous les autres deux honnestes ieunes hommes & de bonne grace, luy porterent egallement tres-grande amitié : tellement que par ialousie qu'ilz eurent l'un de l'autre, ilz commencerent à se hayr desmesurément : & se nommoient l'un Jeannot de Seuerin, & l'autre Minguin de Mingole. Et n'y auoit aucun d'eux deux (estant la fille en l'aage de quinze ans) qui ne l'eust volontiers prinse à femme, si les parens s'y fussent accordez. Par quoy voyant qu'elle leur estoit refusee par honneste occasion, chacun se mit à pourchasser de l'auoir par la maniere qui plus luy feroit facile. Iaquemin auoit en sa maison vne chambriere assez d'aage, & vn seruiteur qui se nommoit Criuel, homme fort recreatif & bonne personne, avec lequel Jeannot print grande familiarité, & quand il luy vint à propos, il luy descouurit son amitié, le priant de luy estre fauorable à obtenir ce qu'il desiroit, luy promettant choses grandes s'il le faisoit. A qui Criuel dist : Escoute ie ne pourroye faire en cecy autre chose pour toy, sinon que quand mon maistre yroit soupper hors la maison en quelque lieu, de te faire entrer là où elle feroit : parce que si i'en vouloye parler pour toy, elle ne s'arresteroit iamais pour m'escouter : & si cecy te plaist, ie le te prometz,

& le feray, fais toy apres ce que tu penſes qui fera bien faiſt : Jeannot luy diſt qu'il n'en vouloit dauantage, & demourerent en ceſt accord. Minguin de l'autre coſté auoit prins cognoiſſance avec la chambriere, & deſia auoit tant faiſt qu'elle auoit faiſt pluſieurs meſſages à la fille, tellement qu'elle l'auoit quaſi embrafée de la mort de Minguin : & outre ce luy auoit promis de le mettre avec elle s'il aduenoit que ſon maſtre allaſt la nuit pour quelque occaſion hors de la maiſon. Aduint doncques peu de temps apres ces parolles dictes, que par la menee de Criuel, Iacomini ſ'en alla ſoupper avec quelcun de ſes amys, & l'ayant faiſt ſçauoir à Jeannot, il conclud avecque luy, que faiſant vn certain ſigne, il viendroit & trouueroit l'huys ouuert. La chambriere de l'autre coſté ne ſçachant rien de cecy, fit ſçauoir à Minguin que Iacomini n'y ſouppoit point, & luy diſt qu'il ſe tint ſi pres de la maiſon, que quand il verroit vn ſigne qu'elle feroit, il entraſt pareillement dedans. La nuit doncques venue ne ſçachant les deux amoureux aucune choſe l'vn de l'autre, ayant toutesfois chacun ſoupçon de ſon compaignon, ilz ſ'en allerent avec certains compaignons armez pour pouuoir entrer en toute ſeureté. Minguin ſe mit avecques les ſiens en la maiſon d'vn ſien amy voſin de la fille en attendant le ſigne. Jeannot pareillement demoura avecques les ſiens vn peu loing de la

maison : puis quand le maistre s'en fut allé, Criuel & la chambriere se parforcerent d'envoyer l'un l'autre en quelque lieu dehors. Criuel disoit en ceste sorte à la chambriere : Que ne t'en vas tu coucher ? que vas-tu tant tournoyant à l'entour de la maison ? Mais toy disoit aussi la chambriere, que ne t'en vas-tu querir nostre maistre ? Qu'attends-tu plus, puis que tu as souppé ? Et ainsi l'un ne se pouvoit despecher de l'autre : mais Criuel congnoissant que l'heure qu'il auoit assignee à Jeannot estoit venue, dist en soy-mesme, que me souciay-ie de ceste-cy ? si elle ne se taist, ie luy pourroye bien mal faire ses besongnes, & ayant faict son signe il alla ouurir l'huys : & Jeannot incontinent avec deux de ses compagnons entra dedans, & ayant trouué la fille en la salle, ilz la prindrent pour l'emmener. La fille commença à resister, & à crier tant qu'elle peut, aussi fit la chambriere. Ce qu'oyant Minguin, il y courut incontinent avec ses compagnons, & voyans la fille desia hors la porte de la maison, ilz desgainerent leurs espees, & crierent tous : Ha traistres vous estes morts : la chose n'yra pas ainsi, quelle violence est cecy ? Et cecy dit, commencerent à ruer fus. D'autre costé les voisins sortirent dehors à ce bruit, & avec bastons, armes & lumiere commencerent à blasmer telle chose, & à ayder à Minguin : au moyen dequoy apres longue contention, Minguin osta la fille à Jeannot, & la remit en

la maison de Iacomín. Ceste meslée ne fust si tost separee, que les Sergens du Capitaine de la ville y suruindrent, & prindrent plusieurs de ceux cy, & entre les autres furent prins Minguin, Jeannot & Criuel, & menez en prison. Mais apres que la chose fut appaisée, & que Iacomín fut reuenu de souper de la ville, il fut fort marry de cest inconuenient, & quand il se fut informé comme il estoit reuenu, & qu'il eut congneu qu'il n'y auoit point de coulpe du costé de la fille, il s'appaisa vn peu, delibérant en soy-mesmes, afin qu'un tel cas n'aduinst plus, de la marier le plustost qu'il pourroit. Quand le lendemain fut venu, les parens d'un costé & d'autre ayans sceu la verité du faict, & congnoissans la punition qui en pouuoit aduenir aux prisonniers si Iacomín vouloit faire ce que raisonnablement il pourroit, vindrent deuers luy, & avec douces parolles le prierent qu'il ne regardast point tant à l'iniure receue par le peu de sens de ieunes gens, comme à l'amitié & bien-veillance qu'ilz pensoient qu'il portast à eux qui le prioient : se fouzmettans eux-mesmes, & les ieunes hommes qui auoient faict le mal, à toute telle satisfaction qu'il luy plairoit d'en prendre. Iacomín qui auoit beaucoup veu de choses en son temps, & auoit bon entendement, respondit en peu de parolles : Messieurs si i'estoye en mon pays comme ie suis au vostre, ie me tiens tant vostre amy que ie ne feroye de cecy ne d'autre

chose finon ce qu'il vous plairoit, & fans cela encores me dois ie de tant plus condescendre à vostre plaisir, comme plus vous vous estes offenzez vous mesmes, parce que ceste fille n'est pas (comme plusieurs pensent) de Cremonne, ny de Pauie, ains est Fayentine : combien que moy ne elle, ne celuy de qui ie l'euz, ne sceufmes iamais sçauoir de qui elle est fille : parquoy de ce que vous me priez, il en fera faict tout ce que vous commanderez. Les honnestes hommes oyans que ceste-cy estoit de Fayence s'en esmerueillerent, & apres qu'ilz eurent remercié Iacomín de sa liberale responce, ilz le prièrent qu'il luy pleust de leur dire comment ceste fille estoit venue entre ses mains : & aussi comment il sçauoit que elle estoit de Fayence. A quoy Iacomín respondit, Guyot de Cremonne fut mon compaignon & amy : & quand il vint à mourir, me dist, que quand ceste ville fut prinse par l'Empereur Federic, & mise tout à sac, il entra avec ses compaignons en vne maison qu'il trouua pleine de bien & toute abandonnee de gens, fors seulement de ceste fille qui auoit deux ans ou enuiron : & que luy sortant d'icelle maison ainsi qu'il estoit desia sur les degrez, elle l'appella pere, dont il luy en vint compassion, & l'emmena avec tout ce qu'il trouua en la maison, à Fan, & là venant à mourir, il la me laissa avec tout ce qu'il auoit, me chargeant que ie la mariaffe quand il en seroit temps,

& que ie luy donnasse en mariage ce qu'il luy appartiendroit. Il est vray qu'encor qu'elle soit prestee de marier, ie n'ay peu trouuer personne à qui la donner, aumoins qui me vienne à gré : combien que ie le feroye volontiers auant qu'il m'aduint vn autre tel inconuenient comme celuy d'arfoir. Or y auoit-il de fortune lors en celle troupe vn nommé Guillemain de medecine, qui auoit esté à la prise de ceste ville avec Guy de Cremonne, & sçauoit tresbien à qui estoit la maison que ledict Guy auoit saccagee & le voyant en la compagnie, il s'approcha de luy, & luy dist : Bernardin oys-tu ce que dit Iacomine? Ouy, dist Bernardin, & tout à ceste heure i'y pensoye : parce qu'il me souuient bien que ie perdy en ceste meslange vne petite fillette de l'aage que dit Iacomine. A qui Guillemain dist : Pour certain c'est elle mesme : car ie me trouuay en ce mesme temps là, en lieu, où i'ouy raconter à Guyot de Cremonne, où il auoit fait ceste pillerie : & cogneu que ç'auoit esté en ta maison : parquoy ie te prie souuienne toy si tu la pourrois recognoistre à quelque marque, & fais y regarder : car tu trouueras qu'elle est ta fille. Au moyen dequoy Bernardin en y pensant, se va souuenir qu'elle deuoit auoir vn signe comme vne petite croix sur l'oreille gauche qui luy estoit venue d'une loupe qui luy auoit faict couper peu au parauant ce sac. Parquoy sans y plus songer, il s'aprocha de

Iacomín qui estoit encor là, & le pria qu'il le menast en sa maison, & qu'il luy fist veoir ceste fille. Iacomín l'y mena volontiers, & fit venir la fille deuant luy. Laquelle tout aussi tost que Bernardin la veid, il luy sembla veoir le visage de la mere qui estoit belle : mais ne s'arrestant encor à cecy, il dist à Iacomín qu'il voudroit bien (s'il luy plaifoit) leuer vn peu ses cheueux sur l'oreille gauche, dont Iacomín fut trescontent, & lors Bernardin s'approcha d'elle qui estoit toute honteuse : & quand il luy eut leué avec la main droicte les cheueux, il veid la croix, & cognoissant veritablement qu'elle estoit sa fille, commença à pleurer tendrement, & à l'embrasser : combien qu'elle en fist quelque refus, & se retournant vers Iacomín luy dist : Frere mon amy ceste-cy est ma fille : & ma maison fut celle que feu Guyot de Cremonne saccagea, là où cest enfant fut à la fureur soudaine, oublié par ma femme sa mere : & auons creu iusques à ceste heure qu'elle eust esté bruslee en la maison où lon mit le feu incontinent apres. La fille oyant tout cecy, & voyant cest homme d'aage, adiousta foy aux parolles, & meüe d'vne vertu cachee endurant ses embrassemens commença à plorer tendrement avec luy. Bernardin sur l'heure enuoya querir la mere d'elle, ses parens sœurs & freres : & l'ayant monstree à tous, & narré le faict, apres mille embrassemens, & ayans faict grande feste, il la mena avec foy du consentement de

Iacomín en sa maison. Quand le Capitaine de la ville qui estoit honneste homme sceut cecy, & qu'il congneut que Jeannot qu'il tenoit prisonnier estoit filz de Bernardin & frere charnel de la fille, il aduifa de couler doucement la faute commise par ledict Jeannot. Et s'estant entremeslé en ces choses avec Bernardin fit la paix entre Jeannot & Minguin, & donna la fille qui se nommoit Agnes en mariage à Minguin, avec grand plaisir & contentement de tous les parens, & deliura de la prison avec eux Criuel, & les autres qui estoient empeschés pour cest affaire. Et apres cela Minguin tresioyeux d'auoir s'amyé fit belles & grandes nopces : apres lesquelles il la mena chez foy, & vesquit longuement avecqu'elle en paix & amitié.





NOUVELLE SIXIESME.

Comprenant qu'Amour peut mener l'homme en telz perilz, qu'à grande peine en peut-il eschapper.

Iean de Procide estant trouué avec vne ieune fille qu'il aymoit, laquelle auoit esté donnee au Roy Federic de Sicile, fut lié à vn poteau pour deuoir estre bruslé, dont toutesfois il eschappa, estant reongneu par Rogier Dorie Admiral de Sicile & espousa ladicte fille.



FINIE la nouuelle de madame Neiphile qui pleut grandement aux Dames, la Royne commanda à madame Pampinee qu'elle se deliberaſt d'en dire quelqu'une. Laquelle soudainement le viſage ouuert comença ainſi : Trefgrandes forces (mes gracieuſes Dames) ſont celles d'amour : qui conduiſent les amoureux en grands trauaux & inconueniens non preueuz, au danger de n'en pouuoir

fortir, comme il se peut comprendre par plusieurs choses racontées, non seulement aujourdhuy, mais aussi d'autres fois, neantmoins encore suis-je contente d'en faire apparoir en parlant d'un ieune homme amoureux.

Ysquia¹ est vne Isle fort prochaine de Naples, en laquelle y eut iadis vne belle & gracieuse ieune fille entre les autres, nommée Restitue, fille d'un gentilhomme de ceste Isle là, nommé Marin Bolgare, laquelle un iouuenceau qu'on appelloit Iean qui estoit d'une Isle prochaine de là, appelée Procide², aymoît plus que sa propre vie, & elle luy : lequel pour la voir, auoit de coustume de venir non seulement de iour à Ysquia, mais aussi plusieurs fois de nuict quand il ne trouuoit point de barque nageoit de Procide à Ysquia pour voir (si mieux ne pouoit) à tout le moins les murailles de sa maison : & durant ceste amitié ainsi feruente, aduint qu'estant un iour d'Esté la fille toute seule à la marine, allant de rocher en rocher avec un cousteau au poing pour arracher des huyftres d'avec les pierres, elle se trouua en un lieu entre les rochers, auquel tant pour l'ombre que pour la commodité d'une fontaine d'eau tresfroide qui y estoit, certains ieunes gens Siciliens qui venoient de Naples, s'estoient retirez, lesquels apperceuans la fille tresbelle qui encor ne les apperceuoit, & la voyans seule, delibererent en eux mesmes de la prendre & emmener avec eux : ce qu'ilz firent, & combien

qu'elle criaſt fort, ſi fut elle neantmoins enleuee & miſe ſur la barque. Quand ilz furent arriuez en Calabre, ilz furent en propos à qui deuroit eſtre la fille : & à brief parler chacun d'eux la vouloit auoir : parquoy ne ſe trouuant aucun accord entr'eux, eux craignans qu'il en aduint pis, & qu'ilz pourroient rompre leur amitié pour elle, ilz conclurent tous d'un accord qu'il ſeroit bon de la donner au Roy Federic de Sicile³ : qui eſtoit lors ieune, & prenoit plaifir en telle marchandife : parquoy quand ilz furent arriuez à Palerne ilz le firent ainſi. Le Roy la voyant belle l'eut pour agreable : mais pource qu'il eſtoit lors quelque peu mal diſpoſé de ſa perſonne, commanda que iuſques à ce qu'il fuſt plus fort elle fuſt gardee en vn beau lieu qu'il auoit, nommé la Cuue, & qu'elle y fuſt bien traictee, & ainſi fut faiet. Or fut le bruit grand en Yſquie du rauifſement de la fille. Et ce que plus les tenoit en peine, eſtoit qu'on ne ſçauoit point qui eſtoient ceux qui l'auoient rauie. Mais Iean à qui plus en challoit qu'à nul autre, n'attendant point que les nouuelles luy en vinſſent en Yſquie, & ſçachant la part qu'eſtoit tiré la Fregate, en fiſt armer vn autre, ſur laquelle il monta, & le pluſtoſt qu'il peut ayant couru toute la marine depuis la Minerue iuſques à la Scalee en Calabre⁴, cherchant ſ'amy par tout, il luy fut dict à la Scalee qu'elle auoit eſté menee par certains Mariniers Siciliens à Palerne, là où Iean ſe fit porter le pluſtoſt qu'il

luy fut possible. Et là ayant sceu apres l'auoir bien cherchée qu'elle auoit esté donnée au Roy, & qu'il la faisoit garder en son lieu de plaifance nommé la Cuue, il en fut fort desplaisant, & perdit quasi toute esperance, non seulement de la deuoir iamais rauoir, mais aussi de la voir. Toutesfois estant retenu d'amour il renuoya sa Fregate, & voyant qu'il n'estoit là congneu de personne il demoura quelque temps à Palerme, où passant souuentefois deuant ce lieu de plaisir, il luy aduint vn iour par fortune de la veoir à vne fenestre, & elle luy, dont chacun d'eux fut fort content : & voyant lean que le lieu estoit vn peu à l'escart, s'estant approché le mieux qu'il peut de Restitue, il parla à elle, & fut aduerty du moyen qu'il auoit à tenir s'il vouloit parler à elle de plus pres, puis s'en alla : apres auoir premierement considéré la situation du lieu : & quand il eut attendu que la nuict fut venue & laissé passer bonne partie d'icelle, il s'en retourna là, & ayant grimpé par des endroitz où les piedz n'eussent peu grimper, il s'en entra au iardin : où il trouua vne petite antenne de Nauire, qu'il appuya contre la fenestre : comme la fille luy auoit enseigné, par où il monta fort legerement. La ieune fille congnoissant qu'elle auoit desormais perdu son honneur, pour garder lequel elle luy auoit par le passé esté quelque peu sauuage, pensant qu'elle ne se pouuoit donner à personne plus digne que

cestui-cy, & regardant qu'elle le pourroit introduire à l'emmener hors de là avecques foy, delibera de luy complaire en tout ce qu'il desiroit : & pour ceste cause elle auoit laissé la fenestre ouuerte, afin qu'il y peust passer plus soudainement. Quand Iean l'eut doncques trouuee ouuerte, il entra tout bellement dedans, & se coucha aupres de la ieune fille qui ne dormoit pas : laquelle auant que de faire autre chose, luy declara toute son intention, & le pria sur toutes choses de la tirer de là & de l'emmener avec foy : à laquelle Iean respondit qu'il n'y auoit chose au monde qui tant luy pleust : & que sans point de faute aussi tost qu'il seroit party d'avec elle, il donneroit si bon ordre que la premiere fois qu'il y retourneroit il l'emmeneroit. Et apres cecy s'estans embrassez avec tresgrand plaisir, ilz prindrent tel contentement qu'amour n'en peut donner de plus grand. Puis apres qu'ilz l'eurent reiteré plusieurs fois s'endormirent sans s'en appercevoir entre les bras l'un de l'autre. Le Roy à qui ceste fille pour la premiere fois qu'il l'auoit veüe auoit fort pleu, se souuenant d'elle, & se trouuant assez bien de sa personne, delibera encor qu'il fust presque iour, d'aller demourer quelque peu avec elle, & s'en alla secretelement avec quelcun de ses seruiteurs aux Cuues : & quand il fut entré au logis, il fit ouurir tout bellement la chambre où il sçauoit que la fille couchoit, là où estant entré avecque vne grande torche

allumee deuant luy, il regarda sur le liët, & veid qu'elle & Iean estoient couchez & embrassez ensemble, dont il fut soudainement fort courroucé, & luy monta la colere tellement (sans sonner mot) qu'il ne s'en fallut gueres qu'il ne les tuaist tous deux d'un poignart qu'il auoit à son costé : mais estimant que ce seroit laschement faict, non seulement à vn Roy, ains aussi à quelque homme que ce fust de tuer deux personnes nues & dormans, il se retint & pensa de les faire brusler publiquement. Et s'estant retourné deuers vn qui estoit avec luy, il luy dist : Que te semble de ceste meschante femme en qui i'auoye desia mis ma fantaisie ? Et apres il luy demanda s'il congnoissoit point le ieune homme, qui auoit tant eu de hardiesse que de luy venir faire en sa maison vn si grand outrage & desplaisir. Celuy à qui le demandoit respondit qu'il ne se souuenoit point de l'auoir iamais veu. Le Roy quand il fut forty de la chambre commanda que les deux pauures amoureux fussent pris & liez ainsi nudz comme ilz estoient, & que tout aussi tost qu'il seroit iour, ilz fussent menez à Palerme, & liez à vn poteau en la grande place, les reins tournez l'un contre l'autre, & qu'on les y tint iusques sur les neuf heures, afin qu'ilz fussent veuz d'un chacun, & apres qu'ilz fussent bruslez comme ilz auoient bien merité, & cecy dict, il s'en retourna fort courroucé à Palerme en sa chambre. Estant donc le Roy party, plusieurs

se mirent incontinent sur ces deux pauvres amoureux, lesquels on n'esueilla pas seulement, ains soudainement furent prins & liez sans aucune pitié. Ce que voyant les deux ieunes creatures s'ilz furent dolents, s'ilz eurent peur de mourir, s'ilz pleurerent, & s'ilz firent des regretz, il est bien ayse à le deuiner. Or suiuant le commandement du Roy, ilz furent menez à Palerme, & liez à vn poteau en la place, & en leur presence le bois & le feu furent preparez pour les brusler à l'heure que le Roy auoit commandé, où soudainement accoururent tous ceux de Palerme, & hommes & femmes pour voir les deux pauvres amoureux. Les hommes s'amusoient tous à regarder la fille, & tout ainsi comme ilz la louoyent d'estre belle par tout & bien proportionnee, les Dames ne plus ne moins qui couroient toutes pour regarder le ieune homme, le louerent de leur costé d'estre beau & merueilleusement bien faict : mais les pauvres infortunez amoureux se tenoient les testes baïssées de honte, & en plorant leur malheur, attendoient d'heure à autre la cruelle mort du feu. Et ce pendant qu'on les tenoit là iusques à l'heure determinee, tout le monde bruyoit par la ville de ceste faute qu'ilz auoient commise, tellement que le bruit vint iusques aux oreilles de Roger Dorie⁵, homme de tresgrande valeur, & lors Admiral de Sicile, lequel pour les voir s'en vint iusques au lieu où ilz estoient liez, où arriué, il regarda

premierement la fille que il trouua trefbelle : & apres voyant le ieune homme, il le recongneut sans trop y songer, s'approchant duquel de plus pres, il luy demanda s'il n'estoit pas Iean de Procide. A qui Iean (quand il eut leué la teste & recongneu iceluy Admiral) respondit. I'ay bien esté autre fois celuy que vous dictes, mais ie suis pour ne l'estre plus : Lors l'Admiral luy demanda quelle fortune l'auoit conduit à cela. A qui Iean respondit : Amour & la fureur du Roy. L'Admiral se fit conter le cas plus au long, & ayant le tout entendu de luy comme le faict auoit esté, & s'en voulant aller, Iean le rappella & luy dist : Pour Dieu Monsieur impetrez moy (s'il est possible) vne seule grace de celuy qui me faict estre ainsi. L'Admiral luy demanda. Et quelle? A qui Iean dist : Je voy que ie dois mourir bien tost : ie voudrois bien de grace que tout ainsi comme ie suis avec ceste ieune fille (que i'ay plus aymee que ma propre vie & elle moy) les reins tournent aux siens, & les siens aux miens, que nous eussions les visages tournés l'un deuers l'autre, afin que quand ce viendra que ie mourray ie puisse en voyant son visage m'en aller plus consolé. L'Admiral en riant luy dist, Je feray volontiers de sorte que tu la verras encores, tant que parauenture il t'en faschera. Et quand il fut party d'avec luy il commanda à ceux qui auoient la charge de faire ceste execution que sans auoir autre com-

mandement du Roy, ilz ne passassent plus outre que ce qui estoit faict, & sans arrester en place s'en alla vers le Roy : auquel (combien qu'il le vist courroucé) il ne laissa pourtant de luy dire son aduis, & luy dist : Sire en quoy t'ont offensé ces deux ieunes gens que tu as commandé d'estre bruslez là bas en la place ? Le Roy le luy dist. A quoy l'Admiral fuyuant son propos respondit. Certes la faute qu'ilz ont commise le merite bien : mais non pas de toy, & qu'il soit vray, tout ainsi que les fautes meritent punition : aussi les benefices meritent recompense, outre la grace & la misericorde. Cognois tu bien qui sont ceux-là que tu veux qu'on brulle ? le Roy respondit que non. Et ie veux dist l'Admiral que tu les congnoisses, afin que tu voyes combien tu te laisses conduire indiscrettement par les impetuositéz de ta collere. Le ieune homme est filz de Landolfe de Procide, propre frere de Messire Iean de Procide, par le moyen duquel tu és Roy & Seigneur de ce Royaume. La fille est fille de Marin Bolgare, la puissance duquel est cause aujourd'huy que ta maiesté ne soit chassée d'Ysque : ceux-cy outre cela sont ieunes, qui se sont longuement aymez ensemble : & contraintz d'amour, non pas pour vouloir faire desplaisir à ta maiesté, ont faict ce peché, si peché lon doit appeller ce que font les ieunes gens par amour, pourquoy doncques les veux tu faire mourir, là où avec grandz biens & pre-

fens tu les deurois honorer? Le Roy oyant cecy, & se tenant pour affeuré que l'Admiral luy disoit verité, n'ordonna pas seulement qu'on ne passast point outre, mais aussi eut regret de ce qu'il auoit faict. Au moyen dequoy il enuoya incontinent dire qu'ilz fussent desliez du poteau, & emmenez deuant luy, ce qui fut fait. Et ayant congneu entierement leurs qualitez, il aduifa qu'il falloit recompenser l'iniure à eux faicte par honneur & presens : parquoy les ayans faict vestir honnorablement, & sçachans qu'ilz estoient tous deux d'une mesme volonté, les fit marier ensemble, puis leur donna des dons magnifiques, & les enuoya trescontens à leur maison, où estans receuz avec tresgrande chere, ilz vesquirent apres longuement ensemble en ioye & plaisir.





NOUVELLE SEPTIESME.

Pour signifier les diuers trauaux & perilleux accidens causez par ces deux tant puissans Seigneurs Amour & Fortune Tirans de la vie humaine.

Theodore deuenu amoureux de Violante fille de messire Emeri son maistre, l'engrossa, dont il fut condamné à estre pendu & estranglé, & ainsi qu'on le menoit fouettant iusques au gibet, il fut recongneu par son pere. Parquoy il fut deslié, & espousa s'amy.



ES Dames qui estoient toutes en craincte d'entendre que les deux pauvres amoureux eussent esté bruslez, oyans qu'ilz estoient eschappez, louerent Dieu & s'en re-
fiouyrent toutes : puis quand la Royne eut veu que la nouuelle estoit acheuee, elle enchargea à Ma-dame Laurette de dire la suyuant, laquelle se print à dire ioyeusement :

Mes belles Dames, au temps que le bon Roy Guillaume regnoit en Sicile, il y auoit audiēt Royaume vn ieune gentilhomme nommé Messire Emeri, Abbé de Trappani, lequel (entre les autres biens de ce monde que Dieu luy auoit donnez) estoit fort bien garny d'enfans, parquoy ayant besoing de seruiteurs, & venans du pays de Leuant, certaines galleres de courfaires Geneuois qui auoient en costoyant l'Armenie prins plusieurs petitz enfans, il en acheta quelques vns, pensans qu'ilz fussent Turcz, entre lesquelz (combien que tous les autres ressemblassent bergers) il y en auoit vn qui sembloit estre plus gentil, & de meilleur regard que nul des autres, qui se nommoit Theodore : lequel deuenant grand (encor qu'il fust traicté comme serf) fut neantmoins esleué & nourry avec les enfans, de Messire Emeri, & tenant plus de son naturel, que de l'accident, commença à estre bien conditionné, & de bonne grace : de sorte qu'il pleut tant à Messire Emeri qu'il le fit libre, & croyant à la verité qu'il fust Turc, il le fit baptiser, & le nomma Pierre : puis le fit superintendant de ses affaires, se fiant beaucoup en luy. Or ainsi que les enfans de Messire Emeri creurent, aussi creut vne sienne fille nommee Violante, belle & delicate ? laquelle demourant trop à estre mariee par son pere, deuint par fortune amoureuse de Pierre. Et combien qu'elle l'aymast, & tint grand conte de toutes ses façons de faire : si auoit elle toutesfois honte

de luy declarer : mais amour la releua de ceste peine : par ce que Pierre l'ayant plusieurs fois espiee secrettement, en estoit deuenue tellement amoureux qu'il ne sentoit iamais aucun bien : sinon quand il la voyoit : toutes fois il craignoit fort que quelqu'un s'en aperceust, pensant faire en cecy, moins que bien : dont la fille qui le voyoit volontiers s'apperceut bien & pour luy donner plus de seureté, elle monstrois qu'elle en estoit (comme il estoit vray) trescontente. Et demourerent tous deux long temps en ces termes, sans s'oser dire aucune chose l'un à l'autre, combien que chacun le desirast grandement : mais ce pendant qu'ilz se consummoient ainsi egallement en l'amoureuse flamme, fortune (comme si elle eust voulu ce qui aduint) leur trouua la voye de chasser la peur qui les empeschoit. Qui fut que Messire Emeri auoit à vne demie lieuë hors la ville de Trappani vn fort beau lieu, auquel sa femme avec sa fille & quelques autres femmes & amis auoient souuentefois accoustumé d'aller par maniere de passe-temps : où ayant vn iour ceste Dame mené Pierre avec elle, & y seiournant, il aduint (comme nous voyons quelquesfois aduenir en Esté) que le ciel se couurit soudainement tout de nuees : au moyen dequoy la Dame & sa compagnie (afin que le mauuais temps ne les print là) se meirent en chemin pour retourner à Trappani, & s'en alloient le plus viste qu'ilz pouuoient : mais Pierre qui estoit ieune, & pa-

reillement Violante, cheminoient beaucoup plus fort, que ne faisoient sa mere ne sa compagnie : non moins paradventure poussez d'amour que de la peur du temps : & ayant desia tant de-uancé la mere & les autres : qu'on les auoit presque perdus de veüe, il aduint qu'apres plusieurs tonnerres, soudainement commença à venir vne grosse gresle & espesse, qui contreignit la mere & sa compagnie de se retirer chez vn Païsan, Pierre & la fille n'ayant point d'autre refuge, entrèrent en vne vieille mafure presque toute tombee, où personne ne demouroit, & en icelle souz vn peu de couverture (qui y estoit encor demouree) se ferrent tous deux : les contrainant la faute de couverture de se toucher, & ferrer pres l'vn de l'autre : lequel touchement fut occasion de reasseurer vn peu leurs cœurs & descouurir les amoureux desirs. Et lors Pierre commença le premier à dire : Pleust à Dieu qu'il ne cessast iamais de gresler, & que ie deusse tousiours estre comme ie suis. Et la fille dist : Certes ie le voudroy bien. Et de ces parolles : ilz vindrent à s'entreprendre par la main & à se la ferrer l'vn à l'autre : & de cecy à s'embrasser : & puis à baïser, tousiours gressant, & afin que ie ne voyse racontant tout par le menu, le temps ne se haussa iusques à ce qu'ilz eurent esprouué les dernieres fruitions d'amour : & donné ordre pour receuoir à l'aduenir secretement plaïsir l'vn de l'autre. Le mauuais temps cessa & en entrant en la ville qui estoit fort pro-

chaine de là, ilz attendirent la mere & s'en retournerent avec elle à la maison, là où quelquefois avec sage moyen & secret, ilz se rencontrerent prenant grande recreation ensemble, & tellement alla la besongne que la fille deuint grosse : qui fut à l'un & à l'autre merueilleusement desplaisant : au moyen dequoy elle vfa de tous les remedes possibles pour desgrosser : mais elle n'en sceut venir à bout. Pour laquelle chose Pierre craignant d'en perdre la vie, delibera de s'enfuyr & luy dist : Ce qu'oyant la fille elle luy respondit : Sans point de faute si tu t'en vas ie me tueray. A qui Pierre qui moult l'aymoit, dist : Comment veux tu mamie, que ie demeure icy ? Ta grosseffe descourira nostre faute : il te fera pardonné legerement : mais moy miserable, feray celuy à qui il faudra porter la peine de ton peché & du mien. A qui la fille dist : Pierre, mon peché se saura bien : mais du tien assure toy (si tu ne le dis) qu'il ne se saura iamais, Pierre luy dist : Puis que tu le me promets ainsi, ie demoureray : mais pense bien de me tenir ta promesse. La fille qui auoit celé sa grosseffe tant qu'elle auoit peu, voyant que son ventre croissoit si fort qu'elle ne le pouuoit plus cacher, se descourrit vn iour à sa mere en plourant tresamerement : & la suppliant de la vouloir sauuer. La mere dolente outre mesure luy dist mille iniures, & voulut sçauoir comment cecy s'estoit fait. La fille (afin que Pierre ne receust point de mal) forgea vne sienne menfonge tout

au contraire de la verité que la mere creut. Et pour celer la faute de sa fille, elle l'enuoya en vne maison qu'ilz auoient aux champs. Et là quand le terme d'accoucher fut venu, la fille criant (comme les femmes font) & ne pensant la mere que messire Emeri (qui n'auoit quasi iamais accoustumé de passer par là) y deust venir : il auint qu'ainsi qu'il reuenoit de voler, & qu'il passoit au long de la chambre où la fillecrioit, il entra soudainement dedans, s'esmerueillant de l'ouïr ainsi crier : & demanda qu'estoit cela. La mere voyant son mary ainsi suruenue, se leua toute dolente, & luy conta ce qui estoit auenu à leur fille : mais luy (moins prompt à croire que la mere n'auoit esté) dist qu'il n'estoit pas possible que la fille ne sceust de qui elle estoit enceinte & par-ainsi il vouloit sçauoir la verité : disant laquelle elle pourroit acquerir sa grace, autrement qu'elle fist son conte de mourir sans aucune misericorde. La mere se parforça tant qu'elle peut que son mary fust content de ce qu'elle luy auoit dit : mais tout cela n'y seruoit de rien : il vint en fureur l'espee au poing sur sa fille (laquelle ce pendant que la mere l'auoit entretenu en parolles auoit enfanté vn filz) & luy dist : Ou tu declareras qui est pere, de cest enfant, ou tu mourras, tout à ceste heure. La fille craignant la mort, rompit la promesse qu'elle auoit faite à Pierre, & luy decouurit le tout. Ce qu'oyant le cheualier, il deuint si desesperément courroucé qu'à peine se

ſceut il retenir qu'il ne la tuaſt. Mais apres qu'il eut dit ce que la colere luy faifoit dire, il remonta à cheual, & ſ'en vint à Trappani : & ayant conté toute l'iniure que Pierre luy auoit faite à vn meſſire Conrard qui eſtoit Capitaine pour le Roy en la ville, foudainement il fit prendre Pierre, auant qu'il ſ'en doutaſt, & luy feit donner ſur l'heure la queſtion lequel confeſſa tout ce qui auoit eſté fait. Et eſtant quelques iours apres condamné par le Capitaine d'eſtre fouetté par la ville, & apres pendu & eſtranglé par la gorge : Meſſire Emeri (aſin qu'il oſtaſt de ce monde en vne meſme heure, les deux pauvres amoureux & leur enfant) n'ayant encor appaiſé ſon courroux pour auoir conduict le pauvre Pierre à deuoir receuoir mort, mit du venin en vne coupe avec du vin, & le bailla à vn ſien ſeruiteur fort familier & vne eſpee toute nue avec cela & luy diſt : Va t'en avec ces deux choſes deuers Violante & luy dy de ma part qu'elle choyſiſſe tout à ceſte heure, l'une de ces deux mortz : ou de venin, ou de glaïue : ſinon que ie la feray mourir toute viue en la preſence de tout le monde, comme elle la merité : & quand tu auras fait cecy, tu prendras le fils qu'elle a fait n'aguères, & en donneras de la teſte contre la muraille, puis le donneras à manger aux chiens. Quand le pere eut donné ceſte cruelle ſentence contre ſa fille & ſon neveu, le ſeruiteur plus prompt à faire mal que bien, ſ'en alla au lieu où eſtoit la fille.

Pierre condamné, comme vous auez ouy, estoit mené fouettant au gibet, si passa comme il pleut à ceux qui guidoient la iustice deuant vne hostellerie, où estoient lors trois grands personnages d'Armenie, que le Roy de ce pays là enuoyoit ambassadeurs à Rome deuers le Pape, pour negocier de plusieurs grans affaires : à cause d'un passage qui se deuoit faire : & estans illec descendus, pour se refreschir & reposer quelques iours, & grandement honnored de tous les gentilzhommes de Trappani, & mesmement de messire Emeri, ces Ambassadeurs oyans passer ceux qui menoient Pierre, vindrent à la fenestre pour le veoir. Pierre estoit tout nud, de la ceinture en haut, avec les mains liees par derriere, lequel estant regardé par l'un d'eux qui estoit homme d'aage & de grande autorité, nommé Phinee, il luy veit vne grande tache rouge en l'estomach, non point paincte, mais naturellement empraincte en la peau, comme vous diriez que sont celles que les femmes nomment icy rozes : laquelle apperceuë, il se va soudainement souuenir d'un sien filz qui luy auoit esté prins, quinze ans y auoit, sur la marine de la Iazze par les courfaires : dont depuis il n'auoit iamais sceu auoir nouuelles : & considerant l'aage du pauvre malheureux qu'on fouettoit, il auisa que si son filz estoit viuant qu'il feroit de l'aage que cestui-là luy sembloit estre : parquoy voyant ce seing, il commença à sospçonner si c'estoit

point son filz : pensant que si ce l'estoit qu'il se deuroit encor souuenir de son nom, & de celuy de son pere, & de la langue Armenienne : Parquoy quand il fut pres de luy, il l'appelle : O Theodore : oyant laquelle voix Pierre, il leua incontinent la teste, & Phinee en parlant Armenien, luy dist : D'où és tu ? de qui és tu filz ? les fergens qui le menoient s'arrestèrent pour la reuerence de l'embassadeur, tellement que Pierre luy respondit : Je suis d'Armenie filz d'un qui se nommoit Phinee & ay esté transporté icy par ie ne sçay quelles gens. Ce qu'oyant Phinee, il congneut certainement que c'estoit le filz qu'il auoit perdu : parquoy en plourant il descendit en bas avec ses compagnons : & le courut embrasser parmy tous les fergens : & luy ayant ietté sur le dos un riche manteau qu'il portoit, pria celuy qui le menoit deffaire, d'attendre tant qu'il eust le commandement de le ramener, Cestuy-là respondit qu'il l'attendroit volontiers. Or auoit desia sceu Phinee l'occasion pour laquelle on menoit pendre cestui-cy par le bruit qui en auoit couru par tout, parquoy soudainement avec ses compagnons & leur famille, il s'en alla deuers messire Conrard, & luy dist : Monsieur, celuy que vous enuoyez faire mourir comme esclau, est libre, & mon filz, & est tout prest de prendre à femme celle qu'on dit qu'il a despucelee : & par ainsi plaife vous de faire surseoir l'exécution iusques à ce qu'on ait sceu si elle le veut

pour mary, affin qu'il ne soit trouué (si elle en est contente) que vous ayez fait contre la loy. Messire Conrard oyant que cestui-cy estoit filz de cest ambassadeur s'esmerueilla : & ayant aucunement honte de la faute de fortune confessa que ce que disoit Phinee estoit vray : si le feit retourner incontinent à la maison : & enuoya soudainement querir Messire Emeri, & luy conta tout cecy. Messire Emeri qui croyoit que sa fille & le petit filz fussent desia morts, fut le plus dolent du monde, de ce qu'il auoit fait, congnoissant bien que si elle n'estoit morte, que tout se pourroit fort bien rabiller : parquoy il enuoya tout courant là où estoit sa fille, afin que si on n'auoit fait son commandement qu'on ne le fist point, celui qui y courut trouua le seruiteur que Messire Emeri auoit enuoyé, lequel ayant le glaue & la poison mis deuant la fille : par ce qu'elle ne se despeschoit de prendre l'un où l'autre luy disoit iniures, & la vouloit contraindre d'en prendre l'un : mais quand il ouyt le commandement de son seigneur il la laissa : & s'en retourna vers luy, & luy dist comme le cas estoit. Messire Emeri trescontent de cela, s'en alla deuers l'ambassadeur Phinee, & en plourant s'excusa le mieux qu'il sceut de ce qui estoit interuenue, luy en demanda pardon : & l'asseurant que là où Theodore voudroit prendre à femme sa fille, il estoit trescontent de la luy donner. Phinee receut volontiers ses excuses, & respondit : Je

vueil & entend que mon filz prenne vostre fille : & où il ne la voudroit ie consent que la sentence donnee contre luy, soit executee. Estant doncques Phinee & Messire Emeri d'accord, ilz vont trouver Theodore au lieu où il estoit encor tout poureux de la mort, & ioyeux d'avoir trouué son pere : & luy demanderent sa volonté sur ceste chose. Theodore oyant que Violante seroit sa femme, s'il vouloit : sa ioye fut si grande qu'il luy sembla sauter d'enfer en paradis : & dist qu'il reputeroit cecy à vne tresgrande grace, là où chacun en seroit content. On enuoya pareillement à la fille pour scavoir son vouloir : laquelle oyant ce qui estoit auenu de Theodore, & ce qui en deuoit auenir, au lieu de ce qu'elle estoit n'agueres plus dolente que creature du monde en attendant la mort : vn long temps apres adioustant elle aucunement foy aux parolles qu'on luy disoit, se resiouit vn peu : & respondit que si elle pouuoit obtenir son desir en cecy, il ne luy fauroit auenir chose dont elle fust si contente que d'estre femme de Theodore : mais toutesfois elle feroit ce que luy commanderoit son pere. Ainsi doncques quand on eut fait par accord espouser la fille, il se feit vne tresgrande feste avec tresgrand contentement de tous les citoyens. La ieune mariee se confortant & faisant nourrir son petit filz, reuint dedans peu de temps apres plus belle que iamais. Et quand elle fut leuee de ses couches, & qu'on eut attendu que

Phinee fut retourné de Rome, elle luy fit la reuerence comme il appartenoit à vn pere, & luy fort content d'auoir vne si belle & honnestie ieune fille, ayant fait faire les nopces avec tresgrande chere & festins la receut pour fille & depuis tousiours pour telle la tint, & quelques iours apres ilz monterent, luy son filz, sa belle fille, & son petit neveu sur vne gallere & les emmena avec soy à la Iazze¹, où les deux amans demourerent tant qu'ilz vesquirent en paix & en repos.





NOUVELLE HVICTIESME.

Denotant qu'amour fait l'homme non seulement prodigue, mais encor ennemy de soy mesme, & que souuentefois l'aventure apporte tel effect que l'esprit humain ne pourroit faire le semblable.

Anastaise des Honnestes en ayment vne fille des Trauersaires despendit grandement de son bien, sans toutesfois estre aymé, & à la priere de ses parens s'en alla à vn sien lieu aux champs, nommé Quiaffi : où il veit chasser par vn cheualier, vne ieune fille qu'il tuoit : & puis la faisoit deuorer aux chiens. Si inuita ledit Anastaise ses parens, & ceux de celle qu'il aymoît, pour venir disner avec luy, ausquelz il feit pareillement voir despecer ceste ieune fille parquoy craignant celle qu'il aymoît qu'un tel inconuenient luy aduint, elle print Anastaise pour mary.



VSSI tost que ma-Dame Laurette se teut, Ma-Dame Philomene, par commandement de la Royne commença, & dist : Mes amyables Dames, tout ainsi comme la pitié est fort louee en vous, pareillement la cruauté est

rigoureusement vengée par la iustice diuine : ce que vous voulant faire cognoistre, & afin que ie vous donne matiere de la deschasser entierement de vous, ie suis contente vous dire vne nouuelle, non moins pleine de compassion que delectable.

Il y a eu autrefois à Rauenne, ville tresancienne de la Romaine, grand nombre de gentilhommes, entre lesquels y eut vn ieune homme nommé Anastaise des Honnestes : lequel par la mort de son pere & d'un sien oncle demoura riche sans fin : & estant à marier il deuint amoureux (comme font ieunes gens) d'une ieune fille de messire Paule Trauerfaire, de trop plus noble & ancienne maison qu'il n'estoit, prenant esperance de faire tant par ses moyens & trauaux, qu'elle l'aymeroit, lesquels encores qu'ilz fussent grans honnestes & louables, non seulement ne luy seruoient de rien, ains sembloit qu'ilz luy nuysoient, tant elle se monstroient cruelle, dure, & sauage envers luy : elle estant parauenture pour sa singuliere beauté ou noblesse si fiere & desdaigneuse, que luy ne chose qu'il desirast, ne luy estoit agreable. Ce qu'Anastaise supportoit mal ayfement, tant qu'il luy vint plusieurs fois volonté (apres auoir souffert beaucoup d'ennuy) de se tuer : toutesfois il s'en abstint : delibérant maintesfois en son entendement, de la laisser du tout ou de la hayr, si possible luy estoit, comme elle le haïsoit, mais il se tra-

uailloit en vain : car il sembloit que tant plus l'esperance diminuoit, & plus son amour multiplioit. Perseuerant doncques Anastaise en son amour, & en ses despeses desmesurees, il sembla à aucuns de ses parens & amis qu'il consommoit & sa personne & son bien, au moyen de quoy ilz luy conseillèrent beaucoup de fois qu'il s'en deuoit aller hors de Rauenne : & demourer en quelque autre lieu pour vn temps : par ce que le faisant ainsi, son amour, & pareillement ses despeses diminueroient. Anastaise fut vn long temps sans tenir conte de ce qu'on luy conseilloit : mais à la fin estant si fort pressé d'eux & ne pouuant plus dire de non, il dist qu'il le feroit. Parquoy ayant fait faire de grans preparatifs comme s'il eust voulu aller en France ou en Espagne, ou en quelque autre loingtain pays, il monta à cheual, & sortit accompagné de plusieurs siens amis hors de Rauenne, & s'en alla à vn lieu pres la ville, paraduventure vne lieuë & demie qui se nommoit Quiaffi, où ayant fait apporter des pavillons & tapisseries, il dist à ceux qui l'auoient accompagné qu'il vouloit demourer là, & qu'ilz s'en retournassent à Rauenne. S'estant donc arresté Anastaise en ce lieu, il commença à faire la plus triumpante & magnifique vie qui fut iamais faite, inuitant aujourd'huy les vns & demain les autres à disner & à souper comme il auoit accoustumé. Or aduint qu'vn vendredy quasi sur le commencement de May, qu'il fai-

soit vn tresbeau temps, luy rememorant en son entendement la cruauté de s'amie, il commanda à tous ses seruiteurs qu'ilz le laissassent tout seul pour resuer plus à son ayse, & s'en allant ainsi pas à pas, il se transporta en resuant iusques à la Pinniere. Et estant lors plus de dix heures, & luy entré dedans la Pinniere, environ vn cart de lieuë, ne se souuenant de dîner, ne d'autre chose, il luy fut soudainement auis qu'il oyoit vne voix de femme qui faisoit de tresgrandes plaintes, qui luy fit rompre le doux penser où il estoit, & haulsa la teste pour veoir que c'estoit, & voyant qu'il estoit en icelle Pinniere fut fort esbahi : puis regardant deuant soy, il vit venir par vn petit bois fort espais d'arbrisseaux & de buissons vne tresbelle ieune fille courant à luy, nuë, descheuelee, & toute esgratignee des branches & buissons, plorant, & criant mercy tant qu'elle pouoit, la suyuant à ses costez deux mastins grans & fiers, lesquelz en courant tresfort apres elle, la mordoient plusieurs fois cruellement, par où ilz l'ataignoient : au derriere d'elle, il veit aussi venir sur vn courfier noir, vn cheualier brun, fort courroucé à son visage, tenant vn estoc au poing la menassant avec parolles vilaines & espouuentables de la tuer. Ceste chose luy mit tout en vn instant admiration & estonnement en l'entendement, & à la fin compassion de la mal fortunee femme, de laquelle compassion nasquit le desir de la deliurer s'il

pouuoit, d'une telle mort & engoiffe : mais se trouuant sans armes courut prendre vne branche d'arbre au lieu d'un baston & commença à se mettre au deuant des chiens, & contre le cheualier : mais le cheualier qui vit cecy, luy cria de loin : Anastaise ne t'en empesche point, laisse faire aux chiens & à moy la punition que ceste meschante femme a meritee : & disant ainsi, les chiens la prindrent par les flans & l'arrestèrent : puis le cheualier y arriua qui descendit de cheual. Auquel Anastaise (apres qu'il se fut approché) dist : Je ne say qui tu es qui me cognois ainsi : mais ie te vueil bien dire que c'est vne grande lascheté à vn cheualier armé, de vouloir tuer vne femme toute nuë, & luy mettre ainsi les chiens aux costez comme si elle estoit vne beste sauuage, en bonne foy ie la defendray tant que ie pourray. Le cheualier luy dist lors : Anastaise i'ay esté de la mesme ville dont tu es : & me souuient que tu estois encor petit garçon, quand ie (qui fuz nommé messire Gui des Anastaises) estois trop plus amoureux de ceste-cy que tu n'es maintenant de celle des Trauerfaires, & pour sa fierté & cruauté mon malheur fut tel, que ie me tuay vn iour comme desesperé avec cest estoc que tu me vois au poing, & suis damné es peines eternelles : ceste cy qui fut ioyeuse desmesurément de ma mort, ne demoura gueres de temps apres qu'elle ne mourust, & pour le peché de sa cruauté, & du plaisir qu'elle

auoit eu de mes tourmens, ne s'en repentant point (comme celle qui croyoit auoir plus mérité que failly en cecy) fut pareillement & damnee en enfer, là où quand elle descendit, il nous fut donné pour commune peine, c'est à fauoir à elle de fuir deuant moy, & à moy (qui tant l'ay aymee par le passé) de la fuyure comme mortelle ennemie, & non point comme femme aymee, & toutes les fois que ie l'atain, ie la tue de cest estoc, dont ie me tuay : & l'ouure par les rains, & arrache hors de son corps ce cœur dur & froit, dedans lequel ne peurent iamais entrer n'amour ne pitié, avec ses autres entrailles comme tu verras à ceste heure, & les donne à manger à ces chiens : apres elle ne demeure gueres d'espace qu'elle (comme il plaist à la iustice de la puissance diuine) se releue comme si elle n'auoit esté morte, & recommence la douloureuse fuite, & moy & les chiens à la fuyure, & auient que tous les vendredis enuiron cest'heure, ie l'atain icy, où ie la desmembre comme tu verras, & ne pense pas que les autres iours nous nous reposions, car ie la trouue en d'autres lieux, esquelz elle a cruellement pensé ou fait quelque chose contre moy : & moy estant deuenu d'amy son ennemy comme tu vois, il me conuient la fuyure en ceste maniere, autant d'ans comme elle à esté cruelle de mois enuers moy : laisse moy donc executer la volonté de la diuine iustice, & ne te melle point d'y vouloir mettre empef-

chement : car tu ne pourrois. Anaftaife oyant ces parolles deuenü tout timide, & n'ayant quafi poil fur luy qui ne dreflast, fe reculant arriere & regardant la miserable ieune fille, commença à attendre tout paoureux, ce que feroit le cheualier, lequel quand il eut acheué fon parler courut fus comme vn chien enragé l'estoc au poing, à ceste ieune femme, laquelle eftant à genoux, & tenuë bien fort des deux mastins luy crioit mercy, à laquelle il donna de toute fa force par le milieu de l'estomach, & la perça de part en part, & tout auffitost que la fille eut receu ce coup, elle tomba fur le visage, tousiours plorant & criant, & le cheualier ayant pris vn couteau l'ouurit par les reins, & en tira le cœur, & tout ce qui est autour, qu'il ietta aux mastins : lesquelz comme fort affamez incontinent le mangerent : & bien tost apres la ieune fille (comme s'il n'auoit rien esté de tout cecy) soudainement se leua debout, & commença à fuir vers la marine, & les chiens apres elle qui tousiours la deffiroient, & le cheualier quand il fut remonté à cheual, & qu'il eut reprins son estoc, recommença à la fuyure tellement qu'en peu d'heure ilz s'esloignerent de forte qu'Anaftaife les perdit de veüë. Lequel ayant veu ces choses fut grand piece en autant de peur que de compassion. Et quelque temps apres il luy vint en l'entendement que ceste chose luy pourroit beaucoup seruir : puis qu'elle auenoit tous les

vendredis. Parquoy ayant remarqué le lieu s'en retourna vers ses gens, & apres quand il luy sembla bon, il enuoya querir à Rauenne plusieurs de ses parens & amis, & leur dist : Vous m'auez long temps importuné que ie discontinuasse de plus aimer ceste mienne ennemie, & que ie misse fin à la grande despence que ie faisois, ce que suis tout prest de faire : pourueu que vous me impetriez vne grace, qui est que vendredy prochain messire Paule Trauerfaire avec sa femme & sa fille & toutes les autres femmes leurs parentes, & celles qu'il vous plaira qui y soient, viennent dîner icy avecques moy, & pourquoy ie desire cecy, vous le verrez lors. Il sembla à ceux cy que cela estoit bien aisé à faire. Parquoy quand ilz furent retournez à Rauenne, & qu'il fut temps, ilz inuiterent ceux que vouloit Anastaise. Et combien qu'il y eust de la difficulté, de pouuoir mener la fille qu'Anastaise aymoît, toutesfois elle y alla avec les autres femmes. Anastaise fit apprestier à dîner magnifiquement, & fit dresser des tables souz ces pins, à l'entour desquelz il auoit veu ainsi dessirer & mettre en piece la cruelle dame. Et ayant fait asseoir les hommes & les femmes à table, il ordonna si bien son fait, que la ieune fille qu'il aymoît, fut assise iustement vis à vis du lieu où le cas deuoit aduenir. Estans doncques venuz sur la fin du dîner, chacun commença à ouir le bruit desesperé de la pauvre femme chassée, de

quoy ilz s'esmerueillerent tous bien fort, & demandant que c'estoit, & personne ne le sachant dire, ilz se leuerent tous debout, & regardans que ce pouuoit estre, ilz virent la dolente ieune femme avec le cheualier, & les chiens qui incontinent pres furent là parmy eux. Le bruit fut fait grand contre les chiens & contre le cheualier, & plusieurs s'auancerent pour ayder à la ieune femme : mais le cheualier parlant à eux comme il auoit fait à Anastaise, non seulement les fit reculer arriere, ains les estonna tous & les remplit d'admiration & faisant ce qu'il auoit fait l'autre vendredy, autant de femmes qu'il y auoit (dont plusieurs estoient parentes de la miserable femme, & du cheualier, & qui se fouuenoient de l'amour & de la mort de luy) plorerent toutes aussi chaudement comme si elles eussent veu faire cela à elles mesmes. Ceste chose finie (& apres que la pauvre femme & le cheualier s'en furent allez leur chemin) tous ceux qui auoient veu ce mystere entrèrent en plusieurs & diuerses opinions : mais entre les autres qui furent plus espouuentez, ce fut la cruelle ieune fille qu'Anastaise aymoît : laquelle auoit veu & entendu par le menu tout l'affaire, & cogneut que toutes ces choses touchoient à elle, plus qu'à nulle autre personne qui y fust, se fouuenant de sa cruauté dont elle auoit tousiours vsé enuers Anastaise, tant que desia il luy estoit auis qu'elle fuyoit deuant luy tout courroucé, & qu'elle auoit les

matins à ses flancs : tellement que la peur qui luy vint de cecy fut si grande, qu'à fin que telle chose ne luy auint, elle ne se vit iamais de loisir (combien que elle eust tout celle nuit pour y penser) qu'ayant conuertie la haine en amour, elle n'enuoyast secrettement une fienne fidelle chambrière à Anastaise pour le prier de sa part de la venir veoir : pource qu'elle estoit toute deliberée de faire tout ce qu'il luy plairoit. A laquelle Anastaise fit response, que cecy luy estoit fort agreable : mais s'il luy plaisoit, il ne vouloit recevoir plaisir d'elle sinon avec son honneur : c'est à sçavoir la prenant pour femme. La fille qui bien sçauoit qu'il n'auoit tenu sinon à elle qu'elle n'auoit esté femme d'Anastaise, luy fit response qu'il luy plaisoit tresuolontiers. Parquoy estant elle mesme messagere enuers ses pere & mere leur dist, qu'elle estoit contente d'espouser Anastaise : dont ilz furent trescontens. Et le dimanche ensuyuant Anastaise l'ayant espousée & fait ses noces vesquit depuis longs temps en grand contentement avec elle. Ceste peur ne fut seulement occasion de ce bien : ains elle fut cause que toutes les femmes de Rauenne, en deuindrent si paoureuses quelles ont tousiours esté depuis plus complaisantes aux prieres des hommes qu'elles n'auoient esté au parauant.



NOUVELLE NEUVVIESME.

*Sous laquelle se demonstre la courtoisie d'un vray
amant, & la magnanimité d'une vaillante
Dame.*

*Federic des Alberigui amoureux d'une femme
de laquelle il n'estoit point aymé despendit tout
son bien en gentilleffes & honnestetez, se con-
sommant entierement : tellement qu'il ne luy
demeura qu'un faucon : & n'ayant autre
chose pour donner à disner à s'amie qui le vint
veoir, il le fait rostir : dont elle sachant ceste
honnesteté, changea d'opinion, & le print à
mary, le faisant riche homme.*



A-DAME Philomene auoit mis fin
à son parler, quand la Royne
voyant que c'estoit à elle (à cause
du priuilege reserué à Dioneo) dist
avec un visage riant. C'est à ceste
heure à moy, de faire mon conte, & ie le feray
volontiers : en vous contant mes cheres dames

vne nouuelle semblable en partie à la precedente, non seulement pour vous faire cognoistre combien voz courtoisies ont de pouuoir enuers ceux qui ont le cœur gentil : mais aussi à fin que vous appreniez : d'estre de vous mesmes liberales où il appartient des recompenses que vous devez, sans que les distributions s'en fassent tousiours par fortune laquelle les donne, non pas avec discretion, mais le plus souuent sans consideration au premier qui se presente.

Vous devez doncques sauoir que Coppe de Bourguese Dominique, qui fut en nostre cité, & parauenture est encores homme de grande reuerende autorité en nostre temps, & digne d'eternelle memoire plus certes par ses vertus & louables conditions, que par la noblesse de ses predecesseurs, estant desia sur ses vieux iours, prenoit plaisir de deuiser plusieurs fois des choses passees avec ses voisins & autres choses qu'il fauoit le mieux faire, par meilleur ordre, avec plus grande memoire, & plus beau langage, que nul autre qu'on ait veu. Si auoit acoustumé de conter entre ses autres belles choses, qu'il y eut autresfois à Florence vn ieune gentil-homme nommé Federic, filz de messire Philippes Alberigui, prisé & estimé en faits d'armes & de gentillesse par dessus tout autre ieune gentilhomme de Thoscane : lequel Federic (comme le plus souuent auient des gentilzhommes) deuint amoureux d'une gentillefemme nommee ma-dame Ieanne, tenuë en

son temps des plus belles & gracieuses qui fussent dans Florence. Pour laquelle & afin qu'il peust acquerir son amitié, il faisoit festins, ioustes tournois, & tous autres faits d'armes, & outre ce de grands presents, & despendoit son bien, sans rien espargner : mais elle non moins honneste que belle, ne se foucioit aucunement de toutes ces choses qu'il faisoit pour elle, & encores moins de luy qui les faisoit. Despendant doncques Federic beaucoup plus que sa puissance ne portoit, & n'acquérant rien, ses facultez (comme il auient aisément) diminuoient de sorte, qu'il en deuint si pauvre qu'il ne luy demeura sinon vne pauvre petite metairie, du reuenue de laquelle il viuoit escharcement, ayant encores avec tout cela vn faucon des meilleurs du monde. Parquoy aymant plus que iamais ceste dame, & voyant qu'il ne pouuoit plus viure en la ville comme il desiroit, s'en alla demeurer aux champs, là où estoit sa pauvre metairie & volant là quand il pouuoit, en suportant patiemment sa pauvreté sans requerir personne. Auint vn iour qu'estant ainsi deuenue à l'extremité, le mary de ma-dame Ieanne fut malade, & se voyant prochain de la mort fit son testament par lequel il laissa vn sien filz desia grandet, heritier de tous ses biens & richesses qui estoient grandes, & apres luy, s'il auenoit qu'il mourust sans hoir legitime, substitua sa femme qu'il auoit fort aymee : puis deceda. Quand doncques ma-dame Ieanne

se trouua vefue, elle s'en alla durant l'esté (comme c'est la coustume des femmes de nostre ville) aux champs en vne sienne maison assez prochaine de celle de Federic. Au moyen dequoy il aduint que ce garçonnet commença à prendre grande priuauté avec Federic, & se delecter des chiens & d'oyseaux : dont ayant veu voler plusieurs fois le faucon de Federic, il luy plaifoit si merueilleusement, qu'il desiroit fort de l'auoir, toutesfois il ne l'osoit demander, voyant qu'il l'aimoit tant. En ces entrefaites auint que le ieune garçon tomba malade, dont la mere fort dolente (comme celle qui n'auoit que cestuy-là, & quelle aymoît fort) ne cessoit tout au long du iour estant aupres de luy, de le conforter, & plusieurs fois luy demandoit s'il y auoit quelque chose qu'il desirast le priant de luy dire, & qu'il s'asseurast que s'il estoit possible de l'auoir, elle mettroit peine qu'il l'auoit. Le ieune garçon oyant tant de fois toutes ces belles offres, luy dist : Ma mere, si vous pouuez tant faire que ie puisse auoir le faucon de Federic, ie pense que ie seray bien tost guery. La dame oyant cecy demoura quelque peu à refuer & commença à penser ce qu'elle deuroit faire : car elle scauoit que Federic l'auoit longuement aymee, & qu'il n'en auoit iamais eu seulement vn regard : parquoy elle disoit en soy-mesmes, comment enuoyeray-ie : ou iray demander ce faucon, qui est, à ce que i'ay entendu le meilleur qui vola

oncques, & outre ce, cest oyseau le fait viure au monde. Comment feray-ie bien si despourveuë de sens de le vouloir oster à vn gentilhomme à qui n'est demouré autre recreation que ceste là : Par ainsi se trouuant en tel pensément bien empeschée, encor qu'elle fut trefcertaine de l'auoir, si elle le demandoit (ne sachant que dire) ne respondoit rien à son filz : mais demouroit toute pensue. A la fin l'amour de lenfant la vainquit de sorte qu'elle delibera à part soy pour le contenter (quoy qu'il en deust estre) de n'y enuoyer point : mais d'y aller elle mesmes pour le demander, & de le luy apporter, & respondit à son filz : Mon filz resiouyffez vous, & pensez seulement à vous guerir : car ie vous promets que la premiere chose que ie feray demain matin, ce sera de l'aller querir, & le vous apporteray : dont le petit garçon deuint si ioyeux, que ce iour mesme il amanda quelque peu. La dame le iour ensuyuant s'en alla par maniere d'esbat avec vne autre femme qu'elle print pour luy faire compagnie, à la petite maisonnette de Federic, & le firent apeller. Il estoit par fortune ce iour là en vn sien iardin qu'il faisoit acoustrer, par ce qu'il ne faisoit lors temps pour voler, lequel oyant que ma-dame Ieanne estoit à la porte qui le demandoit, s'en esmerueilla grandement & y courut tout ioyeux, la saluant reuerenment, & elle le voyant venir luy alla au deuant avec vne grace de dame fort honneste,

& dist : Dieu vous gard seigneur Federic, ie suis venuë icy pour vous recompenser des travaux que vous avez euz parcy deuant pour moy, lors que vous m'aymiez plus qu'il ne vous eust esté besoin, & la recompense fera telle que ie delibere de dîner ce matin priuément avec vous, & ceste mienne compagne. A qui Federic respondit en toute humilité, madame il ne me fouient point d'auoir iamais eu perte ne dommage pour vous, mais au contraire i'ay tant eu de bien, que si iamais i'ay vallu quelque chose, cela est venu de voz merites, & par l'amitié que ie vous ay portee, & pour certain ie reputé à trop plus grande grace, & ay trop plus pour agreable ceste vostre liberalité de m'estre venu voir, que ie ne ferois si on me donnoit de rechef autant de bien à despendre comme i'en ay despendu par cy deuant, combien que vous foyez venuë visiter vn pauvre hôte. Et cecy dit la receut honteusement en sa petite maison & d'icelle la mena en son iardin, & ne ayant là, par qui luy faire tenir compagnie dist : Ma-dame puisque ie n'ay icy personne, ceste bonne creature, femme de ce laboureur vous tiendra compagnie, ce pendant que i'iray faire mettre la nappe. Le pauvre Federic bien que sa necessité fust extreme, si est-ce qu'il ne s'estoit point encor tant aperceu comme lors (ores qu'il en eust esté besoin) d'auoir despendu desmesurément tout son bien : mais ne se trouuant ceste

matinee aucune chose dequoy pourroit faire honneur à la dame, dont de dueil qu'il en auoit il estoit presque enragé : maudissant en soy mesmes sa fortune, couroit ores çà, & ores là, comme homme qui feroit hors de foy, & ne se trouuant denier ne maille, ne gage pour en auoir, aussi que l'heure estoit desia tarde, & le desir toutesfois grand de faire honneur de quelque chose à la gentillefemme, & ne voulant neantmoins emprunter ou requérir non pas autrui, mais ne seulement son laboureur, son bon faucon luy vint soudainement deuant les yeux, que il vit sur la perche en sa salette : parquoy n'ayant autre chose à quoy recourir, il le print, & le trouua si gras que il pensa que ce feroit viande digne d'une telle dame, & par ainsi sans y songer plus auant, il luy tira le col, & le fit incontinent plumer par une fienne pauvre chambriere, & quand il fut plumé le fit mettre en la broche & rostir en diligence : puis ayant dressé la table, & mis la nappe, & des seruiettes fort blanches, dont il en auoit encores quelque peu, il s'en retourna avec un visage ioyeux vers la dame au iardin, & luy dist que tout ce qu'il auoit peu trouuer pour dîner estoit prest. Parquoy la dame & sa compagnie se leuerent & s'en allerent mettre à table ou sans fauoir qu'ilz mangeoient, mangerent le bon faucon, avec Federic, qui les seruoit de bien bon cœur. Et quand ilz furent leuez de table, & quelles eurent esté quelque

temps avecque luy en plaissant deuis, il sembla à la dame qu'il estoit temps de luy dire ce pourquoy elle y estoit venuë, si commença à parler à Federic ainsi benignement : Federic s'il vous souuient encores de vostre vie passée, & de mon honnesteté, que vous auez parauenture reputée rudesse & cruauté, ie ne fay point de doute que vous ne vous deuiez esmerueiller de ma presumption : quand vous faurez l'occasion pour laquelle ie suis expressement venuë icy : mais si vous auiez des enfans ou que vous en eussiez eu, par lesquels vous eussiez peu cognoistre combien est grande l'amour qu'on leur porte, ie me tiendrois toute asseuree que vous m'excuseriez en partie : mais comme ainsi soit que vous n'en ayez point, moy qui en ay vn, ne puis pour ceste cause fuir les loix communes des autres meres, les forces desquelles loix estant moy contrainte de fuyure, il faut que contre ma volonté, & tout raisonnable deuoir, ie vous demande vn don que ie fay certainement que vous estimez beaucoup, comme la raison le veut, parce que vostre extreme fortune ne vous a laissé autre plaisir, autre passetemps n'aucune autre consolation, que cestuy là. c'est vostre faucon duquel mon petit filz a prins vn tel desir, que si ie ne le luy porte, ie crains qu'il empire tellement en la maladie qu'il a qu'il s'en ensuyue chose pour laquelle ie le perdray : parquoy ie vous supplie, non pour l'amytié que vous me portez : car

vous n'y estes point tenu : mais pour vostre gentilleſſe, qui s'eſt touſiours monſtree plus grande en vous pour faire volontiers plaifir, que en homme qui fut onc, qu'il vous plaife de le me donner à fin que ie puiſſe dire que i'ay par vostre moyen fauué la vie à mon filz, & vous que par cela vous l'ayez perpetuellement obligé à vous. Federic oyant ce que demandoit la Dame, & congnoiſſant qu'il ne l'en pouuoit ſeruir, pource qu'il le luy auoit donné à manger, commença en la preſence d'elle, à larmoyer, auant que de pouuoir reſpondre vne ſeule parolle. Ce que voyant la dame elle creut au commencement que ſes larmes vinſſent plus de dueil de perdre ſon faucon que d'autre choſe, & quaſi elle fut preſte de dire qu'elle ne le vouloit point. Toutesfois elle s'en retint, & attendit la reſponſe de Federic apres le pleurer, lequel diſt ainſi. Ma-dame depuis l'heure qu'il pleuſt à Dieu que ie miſſe mon amour en vous, i'ay reputé que la fortune m'a eſté contraire en pluſieurs choſes, & de fait ie me ſuis plainct d'elle : mais toutes ont eſté legeres & ayſees à ſupporter au pris de ce qu'elle me fait preſentement endurer : dont ie n'auray iamais repos en mon entendement, conſiderant que vous eſtes venuë icy en ma pauvre maiſon où ce pendant que i'eſtoye riche vous ne daignastes oncques venir, & deſirez auoir de moy vn petit don, & qu'elle ayt fait de forte que ie ne le vous puis donner, & la cauſe pourquoy, ie la

vous diray en peu de parolles. Tout aussi tost que j'ay ouy que de vostre grace vous vouliez dîner avec moy, ayant esgard à vostre excellence, & à ce que vous meritez j'estimay qu'il estoit chose raisonnable que ie vous deuoie traiter de viandes plus exquises selon ma petite puissance, que celles dont on a acoustumé de traiter generalement les autres personnes : parquoy me souuenant du faucon que vous me demandez & de sa bonté, ie pensay que ce seroit vne viande digne de vous, & ce matin vous l'auez eu tout rosty sur vostre assiette, lequel ie croyoye auoir tresbien employé : mais voyant ores que vous desirez de l'auoir en autre sorte, ce m'est vn si grand dueil & desplaisir (voyant que ie ne vous en puis contenter) qu'il me semble que ie n'auray iamais mon esprit content. Et cecy dit, pour tesmoignage de son dire, il fit apporter deuant elle les plumes, les pieds & le bec. Ce que voyant la dame elle le blasma premierement, d'auoir tué vn tel Faucon pour donner à manger à vne femme, & apres, elle loua en soy-mesme grandement la grandeur de son cœur, lequel pauvreté n'auoit peu ny ne pouuoit abbaïsser : puis quand elle se vit hors d'esperance d'auoir le faucon, & quelle fut par cela entree en grande doute de la santé de son filz, elle mercia Federic de l'honneur qu'il luy auoit fait, & de son bon vouloir, & se partit d'avec luy toute melancholique, & s'en retourna vers son filz

lequel : ou de facherie qu'il n'auoit peu auoir le Faucon, ou pour la maladie qui estoit grande, mourut bien tost apres : dont la mere fut grandement dolente. Et apres qu'elle eust esté quelque temps pleine de pleurs & de larmes, ses freres la voulurent plusieurs fois contraindre à se remarier : par ce qu'elle estoit demouree fort riche, & encores ieune. Parquoy, combien qu'elle eust esté contente de ne se remarier point, se voyant ainsi pressée, elle se va ainsi souuenir de l'honnesteté de Federic, d'auoir tué vn tel Faucon pour la traiter, & dist à ses freres : ie demouroye volontiers s'il vous plaisoit sans me marier : mais s'il vous plaist que ie le soye, asseurez vous que ie ne prendray iamais mary, si ie n'ay Federic d'Alberiguy. A laquelle ses freres se moquans d'elle dirent : Sotte qu'est ce que tu dis ? comment le veux-tu ? Il n'a chose qui soit en ce monde. Aufquelz elle respondit : Je sçay bien qu'il est ainsi comme vous dites : mais i'ayme mieux vn homme qui ait besoin de richesse, que richesse qui ait besoin d'homme. Les freres oyans sa volonté, & cognoissans que Federic estoit tres-honneste gentilhomme, encor qu'il fust pauvre, la luy donnerent comme elle voulut, avec tout son bien. Lequel se voyant auoir pour femme vne telle Dame, & qu'il auoit tant aymee, & outre tout cecy, se sentant tresriche, deuint meilleur mesnager, & vsa ses iours avec elle en grand plaisir & contentement.



NOUVELLE DIXIESME.

Reprenant la malice des jennes impudiques, & reprouuant la Sodomie.

Pierre de Vinciolo estant aller soupper vn iour hors de sa maison, sa femme fit venir vn ieune gars qu'elle aymoît, lequel fut trouué & surpris par le mary qui cogneut la tromperie de sa femme : avec laquelle il demoura neantmoins d'accord, pour sa meschanceté & ordure.



A nouuelle de la Royne estoit acheuee & nostre Seigneur loué de tous de qu'il auoit si dignement recompensé Federic, lors que Dioneo, qui iamais n'attendoit qu'on luy commandast de dire la sienne, commença ainsi : ie ne sçay si ie dois dire que ce soit vice accidental, & par la mauuaistié des complexions, suruenue entre les mortelz, ou bien si c'est peché en nature de rire tousiours des

mauuaifes chofes, que des bonnes œuures, mefmement quand telles chofes ne nous attouchent en rien. Et pource que toute la peine que i'ay autresfois prife, & fuis tout à cefte heure pour prendre, n'ay iamais tafché à autre fin, finon pour vous ofter de melancolie & vous donner plaifir, encores que la matiere de la nouuelle que ie veux dire foit en partie (mes Dames) vn peu moins qu'honnefte, fi eft ce que ie la vous diray : pource qu'elle vous pourra donner plaifir, & vous autres en l'efcoutant, en ferez ce que vous accouftumez de faire, quand vous eftans entrez és iardins, eftendez la main delicate pour cueillir les rofes, & laissez les efpires à part. Ce que vous ferez laiffant demourer le mefchant homme dont ie veux parler en mal an, avec fa deshonnefteté, & rirez des amoureufes tromperies de fa femme, en ayant compaffion des malheurs d'autrui, ou il en eft befoing.

Il y eut n'a pas encor long temps à Peroufe vn riche homme nommé Pierre de Vinciolo, lequel print femme en mariage plus parauenture pour tromper autrui, & diminuer la commune opinion que tous les Peroufins auoient eu de luy, que pour defir qu'il eut d'efre marié, & fut la fortune tant conforme à fon appetit que la femme qu'il print, eftoit vne ieune fille grande & puiffante de tous fes membres, d'un poil roux, & enflambee, qui eust pluftoft defiré d'auoir deux maris qu'un, là

où elle fut donnée à vn qui auoit bien son cœur à autre chose qu'à elle. Ce que congnoissant la femme par succession de temps, & se voyant belle & fresche, & se sentant gaillarde & puissante de ses membres, s'en commença à fascher bien fort, & en auoit quelque fois de vilaines parolles avec son mary, & quasi tousiours en noise. Apres voyant que cecy pourroit plustost estre sa consommation que l'amendement de la meschanceté de son mary, elle dist en soy-mesmes : Ce malheureux laisse de habiter avec moy pour vouloir par ses meschancetez aller en galloches par le chemin sec : mais aussi ie m'essayeray de porter vn autre en Nauire par temps de pluye : ie le prins pour mary & luy apportay bon & gros mariage, sçachant qu'il estoit homme, & croyant qu'il aymast ce que ayment & doiuent aymer les hommes, & si ie n'eusses pensé qu'il eust esté homme, ie ne l'eusse iamais prins, luy qui sçauoit bien que i'estoye femme, pourquoy me prenoit il s'il abhorroit ainsi les femmes ? cecy ne se doit point endurer : si ie n'eusse voulu estre du monde, ie me fusse faicte Nonnain, & voulant estre du monde comme ie le veux, & le suis, si i'attends plaisir & contentement de cestuy-cy, ie pourray parauenture en attendant en vain deuenir vieille, & quand ie le feray & que ie me raduiferay, ie perdray mon temps à me douloir d'auoir perdu ma ieunesse : pour consoler laquelle il m'en monstre bien le chemin,

en me voulant faire prendre plaisir, de ce à quoy il se delecte, lequel mien plaisir quand ie le prendray fera louable en moy : là où en luy le sien est fort à blasmer : car i'offenseray seulement les loix : au lieu qu'il offence les loix & la nature. Ayant doncques la bonne Dame vn tel pensément en sa teste : & par aventure plus d'une fois elle s'accointa pour donner secretement effect à cecy, d'une vieille qui sembloit à voir vne saincte n'y touche, qui donne la bechee aux Serpens : laquelle alloit tousiours avec ses patenostres au poing, à tous les pardons de la ville, ne iamais parloit d'autre chose que de la vie des sainctz Peres, ou des playes de sainct François, tellement qu'elle estoit quasi tenue de tout le monde pour vne vraye saincte, & quand elle eut choisy heure propice, elle luy descouvrit entierement son intention. A qui la vieille dist : Ma fille (Dieu qui sçait toutes choses) sçait que tu feras tresbien : & quand tu le ferois pour autre raison, si le dois tu faire, & pareillement toute autre ieune femme, pour ne perdre point le temps de vostre ieunesse, pource qu'il n'est regret semblable (à celuy qui a quelque iugement) que d'auoir perdu le temps. Et dequoy tous les Diables seruons nous depuis que nous sommes vieilles, sinon de garder les cendres autour du foyer ? Si quelqu'une le sçait ou qu'elle en puisse rendre tesmoignage, ie suis vne de celles là : car maintenant que ie suis si

vieille, ie congnois (non fans tresgrandes & ameres poinctures de l'esprit) le temps que i'ay laissé aller sans profit : & bien que ie ne l'aye tout perdu : car ie ne voudroye pas que tu creusses que i'eusse esté si sotte, si n'ay-ie pourtant faict ce que i'eusse bien peu faire, dont quand il m'en souuient me voyant ainsi faicte comme ie suis, qui ne trouueroye pas qui me donnaist du feu pour allumer mon tison : Dieu sçait quelle douleur i'en fents. Des hommes il n'en aduient pas ainsi, ilz naissent bons à mille choses, non seulement à ceste-cy, & la pluspart valent mieux estans vieux que ieunes : mais les femmes ne sont faictes pour autre chose sinon pour faire cela & des enfans, & pour cela on les ayme : & si tu ne t'en apperçois par autre moyen, tu t'en dois apperceuoir à cecy que nous sommes tousiours prestes à faire cela : ce qui n'adient pas ainsi des hommes. Et outre ce, vne femme tariroit plusieurs hommes, là où beaucoup d'hommes ne pourroient faouler vne seule femme, & pource que nous sommes en ce monde pour cela, ie te dy de rechef que tu feras tresbien, de rendre à ton mary pain pour gasteau : tellement que ton ame n'ayt rien à reprocher à la chair, quand tu feras vieille. Nous n'auons rien en ce monde : sinon autant que nous y en voulons prendre, & mesmement les femmes, auxquelles il est plus conuenable d'employer le temps quand elles l'ont qu'aux hommes : parce que tu peux bien voir que

quand nous sommes vieilles, il n'y a mary n'autre qui nous vueille voir : ains nous chassent en la cuisine à dire des fables avec la chatte, ou à conter les potz & les escuelles : & qui pis est, on faict des chansons de nous, & disent qu'aux ieunes il faut les bons morceaux, & aux vieilles les estranguillons, & plusieurs autres choses. Parquoy afin que ie ne te tienne plus en parolles ie t'ose bien tant dire que tu ne pouuois descouurir ton intention à personne du monde qui te fust plus profitable que moy, parce qu'il n'en y a point de si fourby à qui ie ne prenne la hardiesse de dire ce qui sera necessaire, ne si dur ou sauuage, que ie n'adoucisse bien, & que ie ne le face venir à ce que ie voudray. Ne te soucie seulement que de me monstrier celuy qui te plaist, & laisse apres faire à moy : mais souuienne toy ma fille d'une chose que tu m'ayes pour recommandee : car ie suis pauvre personne, & veux dorefnauant que tu sois participante à tous les pardons que ie gagneray & à toutes les patenostres que ie diray, afin que nostre Seigneur face lumiere & chandelle à tous tes amys trespassez, à tant elle mit fin à son parler. La ieune femme demoura d'accord avec elle que s'il luy aduenoit de voir vn ieune garçon qui passoit souuentesfois par ce quartier (dont elle luy dist tous les signes) qu'elle sceust ce qu'il voudroit faire, & luy ayant donné vn morceau de lard, l'en enuoya. La vieille auant peu de iours apres luy mit

secrètement celuy que elle luy auoit dict en sa chambre, & de là à peu de temps vn autre, comme ilz venoient à gré à la ieune dame, laquelle encor qu'elle eust tousiours peur de son mary n'en perdit pas vne seule fois, si elle pouuoit. Aduint vn soir que son mary estant inuité d'aller souper avec vn sien amy nommé Hercolan : icelle ieune femme donna charge à la vieille qu'elle luy fist venir vn ieune gars qui estoit des plus beaux & des plus agreables de Perouse : ce qu'elle fit incontinent, & s'estant la femme mise à table avec le ieune homme pour souper, voicy le mary qui crie à la porte qu'on luy ouure l'huys. La femme l'oyant se tint pour morte, toutesfois desirant s'il estoit possible de cacher le ieune homme n'ayant l'entendement de l'enuoyer, ou de le faire cacher ailleurs, elle le fit cacher en vne petite gallerie ioignant la chambre où ilz soupoient, souz vne cage à poullailles, & y iecta dessus vn meschant sac qu'elle auoit fait ce iour, & cecy faict, elle fit incontinent ouvrir l'huys à son mary, auquel quand il fut entré, elle dist : Vous avez bien tost deuoré ce souper, Le mary respondit : Nous n'en auons pas seulement tasté. Comment est-il possible, dist la femme ? Ainsi que Hercolan (dist le mary) sa femme & moy estions desia mis à table, nous auons ouy pres de nous quelqu'un esternuer, dont nous n'auons faict conte pour la premiere ne pour la seconde fois, mais celuy qui auoit

esternué, encores pour la troiefme, quatriefme & cinquiefme fois, & plusieurs autres nous a faiët tous esbahir : au moyen dequoy Hercolan qui s'estoit vn peu courroucé à elle, de ce qu'elle nous auoit faiët long temps seiourner à l'huys auant que d'ouurir, luy dist quasi en furie : Que veut dire cecy ? Qui est là, qui esternue ainfi ? Et s'estant leué de table, il s'en est allé vers vn degré qui est fort près de là, souz lequel y auoit vn trou faiët d'aiz pres du pied du degré pour y ferrer qui voudroit, quelque chose comme nous voyons que font tous les iours ceux qui approprient les maisons, & luy estant aduis que le son de cest esternuement venoit de là, il a ouuert vn petit huys qui y est, & aussi tost qu'il a esté ouuert, il en est fortly incontinent la plus grande puanteur de souffre du monde : combien qu'au parauant on l'auoit desia senty, & le mary s'en estoit courroucé : mais la femme auoit tousiours diët que ce n'estoit autre chose finon qu'un peu au parauant, elle auoit blanchy ces voiles avec le souffre, & auoit mis souz ce degré la petite tille sur laquelle elle les auoit estenduz, afin qu'il receussent la fumee, tellement que la fumee en venoit encores. Et apres que Hercolan eut ouuert le petit huys, & que la fumee fut vn peu paffee, en regardant dedans veid celui qui auoit esternué, & qui encor esternuoit, estant à ce contrainët par la force du souffre : & combien qu'il esternuaft, le souffre luy auoit

tellement ferré le cœur, qu'il ne s'en falloit gueres qu'il n'eust iamais esternué ne faict autre chose. Hercolan quand il le veid commença à crier : Or voy-ie bien ma femme, pourquoy tu nous as tant fait seiourner à la porte auant que de nous ouurir : mais ie ne puisse iamais auoir chose qui me plaife, si ie ne t'en paye bien. Ce qu'oyant la femme, & voyant que son peché estoit descouuert, elle sans faire aucune excuse, s'est leuee de table : & s'en est fuye ie ne sçay où, mais Hercolan ne s'apperceuant que sa femme s'enfuyoit a dit plusieurs fois à celuy qui esternuoit qu'il sortist dehors : toutesfois luy qui n'en pouuoit plus, ne s'en est remué aucunement, pour chose qu'il luy en ayt dict Hercolan : parquoy il l'a prins par le pied, & l'a tiré dehors : & couroit pour aller querir vne espee, afin de le tuer : mais moy craignant pour moy-mesmes la iustice, me suis leué, & ne l'ay voulu laisser tuer, ne luy faire aucun mal, ains en criant, & le deffendant, i'ay esté occasion que quelques voisins y sont suruenuz, qui ont prins le ieune homme desia presque mort, & l'ont emporté hors de la maison ie ne sçay où : parquoy nostre souper a esté si troublé que non seulement ie ne l'ay deuoré, ains qui pis est, ie n'en tastay iamais, comme ie t'ay dict cy deuant. Quand la Dame ouyt ces choses, elle cogneut qu'il y auoit d'autres femmes aussi sages comme elle estoit, encores qu'aucunesfois il en aduint à quelques

vnes, & volontiers eust voulu par parolles soutenir la femme de Hercolan, mais pource qu'en blasmant les fautes d'autrui, il luy sembloit acquérir plus de liberté aux siennes, elle commença à dire : Voicy de belles choses, voyla vne bonne & saincte Dame, voyez la foy de ceste honneste femme, à laquelle ie me fusse confessée, si saincte elle me sembloit, & qui pis est estant deormais vieille, pensez qu'elle donne bon exemple aux ieunes femmes, que maudite soit l'heure qu'elle vint iamais en ce monde, & elle pareillement de s'y laisser viure meschante & malheureuse femme qu'elle est, honte vniuerselle & vitupere de toutes les femmes de ceste ville : laquelle ayant iecté au vent son honnesteté, & la foy promise à son mary, & encor l'honneur de ce monde (luy qui est vn te homme comme chacun congnoist, si honorable citoyen, & qui la traictoit si bien) n'a point eu de honte pour vn autre homme de deshoner luy & elle ensemblement : si Dieu me sgad on ne deuroit point auoir de misericorde de telles femmes : on les deuroit tuer, elles meritoient qu'on les mist toutes viues dans le feu, & qu'on en fist des cendres. Puis se souuenant de l'amy qu'elle auoit fort pres de là, souz la cage, elle commença à conseiller son mary, qu'il en allast coucher : parce qu'il en estoit temps. Le mary qui auoit plus d'enuie de manger que de dormir, demandoit toutesfois s'il y auoit point quelque reste du souper. A qui la femme

respondit : Voire vrayment, du souper : pensez que nous auons bien accoustumé d'apprester grand souper, quand tu n'y és pas : volontiers que ie suis la femme de Hercolan que ne t'en vas tu coucher pour ce soir : & tu feras beaucoup mieux ? Or aduint là dessus qu'estans ce propre soir venuz du village certains laboureurs du mary qui auoient apporté quelque chose de la metairie, & auoient mis leurs Asnes sans les abreuer en vne petite estable, qui estoit ioignant la gallerie, l'un des Asnes qui auoit grand soif s'estant descheuestré estoit fort de l'estable & alloit fleurant par tout s'il trouueroit par fortune de l'eau, & allant ainsi il passa aupres de ceste cage, souz laquelle estoit le ieune filz, lequel ayant quelque peu les doigtz de l'une des mains estendus sur la terre, hors de la cage pource qu'il estoit contraint d'estre couché sur son ventre comme vne carpe, la fortune fut si grande que cest Asne luy marcha sur les doigtz si ferme, que sentant vne tres-grande douleur, il iecta vn grand cry, que le mary ouyt, dont il s'esmerueilla : & cogneut que cecy deuoit estre en sa maison, parquoy estant fort de la chambre, & oyant que cestui-cy se plaignoit tousiours, pource que l'Asne n'auoit pas encor leué son pied de dessus ses doigtz, ains le fouloit bien fort dist : Qui est là ? Et courut à la cage, & quand il l'eust leuee, il veid le ieune gars, lequel outre le mal qu'il auoit de ses doigtz que le pied de l'Asne auoit

foullez, trembloit tout, de peur que le mary ne luy fist quelque outrage : lequel fut recongneu du mary, comme pour meschanceté & malheurété il auoit long temps faict la court, il luy demanda : Que fais tu icy ? Il ne luy respondit rien à cela, mais le pria pour l'amour de Dieu, qu'il ne luy fit point de mal : A qui le mary dist : Leue toy, n'ayes point de peur que ie te face aucun mal, mais dy moy comment és tu icy, & pourquoy ? Le ieune gars luy conta tout. Et le mary non moins ioyeux de l'auoir trouué que sa femme en estoit dolente le print par la main, & le mena avec foy en la chambre où la femme l'attendoit, avec la plus grande paour du monde. A laquelle s'estant assis vis à vis d'elle, il dist : Or ça tu disois tant de mal tout à ceste heure de la femme de Hercolan, & disois qu'on la deuroit brusler, & qu'elle faisoit honte à toutes vous autres. Que ne parlois tu de toy-mesmes ? ou si tu ne voulois parler de toy comment auois tu le cœur de parler d'elle congnoissant que tu auois fait de mesmes quelle ? certainement autre chose ne te le faisoit dire, sinon que vous autres femmes estes toutes de ceste sorte, que vous ne taschez sinon de couvrir voz fautes par celles d'autrui, que malle foudre puisse descendre du Ciel, & vous brusle toutes peruerse generation, que vous estes. La femme voyant que de prime arriuee il ne luy auoit faict autre mal que de parolles, & luy estant aduis qu'elle congnoissoit

qu'il estoit encor tout ioyeux de tenir vn si beau gars par la main, print cœur & dist : Que tu voudrois qu'il descendit feu du Ciel qui nous bruslast toutes, comme celuy qui se foudie autant des femmes, comme vn chien des loups : mais par la croix dieu, il n'en aduiendra ia comme tu penfes, ie voudrois bien vn peu parler à toy, pour fçauoir dequoy tu te plains. Vrayement i'en feroye bien si tu me voulois comparer à la femme de Hercolan, qui est vne vieille hypocrite, bigotte, qui a de luy ce qu'elle veut & la traicte comme vne femme doit estre traictée, ce qui ne m'aduiant pas : car posé le cas que tu me tiennes bien vestue & bien chauffee, tu fçais bien toutesfois comme ie suis traictée du demourant : & combien il y a de temps que tu ne couchas avec moy, & i'aymerois mieux aller mes habillemens deffirez sur le dos, & toute deschauffee, pourueu que tu me traictasse bien dedans le liêt, que d'auoir toutes ces choses en me traictant comme tu me traictes, & veux bien que tu fçaches Pierre (en parlant fainement) que ie suis femme comme les autres : & ay desir de ce que les autres veulent, tellement que si ie m'en pourchasse puis que ie n'en puis auoir de toy, ie n'en dois receuoir mal : aumoins te fay ie tant d'honneur, que ie ne m'abandonne n'a valet ne à tigneux. Le mary va aduifer qu'elle ne cesseroit toute nuict de crier ainsi : parquoy comme celuy qui se foudioit bien peu d'elle, dist : Or fus ma

femme, n'en parlons plus : ie te contenteray tresbien de cecy : tu nous ferois vn bon tour, si nous auions quelque chose pour soupper : car il me semble que ce beau ieune gars n'a encor non plus souppé que moy : Certes non, dist la femme, il n'a pas encor souppé : parce que quand tu és venu en la malle heure, nous nous mettions seulement à table pour soupper. Or va doncques (dist Pierre) fais que nous souppions & apres i'ordonneray de cest affaire, de sorte que tu n'auras occasion de te courroucer. Le femme s'estant leuee, & voyant son mary appaisé, fit soudainement remettre la nappe, & apporter le soupper qu'elle auoit faict apprestier, & souppa ioyeusement avec le meschant & malheureux mary, & avec le ieune gars. Apres soupper de vous dire ce que le mary fit pour le contentement de tous trois : ie l'ay oublié, bien me souuient il que le lendemain au matin on ne sceut dire bonnement en la place de Perouse lequel auoit toute celle nuit esté mieux accompagné, ou le mary ou la femme. Parquoy (mes cheres Dames) ie veux vous dire à qui t'en fera d'une, fay luy en d'une autre, & si tu ne peux souuienne t'en iusques à que ce tu le puisse faire, afin qu'on puisse rendre chou pour chou. Quand la nouuelle de Dioneo fut finie, dont les Dames se garderent de rire, plus pour la honte que pour le peu de plaisir. La Royne congnoissant que la fin de son gouuernement estoit venue se leua debout : & s'osta la

couronne de laurier qu'elle mit gracieusement sur la teste de madame Elisse, en luy disant : c'est à vous, madame, dorefnauant à commander. Madame Elisse ayant receu cest honneur, fit comme on auoit faict au parauant. Et apres qu'elle eut premierement donné ordre avecque le maistre d'hostel, à ce qu'il estoit besoing de faire, pour le temps que deuoit durer son gouvernement, avec contentement de toute la compagnie, elle dist : Nous auons long temps ouy dire qu'avec beaux motz & promptes responce, ou avec soudaines rencontres, plusieurs ont sceu picquer & faire taire les mal parlans, ou bien euit les dangers qui peuuent suruenir, & pource que la matiere est belle, & qu'elle peut profiter, ie veux que demain qu'on deuise de cecy. C'est à sçauoir de ceux ou de celles qui avec quelque plaissant mot quand on les a voulu picquer, se sont reuenchez, ou bien avec prompte responce ou soudaine rencontre ont euité perte, danger ou mocquerie. Cecy fut fort loué de tous : au moyen dequoy la Royne s'estant leuee, leur donna licence iusques à l'heure du souper. Et voyant l'honneste compagnie, la Royne leuee, ilz se leuerent aussi tous : & comme ilz auoient de coustume, chacun passa le temps à ce qui luy vint plus à gré : mais quand on n'ouyt plus chanter les cigalles, la Royne fit appeller tout le monde, & s'en allerent souper, apres lequel tous se mirent à chanter, & sonner des instrumens, &

ayant defia madame Emilie prins vne dance du consentement de la Royne, il fut commandé à Dioneo qu'il chantaſt vne chanſon, lequel ſoudainement commença : Dame Aldrupe leuez la queuë, car bonne nouuelle i'apporte : dont toutes les Dames commencent à rire : meſmement la Royne qui luy commanda qu'il laiſſaſt celle-là, & qu'il en diſt vne autre. Dioneo diſt : Madame ſi i'auois vn cimbal ie diroye, leuez voſtre chemiſe ma dame Lappe : ou : Souz l'Oliuier eſt l'herbe menue : ou bien, voulez vous que ie die : L'onde de la mer me faiſt ſi grand mal. Mais ie n'ay point de cimbal : & par ainſi aduiſez laquelle des autres vous voulez que ie die : Vous plairoit-il que ie diſſe : Sors cy dehors qu'on te le coupe comme à mon amy ſur le champ ? Non (diſt la Royne) dy en vne autre. Diray ie doncques ? diſt Dioneo, Dame Simonne entonne, entonne : nous ne ſommes pas en Octobre. La Royne en riant diſt : Dy en vne bonne en la mal-heure, ſi tu veux : car nous ne voulons pas celle-là, Non diſt Dioneo, ne faiſtes madame ſeulement que dire celle qui plus vous plaira, i'en ſçay plus d'un millier. Voulez vous ? Ma coquille ſi ie ne le fay bien battre : ou fay tout beau mon mary : ou l'ai acheté vn coq des liures cent. La Royne alors vn peu courroucée (combien que toutes les autres riſſent) diſt à Dioneo : Ne te mocque plus, & en dy vne belle, autrement tu pourrois bien eſſayer comment ie

me ſçay courroucer. Dioneo oyant cecy, cessa de ſe gaudir, & promptement commença à chanter en ceſte maniere.

Amour l'aymable clarté
Sortant des yeux de la belle,
M'a faiſt ſerf de toy & d'elle.


De ſes beaux yeux vint la claire ſplendeur
Qui premier mit ta flamme en mon courage :
Par les miens treſpaſſant :
Et de quel poix eſt la tienne grandeur,
Ie l'ay congneu par ſon gentil viſage
Auquel touſiours penſant,
Ie me voy delaiſſant
Toutes vertus, & les ſouzmettre à celle
Qui à ſouſpirs me contraint & appelle.

Par ce moyen ie ſuis deuenu tien
Mon cher Seigneur : & comme tel i'attens
Mercy ſouz ton pouuoir :
Mais ſi d'elle eſt congneu le deſir mien
Qu'au cœur m'a mis, certes pas ne l'entens :
Ny mon entier deuoir,
Vers celle qui peut voir
Dedans mon cœur que paix ne ſeroit telle
Sans ſa mercy comme guerre mortelle.

Parquoy ie prie mon doux Seigneur & maiſtre
Que tu luy monſtres & luy faces ſentir
Quelque peu de ton feu,
En ma faueur : car tu peux bien cognoiſtre
Comme en l'aymant, ſouffre plus qu'un martir,
Puis quand viendra le lieu
Comme tu dois, commande moy à elle
Car à ce faire yray deſſouz ſon æſle.

Après que Dioneo eut monstté par se taire que sa chançon estoit finie, la Royne en fit dire plusieurs autres, ayant toutesfois grandement loué celle dudiect Dioneo : mais depuis qu'une partie de la nuict fut passée, & que la dicte Dame sentit que desia le chant du iour estoit vaincu par la frescheur de la nuict, elle commanda que chacun s'en allast reposer à son plaisir iusques au lendemain.





SIXIESME IOVRNÉE.

SIXTH EDITION.



SIXIESME IOVRNÉE.

La fixieme iournee du Decameron, En laquelle on deuise foubz le gouuernement de madame Elisse, de ceux ou celles qui avec quelque plaisant mot (quand on les a voulu piquer) se sont reuenchez ou bien qui avec prompte responce, ou soudaine rencontre ont euité, perte, danger, ou moquerie.

L estoit desia iour tout clair, quand estant la Royne leuee, & ayant faict appeller sa compagnie, ilz s'en allerent promener à petit pas sur la rosee s'esloignans vn peu du beau tertre, tenans diuers propos d'une chose & autre, & disputant des nouuelles racontees mesmement, lesquelles auoient esté ou plus ou moins plaisantes, & recommençans encores à rire de plusieurs & diuers cas recitez en icelles: iusques à tant que se haussant desia le Soleil &

commençant à s'eschauffer, tous furent d'aduis qu'on se deuoit retirer au logis, parquoy retournans arriere ilz s'en allerent : où estant defia les tables dressees, & semé par tout d'herbes odoriferantes & belles fleurs, ilz se mirent (auant que le chaut vint plus grand) à table par le commandement de la Royne. Et quand ilz eurent disné plaifamment commencerent premier que faire autre chose à chanter quelques ioyeuses chanfonnettes, apres lesquelles quelques vns allerent dormir, les autres iouer aux eschetz, & quelques vns aux tables : mais Dioneo auec madame Laurette commencerent à chanter de Troilus & Briseïs, puis l'heure venue qu'on deuoit retourner à leur confistoire, les ayant la Royne faict appeller tous, vn chacun se feit (comme ilz auoient accoustumé) autour de la belle fontaine. Et voulant defia la Royne commander la premiere nouuelle, il aduint chose qui n'estoit encores aduenue : c'est à sçauoir que toute la compagnie ouyt vn grand bruit que faisoient les seruiteurs en la cuisine, au moyen dequoy faisant la Royne appeller le maistre d'hostel, auquel elle demanda quel bruit c'estoit là, & qui auoit esté occasion de la noise, il respondit que Licisque & Tindare auoient parolles ensemble : mais qu'il ne sçauoit l'occasion pourquoy c'estoit : Parce que quand la Royne l'auoit faict appeller, il n'y faisoit que d'arriuer pour les faire taire. Parquoy la Royne commanda qu'on les fist incontinent

venir. Aufquelz elle demanda l'occasion de leur debat. Et voulut Tindare respondre. Licisque qui estoit femme d'aage, & vn peu fierotte, & desia eschauffee de crier, se tourna vers luy avec vn mauuais visage, & dist : Voyez ceste beste d'homme qui prent la hardiesse de parler premier que moy, là ou ie suis : laisse moy dire. Puis se tournant deuers la Royne luy dist : Madame cestui-cy me veut apprendre à congnostre la femme de Sycofant : comme si ie n'auoye frequenté toutesfois avec elle, & me veut faire accroire que la premiere nuit qu'elle coucha avec son mary, monsieur Bidaut entra dedans la montaigne noire par force & avec effusion de sang, & ie dy qu'il n'est pas vray : ains qu'il y entra à son bel ayse, au grand contentement de ceux de dedans : mais il est bien si beste qu'il cuyde que les ieunes filles soient si fottes, qu'elles demeurent à perdre leur temps souz l'esperance des peres & des freres qui de sept fois les six les font demourer trois ou quatre ans plus qu'elles ne deuroient sans les marier, vrayment elles en feroient bien, si elles attendoient tant, par la foy de Dieu (& bien dois-ie sçauoir ce que ie dis : puis que i'en iure) ie n'ay voisine qui soit allee pucelle à son mary, & encor des femmes mariees, ie sçay bien combien & quelz bons tours elles font à leurs maris, & ceste pecore me veut apprendre à cognoistre les femmes, comme si ie n'estoye nee que d'hier. Ce pendant que Licisque par-

loit les Dames rioient si tresfort qu'on leur eust bien arraché toutes les dents. Et combien que la Royne luy eust desia imposé cinq ou six fois silence, cela n'y seruoit de rien : car elle ne cessa iamais iusques à tant qu'elle eust dict ce qu'elle vouloit. Mais apres qu'elle eut acheué son plaidoyé, la Royne en riant se tourna vers Dioneo & luy dist, Dioneo ceste matiere est proprement ton cas : & par ainsi ie me fieray bien en toy, que quand noz nouuelles seront acheuees, tu en donneras la sentence diffinitive. A laquelle Dioneo respondit promptement : Madame, la sentence en est desia toute donnee sans en ouir dauantage : & dy que Licisque a raison, & croy fermement qu'il soit ainsi comme elle dict, & que Tindare est vne grande beste. Ce qu'oyant Licisque, elle se print à rire, & se tournant vers Tindare luy dist : Ie le disoye bien. Or va de par Dieu : pense tu sçauoir plus que moy, toy qui ne te sçay pas encores moucher ? grand mercy, aumoins n'ay-ie pas perdu mon temps d'estre venu icy, non. Et n'eust esté que la Royne luy commanda avec vn mauuais visage de se taire, & de ne dire plus mot si elle ne vouloit estre fouetee, & aussi qu'elle enuoya Tindare hors de là, on n'eust eu autre chose à faire toute celle iournee que de l'escouter, mais apres qu'ilz furent partis, la Royne commanda à madame Philomene qu'elle donnast commencement aux nouuelles, laquelle commença à parler gracieusement ainsi.



NOUVELLE PREMIERE.

Reprenant la jottise d'aucuns, qui se mettent à raconter chose de laquelle ilz ne peuvent venir à bout.

Vn Cheuallier promet à madame Horette de la porter en croupe sur son cheual, & de luy conter vne belle nouvelle en chemin, mais voyant la Dame qu'il la disoit de mauuaise grace, elle le pria de la descendre à pied.



ES belles Dames, tout ainsi comme en la saison, que les serains sont clairs & lucides, les Estoiles sont l'aornement du Ciel, & les fleurs tant que le Printemps dure des prez verdoyants, pareillement les arbrisseaux reueftuz de fueilles des costaux : ne plus ne moins les motz plaifans, & gracieuses rencontres, sont l'ornement, beauté, & decoration de tous les propos & deuis dignes d'estre louez,

lesquelz plaifans motz & gracieufes rencontres, pource qu'ilz fe difent en peu de parolles, feent d'autant mieux aux femmes qu'aux hommes. Il eft bien vray, que qui qu'en foit occafion, ou la mauuaiftié de nos efpritz ou l'inimitié finguliere que les Cieux ont porté à noftre fiecle, il ne nous eft peu ou point demouré de femme, qui fçache dire vn bon mot quand il le fault dire, ou fi on luy en dit quelqu'un qui le fçache entendre comme il appartient : qui eft vne honte à toutes nous autres femmes. Mais pource que defia madame Pampinee en a affez dict fur cette matiere, ie ne passeray plus outre, & me contenteray pour ceste heure, de vous faire congnoiftre par vn courtois, taifez vous, que dist vne gentillefemme à vn Cheuallier, combien ont de beauté en foy, les motz qui font dictz à propos en temps & lieu.

Comme plufieurs de vous autres auez peu fçauoir, veu, ou ouy dire, il y a eu n'a pas encor long temps en noftre Cité, vne gentil-femme de fort bonne grace & bien parlant, l'honnefteté de laquelle n'a point mérité qu'on cele fon nom. Elle fut doncques nommee madame Horette femme de meffire Geri Spine, laquelle eftant de fortune aux champs, comme nous fommes, s'en alloit vn iour d'un lieu en vn autre par maniere d'esbat avec d'autres Dames, & quelques Cheualliers qu'elle auoit euz le iour precedent à difner en fon logis, & eftant

le chemin paraurent vn peu longuet du lieu d'où ilz partoient iufques là où ilz deliberoient d'aller, vn des Cheualliers de la troupe luy dift Ma-dame Horette ie vous porteray s'il vous plaift en croupe derriere moy, vous entretenant la plus grand' part du chemin avec vne des plus belles nouuelles du monde. A qui la Dame refpondit : Mais ie vous en prie bien fort, & me fera trefgrand plaifir. Monsieur le Cheuallier à qui l'efpee feoit paraurent auffi mal au cofté, comme il faifoit à fa langue de faire vn conte, oyant cecy, commença vne fienne nouuelle, laquelle à dire la verité eftoit trefbelle : mais luy redifant vne mefme parolle, trois, quatre, cinq, & fix fois : & tantoft recommençant : puis quelques fois difant, ie n'ay pas bien dict, & le plus fouuent faillant és noms en mettant l'vn pour l'autre : il vous deffiroit cefte pauvre nouuelle d'vne maitrefse forte, fans ce qu'il proferoit le plus defpiteufement qu'il eftoit poffible felon la qualité des perfonnes, & les actes qui y appartenoient, dont il venoit plusieurs fois à ma-dame Horette, en l'oyant fi mal dire, vne fueur & vn defaillement de cœur auffi grand comme fi elle euft efté malade, & qu'elle deuft mourir. Ce que ne pouuant plus endurer, & cognoiffant que monsieur le Cheualier eftoit entré en propos de grande pecore, & qu'il eftoit homme pour n'en pouuoir fortir, luy dift plaifamment : Monsieur vofre cheual va trop dur, ie vous

prie qu'il vous plaife de me mettre à pied. Le Cheuallier qui parauenture estoit meilleur entendeur que faiseur de contes, entendit bien la mocquerie qu'il print à ieu & à gaudifferie, puis commença à en dire d'autres. Et cessa de plus parler de celle qu'il auoit si mal commencée, & pirement continuee.





NOUVVELLE DEUXIESME.

*Qui demonstre qu'une requeste doit estre civile
deuant qu'estre octroyee, à qui que soit..*

*Ciste boulenger avec une parolle qu'il dist à me-
sire Geri Spine, luy fit recognoistre une incon-
sideree demande qu'il auoit faicte audict
Ciste.*



LE parler de madame Horette fut grandement loué des hommes & des femmes : & quand il fut acheué, la Royne commanda à madame Pampinee qu'elle suyuiſt l'ordre. Parquoy elle commença ainſi : Gracieuſes Dames, ie ne puis conſiderer de moy-mesmes qui plus peche en ce que ie vous veux dire, ou la nature quand elle donne à vne ame noble vn corps vil : ou la fortune quand elle donne à vn corps doué d'ame noble vn vil meſtier, ainſi que nous auons peu voir qu'il eſt aduenu en la perſonne de Ciste boulenger

nostre citoyen, & en plusieurs autres, lequel estant de tresgrand cœur, la fortune a faict boulenger, & certes ie maudioye aussi bien la nature comme la fortune, si ie ne congnoissoye que la nature est tressage, & que la fortune a mille yeux : combien que les sotz la figurent aueugle. Car ie regarde qu'elles font toutes deux (comme trefausees qu'elles sont) ce que les mortelz font souuentefois, lesquels incertains des inconueniens qui leur peuuent aduenir, enseuelissent pour leur commodité, leurs plus cheres choses és plus vilz lieux de leurs maisons, comme moins suspectz, & les tirent de là quand ilz veulent, pour leurs plus grandes necessitez, les ayant ce vil lieu plus seurement gardees que n'eust pas faict la plus belle chambre de leur maison, & ainsi les deux ministres du monde cachent le plus souuent leurs plus precieuses choses souz l'ombre des artz reputez plus vilz, afin que les tirant d'iceux quand il en est besoin, leur splendeur apparaisse plus claire : ce qu'en bien peu de chose declaira Ciste, remettant les yeux de l'entendement à messire Geri Spine, dont la nouuelle qu'on a contee de madame Horette qui estoit sa femme m'a faict souuenir : comme ie vous feray cognoistre en vne nouuellete assez courte.


Et dy doncques qu'ayant le Pape Boniface (aupres duquel messire Geri Spine estoit en tresgrande autorité) enuoyé à Florence pour

quelques siens grandz affaires aucuns gentilzhommes de sa maison en ambassade, qui logerent en la maison de messire Geri, & eux traitans ensemblement des affaires du Pape, il aduint (qui qu'en fust l'occasion) qu'ilz passoient quasi tous les matins deuant nostre-dame de Vghi, là où Ciste faisoit son four, & faisoit luy mesme son mestier de boulenger, auquel combien que la fortune luy eust donné mestier de basse condition, elle luy auoit toutesfois esté tant fauorable en iceluy qu'il en estoit deuenu riche, & sans le vouloir iamais laisser (pour aucune chose que ce fust) viuoit opulemment, ayant tousiours entre ses autres bonnes choses, les meilleurs vins blancz & claiertz qui se trouuassent en Florence, ne à l'enuiron, & voyant ainsi passer tous les matins deuant son huys messire Geri, & les Ambassadeurs du Pape, il s'aduifa lors qu'il faisoit grand chault, que ce seroit grande courtoisie de leur donner à boire de son vin blanc : mais ayant esgard à sa qualité, & à celle de messire Geri, il ne luy sembloit estre honneste de tant presumer que de l'inuiter à cela, & pource il alla penser de trouver quelque moyen qui l'induisist à s'inuiter soy-mesme : par quoy ayant vestu sur son dos vn habillement de toyle tresblanc, & tousiours vn tablier venant de la lessiue, lesquels le faisoient plustost iuger musnier que boulengier, il se faisoit apporter deuant son huys tous les matins sur l'heure qu'il pensoit que messire

Geri deuoit passer avec les Ambassadeurs, vn seau neuf, plein d'eau fresche, & vn petit vaisseau de terre Boullonnois pareillement neuf, plein de son bon vin blanc avec deux petitz voirres, qui sembloient estre d'argent, si clairs ilz estoient, & estant ainsi assis apres qu'il auoit touffi, & vuidé ses phlegmes deux ou trois fois commençoit (ainsi qu'ilz passioient) à boire si fauoureusement ce sien vin qu'il en eut faict venir enuie aux mortz : ce qu'ayant veu messire Geri vne & deux matinees, il luy dist la troisieme : Et puis quel est-il Ciste? est-il bon? Ciste s'estant leué debout, respondit incontinent : Ouy monsieur : mais comment le vous pourrois-ie faire croire si vous n'en essayez? Messire Geri, lequel ou pour la qualité du temps, ou pour le trauail qu'il auoit prins plus qu'il n'auoit accoustumé, ou parauenture qu'il voyoit Ciste boire ainsi fauoureusement, auoit volonté de boire : & se tournant vers les Ambassadeurs, leur dist en souz-riant : Messieurs, ie suis d'opinion que nous essayons du vin de cest homme de bien : il est parauenture tel que nous ne nous en repentirons point, & s'en alla avec eux vers Ciste, lequel ayant fait apporter sur l'heure vn beau banc hors de sa boutique, les pria qu'ilz s'assissent, disant à leurs seruiteurs qui s'aduançoient desia pour lauer les verres : Enfans reculez vous, & me laissez faire ce seruice : car ie suis aussi bon verse à boire, comme ie suis bon

boulenger, & ne vous attendez pas d'en taster goutte : & cecy dict, luy mesmes lava quatre petitz verres beaux & neufz, & fit apporter vne petite fiole de son bon vin, dont il donna diligemment à boire à messire Geri & aux Ambassadeurs, ausquelz le vin sembla le meilleur qu'ilz eussent beu long temps au paravant : parquoy l'ayant grandement loué, ilz en retournerent boire presque tous les matins, pendant que les Ambassadeurs furent là. Ausquelz quand ilz eurent acheué ce pourquoy ilz estoient à Florence, & qu'ilz s'en voulurent retourner, messire Geri fit vn festin fort magnifique, où il fit inviter la plus grande part des plus honorables citoyens, & pareillement Ciste, lequel n'y voulut oncques aller en façon que ce fust : au moyen dequoy messire Geri commanda à vn de ses seruiteurs qu'il allast querir vn flacon de son vin, & qu'on en seruist d'entree de table vn demy verre pour homme. Le seruiteur qui estoit paraventure courroucé de ce qu'il n'auoit iamais sceu boire de ce vin, print vn grand flacon, lequel veu incontinent par Ciste, il dist : Mon filz messire Geri ne t'enuoye pas ceans, ce qu'asseurant plusieurs fois le seruiteur, & ne pouuant auoir autre responce, retourna à son maistre, & le luy dist : A qui messire Geri dist : Retournez y, & luy dy que si fais : & s'il te respond plus ainsi, demande luy où ie t'enuoye doncques. Le seruiteur y retourna & dist. Ciste en verité messire Geri

m'enuoye ceans vers toy. A qui Ciste respondit : pour certain mon filz non faiët. Où m'enuoye-il doncques? dist le seruiteur. A la riuiera d'Arne, respondit Ciste. Ce que rapportant le seruiteur à messire Geri, les yeux de son entendement s'ouurirent soudainement, & dist au seruiteur. Laisse moy voir quel flascon tu y portes, & quand il l'eut veu, il dist : Ciste diët verité : parquoy luy disant mille iniures, il luy fit prendre vn flascon raisonnable. Voyant lequel Ciste, il dist, maintenant sçay-ie bien qu'il t'enuoye à moy, & le luy remplit de bien bon cœur : puis ayant faiët ce mesme iour remplir le tonneau d'vn autre semblable vin, & faiët porter à clair en la maison de messire Geri, il y alla apres, & le trouuant, luy dist : Monsieur, ie ne voudroye pas que vous creusiez que le grand flascon de ce matin m'eust estonné, mais m'estant aduis que vous auiez oublié ce que ie vous auoye monsté ces iours passez avec mes petites fiolles, c'est à sçauoir que ce vin n'estoit vin à valetz, ie vous l'ay voulu ramenteuoir ce matin : maintenant parce que ie n'entends plus d'en estre gardien, ie vous l'ay toutfaiët apporter, vous en ferez dorefnauant comme il vous plaira. Messire Geri eut le present de Ciste pour tresagreable, & luy en rendit telles graces qu'il estoit besoing, & le tint tousiours depuis pour homme de vertu & son amy.



NOUVELLE TROISIÈME.

*Pour monstrier que les mocqueurs à tort, sont
souuent mocquez à droict.*

*Madame Nonne de Pulcy fit taire vn Euesque
de Florence avec vne prompte responce faicte à
vne gaudifferie vn peu moins qu'honneste qu'il
auoit dicté à ladicte Dame.*



VAND madame Pampinee eut
acheué sa nouuelle, & apres que
la responce & la liberalité de
Ciste fut louee de tous, il pleut à
la Royne que madame Laurette
dist la sienne : & commença à parler ainsi,
Gracieuses Dames ma-dame Pampinee com-
mença l'autre iour, & ma-dame Philomene a
maintenant bien fuiuy à toucher la pure verité
du peu de vertu qui est en nous : & pareille-
ment de la beauté des rencontres : & pource
qu'il n'est besoin d'en dire d'auantage que ce

qui en a esté dist, ie vous vueil seulement ramenteuoir que la nature des rencontres est telle, qu'elles doiuent mordre l'auditeur ainsi comme la brebis mord, & non pas comme le chien : parce que si elles mordaient comme le chien la rencontre ne feroit plus rencontre : ains feroit iniure : ce que firent parfaictement les parolles de ma-dame Horette, & la responce de Ciste. Il est vray que si la rencontre se dit en lieu de responce, & que celuy qui respond morde en chien, il semble qu'il n'est point à blasmer : au moins s'il a esté premierement mordu en chien : comme il feroit bien si ainsi n'estoit auenu. Et parainfi on doit bien regarder comment, & quand, avec qui, & où l'on se gaudit. A quoy regardant bien peu, n'agueres vn nostre prelat : il ne receut moindre morsure que celle qu'il donna : ce que ie vous vueil monstre en vne petite nouuelle.

Estant Euesque de Florence messire Anthoine Dorso vertueux & sage prelat, il y vint vn gentilhomme Cathelan nommé messire Diego de la Ratta mareschal du Roy Robet de Naples : lequel estant tresbeau personnage, & le plus grand faiseur de court aux dames qu'on scauroit dire, il y en eut vne entre les autres qui luy pleut grandement laquelle estoit fort belle femme, & niece d'un frere dudit Euesque : le mary de laquelle (combien qu'il fust de bonne famille) estoit toutesfois auare outre mesure : & avec ce meschant & malheureux. Ce que en-

tendant le mareschal, il compofa avec luy de donner cinq cens ducats d'or, & qu'il le laiffaft coucher vne nuit avec fa femme, dont la paction accordee il feit dorer certaines pieces d'argent qui auoient lors cours à Florence, qu'on nommoit Popolins : & apres auoir couché avec la dame (combien que ce fust contre fa volonté) les bailla au mary. Ce qu'eftant apres fceu par tout, le malheureux n'en eut autre chofe que le dommage & les mocqueries, & l'Euefque (comme fage) feit femblant de n'en fauoir rien. Parquoy eftant fouuent enfemble l'Euefque & le marechal, auint que le iour de S. Iean fe promenant à cheual par la ville l'un au cofté de l'autre, & regardans les dames par la rue où l'on court le pris, l'Euefque en veit vne ieune mariee nouuellement (laquelle cefte derniere pefte nous à oftee) qui fe nommoit Dame Nonne de Pulci, coufine de Meffire Aleffo Rinucci, que toutes vous autres deuez cognoiftre, laquelle eftoit alors vne belle ieune femme bien parlante & de grand cœur, & fe tenoit vers la porte fainct Pierre : laquelle il monftra au Mareschal, fur l'efpaule duquel quand ilz furent pres d'elle il meit la main, & dift à la dame : Ma-dame Nonne que vous femble de cefuy-cy ? le penferiez vous bien gagner ? Il fut aduis à la Dame que ces parolles mordiffent aucunement fon honneur : ou qu'elles le deuffent contaminer en l'entendement de ceux qui l'ouyrent qui eftoient plu-

fieurs. Parquoy ne faifant fon conte de purger ceste contamination, mais de rendre chou pour chou, elle respondit promptement. Paraventure auffi Monsieur, ne me gaigneroit il pas : mais ie voudrois bonne monnoye. Laquelle parolle ouye le Marechal & l'Euefque se sentans tous deux toucher iufques au vif, l'un comme perpetrateur de chose deshonnefte en la niece du frere de l'Euefque : & l'autre comme la receuant en la perfonne de la niece de fon propre frere, ilz s'en allerent fans regarder l'un l'autre tous honteux & coy, fans plus luy fonner mot de tout ce iour là. Ainfi doncques ayant esté la ieune Dame picquee il ne luy fut mal-feant de piquer autrui en fe gaudiffant.





NOUVELLE QUATRIESME.

*Signifiant qu'une plaisante responce appaise
souventesfois le cœur d'un homme courroucé.*

*Quiquibio cuisinier de messire Conrard Iean
Filiaffi par vne soudaine parolle qu'il dist à son
maistre, conuertit son courroux en ris : &
eschapa la punition dont messire Conrard
l'auoit menacé.*



A-Dame Laurette se taifoit desia,
& ma-dame Nonne auoit esté
louee de tous quand la Royne
commanda à ma-dame Neiphile
quelle fuiust : laquelle dist : Com-
bien que le prompt esprit, mes Dames, preste
souventesfois les parolles belles & vtils à
ceux qui les disent, selon les occurences, tou-
tesfois la fortune (qui ayde encores quelques
fois aux timides) leur en met souuent & sou-
dainement sur la langue de telles que celuy
mesme qui les dit ne les eust iamais sceu

inuenter s'il eust eu loisir d'y penser, ce que i'ay deliberé vous monstrier par vne mienne nouuelle.

Messire Conrard Iean Filiaffi (comme chacune de vous autres pouuez auoir veu & ouy dire) a tousiours esté noble citoyen de nostre cité liberal & magnifique, menant vie de cheualier, se delectant continuellement en chiens & oyseaux sans les autres plus grandes vertuz, que nous laisserons maintenant à part : lequel ayant pris vn iour avec vn sien faucon vne grue pres vn village nommé Peretola, & la trouuant ieune & grasse, l'enuoya à vn sien Cuisinier Venitien qu'on nommoit Quiquibio, luy mandant qu'il la routist pour souper, & quelle fust bien apprestee. Quiquibio, lequel ressembloit, comme à la verité il estoit vn plaisant sot, quand il eut accoustré la grue il la meit en la broche, & commença à la faire rostir songneusement, laquelle estant desia presque cuite, & rendant fort bonne odeur, aduint qu'une femmelette du quartier, qui s'appelloit Brunette, & de qui Quiquibio estoit fort amoureux, entra en la cuisine : & sentant l'odeur de la grue, & la voyant, pria cherement Quiquibio, qui luy en donnast vne cuisse. Quiquibio luy respondit en chantant. Vous ne l'aurez de moy, Dame Brunette, vous ne l'aurez de moy, dequoy s'estant Brunette courouffee, elle luy dist : En enda si tu ne me la donne, tu n'auras iamais de moy chose qui te

plaise : ayans pource entre eux plusieurs parolles en peu de temps. A la fin Quiquibio, pour ne courrousser s'amy, arracha vne des cuisses, à la grue, & luy donna. Mais quand elle fut seruie sans l'une des cuisses deuant Messire Conrard, dont quelque estranger qu'il auoit mené soupper en sa maison s'esmerueilla, il fit appeller Quiquibio, & luy demanda qu'estoit deuenue l'autre cuisse de la grue. A qui le Venitien menteur de nature respondit soudainement : Monsieur les grues n'ont qu'une cuisse & vne iambe. Messire Conrard lors courroucé dist. Comment Diable? n'ont elles qu'une cuisse & vne iambe? n'ay ie iamais veu grue sinon ceste cy? Quiquibio persistant en son dire : Monsieur il est ainsi comme ie le vous dy : & quand il vous plaira ie le vous feray voir, en celles qui sont viues : Messire Conrard pour l'amour des estrangers qui estoient avecques luy n'en voulut contester : mais luy dist seulement : Puis que tu m'asseures de le me faire veoir en celles qui sont viues (chose que ie ne vy oncques, ne ouy iamais dire qu'il fust ainsi) ie suis content de le veoir demain matin : & en feray tresayse, mais par le corps bieu s'il est autrement ie te feray accoustrer de sorte qu'il te souuiendra toute ta vie de moy. Finies doncques les parolles pour ce soir. Messire Conrard (qui n'estoit point apaisé pour auoir dormy) se leua le lendemain matin des laube du iour, encor tout bouffant

de courroux, & commanda qu'on luy amenast ses cheuaux : & ayant faict monfter Quiquibio fur l'un d'iceux, il le mena vers vn ruisseau, à la riue duquel on fouloit voir tousiours sur la poincte du iour des grues, en luy disant : Nous verrons tantost qui mentit herfoir de toy ou de moy. Quiquibio voyant que le courroux de son maistre duroit encores, & qu'il luy falloit faire preuue de sa menfonge : ne sçachant comment la pouuoir faire, cheuauchoit apres Messire Conrard, avec la plus grande peur du monde, & s'en fust volontiers fuy s'il eust peu : mais ne luy estant possible, il regardoit maintenant deuant, & tantost derriere, cuydant que tout ce qu'il voyoit fussent grues qui se soustinsissent sur deux piedz, mais estant desia arriuez pres du ruisseau, il en vit premier que nul autre sur la riue d'iceluy paraurent vne douzaine qui estoient toutes sur vn pied, comme elles ont accoustumé d'estre quand elles dorment : parquoy les ayant soudainement monstrees à Messire Conrard, il luy dist : Vous pourrez tresbien voir maintenant monsieur, que ie disoye herfoir verité : que les grues n'ont qu'une cuisse, & vn pied, si vous regardiez à celles qui sont là. Messire Conrard voyant les grues, luy dist : Attends vn peu : car ie te monstrey qu'elles en ont deux : & s'approchant vn peu plus pres d'elles, il cria : Oh oh : au moyen duquel cry les grues ayant abaissé l'autre pied, s'enuolerent toutes, apres auoir fait quelques

pas, & Messire Conrard se retourna vers Quiquibio, luy disant : Que t'en semble meschant ? t'est il aduis qu'elles en ayent deux ? Lors Quiquibio presque tout estonné ne sçachant luy mesmes d'où il venoit, respondit : Monsieur ouy : mais vous ne criastes pas oh oh, à celle d'herfoir : car si vous eussiez ainsi crié elle eust pareillement mis à terre l'autre cuisse & l'autre pied comme ceux cy ont fait. Ceste responce pleut tant à Messire Conrard, que tout son courroux se conuertit en rire, & dist : Quiquibio tu as raison, ie le deuoye vraiment faire comme tu le dis : Ainsi donques Quiquibio par sa prompte & plaisante responce eschappa d'estre bien frotté, & fit sa paix avec son Maistre.





NOUVELLE CINQUIESME.

Par laquelle on voit que qui veut parler d'autrui, doit premierement prendre garde à soy-mesme.

Messire Forest de Rabatte & Maistre Iotte Peintre venant ensemble de Mugel, se gaudirent l'un l'autre de leur laideur.




USSI tost que Ma-Dame Neiphile se teut, ayans les Dames prins grand plaisir de la responce de Quiquibio, Phamphile par le commandement de la Royne, dist : Trescheres Dames, il auient souuent qu'ainfi comme la fortune cache quelque fois sous les arts vilz de tresgrans tresors de vertu, comme n'agueres nous a monstre ma-dame Pampinee, on trouue pareillement que la nature a mis de merueilleux esprits sous de treslaides formes d'hommes, ce qui apparut grandement en deux

Citoyens des nostres, dont ie vous vueil parler en peu de parolles : par ce que l'vn qui fut nommé Messire Forest de Rabatte, estant de petite stature & si difforme avec vn visage plat & camus comme vn chien terrier : que qu'il l'eust voulu comparer au plus difforme de ceux de Baronchi, encor eust il esté trouué laid, fut neantmoins si grand legisfe qu'il estoit réputé de plusieurs sçauants hommes vn vray memoire de droit ciuil. Et l'autre qui fut nommé Iotte, eut vn esprit de si grand'excellence, qu'il ne fut oncques chose en nature mere & ouuriere de toutes, par le continuel mouuement des cieux que luy avec la poincte à pourtraire la plume ou le pinceau, ne peignist si semblable à icelle que non seulement il y retiroit : mais (qui plus est) on croyoit que ce fust la chose mesmes : tellement que l'on trouuoit plusieurs fois que és choses qu'il auoit faites, le sens visible des hommes se trompoit, croyant estre naturel ce qui estoit peinct. Et parainfi ayant luy remis cest art en lumiere, qui auoit esté enseuely long temps au parauant, sous l'erreur d'aucuns, qui en peignant se delectent plus à satisfaire aux yeux des ignorans, qu'à complaire à l'entendement des sages, on le pouuoit à bon droit nommer vne des lumieres de la gloire Florentine, & d'autant plus encores comme avec plus grande humilité, luy viuant & maistre en cecy des autres peintres, il auoit acquis ceste gloire, ne voulant iamais estre appellé par

ce nom de maistre : refusant lequel tiltre de tant plus resplendissoit-il en luy, comme avec plus grand desir de ceux qui sçauoient moins que luy, ou de ses disciples, il estoit conuoiteusement vsurpé d'eux : toutesfois combien que son art fut tresgrand, il n'estoit pour tout cela en aucune maniere que ce soit, plus beau de personne ne de visage qu'estoit Messire Forest : mais venant à conter la nouuelle ie dy que :

Messire Forest & Iotte auoient leurs héritages à Magel : & estant Messire Forest allé veoir les siens au temps d'Esté que les vacations sont es cours, & s'en reuenant sur vn meschant cheual qui estoit, peut estre de loüage, il troua ledist Iotte lequel ayant pareillement veu les siens s'en retournoit aussi à Florence, n'estant rien mieux monsté n'en ordre que luy : & ainsi qu'ilz s'en venoient de compagnie le beau petit pas, comme vieux qu'ilz estoient, aduint (comme nous voyons souuent auenir en Esté) qu'une soudaine pluye les surprint, pour laquelle euter ilz se retirerent le plustost qu'il leur fut possible en la maison d'un Païsan amy & cogneu de chacun d'eux : mais quelque peu apres ne faisant semblant la pluye de vouloir cesser, & eux voulans arriuer de iour à Florence, ilz emprunterent de ce païsan deux manteletz vieux de ce gris de bureau, & deux chappeaux tous pelez de vieilleffe, pource qu'il n'en y auoit point de meilleurs, & com-

mencerent à se mettre en chemin. Or ayans cheminé quelque peu & se voyans tous mouillez, enfangez & crottez par le iallissement que font en allant les cheuaux avec les pieds, chose qui n'a pas accoustumé de rendre la personne plus honorable, le temps s'esclaircit vn peu; & commencerent à deuifer ensemble : mais Messire Forest cheuauchant & escoutant Iotte qui estoit fort beau parleur, commença à le regarder & considerer d'vn costé & d'autre, depuis les pieds iusques à la teste. Et voyant qu'il estoit tout si ord & si laid sans aucune consideration à soy quel il estoit, commença à rire, & dist : Iotte penfes tu que si vn estranger qui ne t'eust iamais veu, venoit à ceste heure deuant nous, qu'il creust que tu fusses le meilleur Peintre du monde comme tu es? A qui Iotte respondit promptement: Monsieur ie pense qu'il le croyroit lors qu'il croyroit vous regardant que seussiez seulement vostre a, b, c,. Ce qu'oyant Messire Forest cogneut son erreur & se veit payé de telle monnoye, comme il auoit vendu ses danrees.





NOUVELLE SIXIESME.

*Qui reprend couuertement ceux qui ne font cas
que d'une noblesse de race.*

*Michel Escalse prouua à certains ieunes hommes
qui firent vne gageure contre luy, que ceux de
la lignee des Baronchi estoient les plus nobles
du monde, ou de Maremme & en gaigna vn
jouper.*



ES Dames rioient encores de le
belle & prompte responce de Iotte,
quand la Royne en chargea à Ma-
Dame Flammette, qu'elle fuyuiſt,
laquelle commença à parler ainſi :
Mes ieunes Dames par ce que Pamphile a fait
mention des Baronchi : leſquelz vous ne co-
gnoiſſez paraduventure comme il fait, cela m'a
fait ſouuenir d'une nouuelle en laquelle ſera
demonſtré combien eſt grande leur nobleſſe,
ſans ſortir hors de propos : parquoy ie vueil la
vous raconter.

Il n'y a pas encor long temps qu'il y auoit à
Florence vn ieune homme nommé Michel Ef-

calfe, qui estoit le plus plaifant & recreatif homme du monde, & qui plus auoit d'inuentions nouvelles : au moyen de quoy les ieunes enfans de Florence estoient fort ayfés, quand ilz le pouuoient auoir en leur compagnie. Or aduint vn iour que luy eftant à Montiguy avec quelques autres, se meut entr'eux vne question en deuifant, lefquelz estoient les plus nobles, & de plus ancienne maifon à Florence. Dont les vns difoient que c'estoient les Vberti, les autres les Lamberti, & l'vn difoit ceux cy, & l'autre ceux là : comme chacun penfoit en fon entendement. Ce qu'oyant Escalfe, il commença à fouzrire, & dist : Allez allez fots que vous eftes, vous ne fauez que vous dites, ie vous dy que les Baronchi font les plus nobles & les plus anciens qui foient non feulement à Florence, mais en tout le monde, ou en Maremme, à quoy s'accordent tous les Philosophes, & vn chacun qui les cognoift, comme ie fay : & afin que vous ne preniez les vns pour les autres, ie vous parle des Baronchi noz voifins, qui se tiennent pres nostre Dame la grand. Quand ceux qui estoient avec luy qui cuidoient qu'il vouluft dire autre chofe, ouyrent cecy, ils se moquerent tous de luy, & dirent. Tu te moques comme fi nous ne cognoiffions les Baronchi auffi bien que tu faiz. Certes non fay, dist Escalfe : ains vous dy vray, & s'il y a quelqu'un qui vueille faire gageure d'un fouper pour fix compagnons telz qu'on voudra choisir, ie le gage-

ray, & si vous feray bien plus, car i'en croiray qui vous voudrez, entre lesquels y eut vn nommé Neri Vanniri qui dist : Je suis tout prest de gager ce souper. Et s'estans accordez ensemble d'en croire Pierre le Florentin, en la maison duquel ilz estoient, ilz s'en allerent à luy, & tous les autres apres, pour voir perdre Escalfe, & se moquer de luy, & conterent toute leur gageure, Pierre qui estoit discret ieune homme, ayant premierement ouy le dire de Neri, se tourna vers Escalfe, & luy dist : Et toy comment pourras tu prouuer ce que tu dis : Escalfe dist : Je le pourray par telle raison que non seulement toy : mais cestuy cy qui le nie, confessera que ie dy vray. Vous sçauiez bien que tant plus les hommes sont d'ancienne race, tant plus ilz sont nobles, & ainsi le soustenoit lon tout à ceste heure entre ceux ci, or est il, que les Baronchi sont plus anciens que nulz autres hommes qui soient en ceste ville : dont s'enfuit doncques, qu'ilz sont plus nobles, & si ie vous monstre qu'ilz soient les plus anciens, i'auray sans point de faute gaigné la gageure, & qu'il soit ainsi, vous deuez sçauoir que nostre Seigneur fit les Baronchi du temps qu'il apprenoît encores à peindre : mais les autres hommes sont faits du temps qu'il sçauoit bien paindre, & qu'il soit vray, prenez garde aux Baronchi & aux autres hommes, vous verrez tous les autres qui ont les visages bien composez, & deuëment proportionnez : mais vous

verrez aux Baronchi, que l'un a le visage fort long & estroit, l'autre l'a large outre mesure, & tel en y a il qui a le nez fort long, autre qui l'a court, & d'autres qui ont le menton long, renuersé contremont, & des maschoueres qui ressemblent celles d'un asne, encores y en a il tel, qui a un œil plus gros que l'autre, & tel qui a l'un plus bas que l'autre, comme vous avez veu que font volontiers les visages que les enfans font quand ilz commencent à aprendre à pourtraire : parquoy comme ie vous ay desia dit, il appert clairement que nostre Seigneur les fit quand il apprenoit à peindre, tellement qu'on ne peut nier, qu'ilz ne soient plus anciens que les autres, & par consequent plus nobles. De laquelle chose se souuenant tresbien Pierre qui estoit le Iuge, & Neri qui auoit gagé le soupper, & pareillement tous les autres de la compagnie de toutes les parties des Baronchi, & ayant ouy le plaissant argument de Escalse, chacun commença à rire & à dire que Escalse auoit le meilleur droit, & qu'il auoit gagné le soupper : car les Baronchi estoient pour certain les plus nobles, comme les plus anciens qui fussent non seulement à Florence, mais au monde, ou en Maremme. Et pour cela, quand Pamphile voulut monstrier la laideur du visage de Messire Forest, il dist à bon droit qu'il eut esté laid, aupres de l'un de ceux des Baronchi.



NOUVELLE SEPTIESME.

*Là où est monstté que vaut vne verité franche-
ment confessee, avec excuse facecieuse.*

*Ma-dame Philippe estant trouuee avec vn sien
amy par son mary fut citee deuant le Iuge, dont
elle se deliura avec vne prompte & plaisante
responce & fit moderer le statut fait au para-
uant contre les femmes.*



ESIA se taifoit Ma-Dame Flam-
mette, & chacun rioit encores du
nouuel argument dont auoit vsé
Escalse pour anoblir par dessus
tous les autres les Baronchi,
quand la Royne enioignit à Philostrate qu'il
dist sa nouuelle, & il commença à dire ainsi :
Honnestes Dames c'est belle chose que de
sçauoir bien parler à tous propos : mais ie
l'estime encores plus belle de le sçauoir faire,
quand la necessité le requier. Ce qu'une gentil-

femme dont ie vueil parler sceut si bien faire que non seulement elle en fit rire les auditeurs : mais aussi se desueloppa du danger de la mort comme vous orrez.

En la ville de Prato y eut iadis vn edit non moins (à dire verité) blasmable que cruel, lequel commendoit sans faire aucune exception : qu'aussi tost fust bruslee la femme, que son mary trouueroit en adultaire avec quelque sien amy par amours, comme celle qui feroit abandonnee à quelque autre pour de l'argent. Et durant cest edict auint qu'une gentillefemme belle, & plus que nulle autre amoureuse qui se nommoit ma-dame Philippe, fut trouuee en sa chambre vne nuit par Regnaut de Pugliesi son mari, entre les bras d'un beau ieune gentilhomme d'icelle ville nommé Lazarin Quassagliotri, qu'elle aimoit comme foy-mesmes : Ce que voyant le mary, courroucé merueilleusement, à peine se sceut il retenir de courir sur eux & de les tuer, & n'eust esté qu'il auoit peur de soy-mesmes, il l'eust fait enfuyuant l'impetuosité de son courroux. S'estant doncques retenu de le faire, il ne se peut pour tant garder qu'il ne pourchassast la rigueur de l'edit de Prato, chose qui ne luy estoit licite de faire, c'est à sçauoir la mort de sa femme. Et par ainsi ayant tefmoignage assez suffisant, pour prouuer la faute de la dite femme, aussi tost que le iour fut venu, sans en demander autre conseil il l'alla accuser, & la fit adiourner. La

dame qui estoit de grand cœur comme généralement ont accoustumé d'estre celles qui ayment à bon escient, delibera contre le conseil & opinion de plusieurs ses parens & amis, de comparoistre, & de vouloir plustost mourir virilement en confessant la verité, que en fuyant, viure vilainement en exil par contumace & nier qu'elle ne fust digne d'un tel amy, comme estoit celuy entre les bras duquel elle auoit esté trouuee la nuit passée, & s'en vint deuant le Potestat fort bien accompagnée d'hommes & de femmes qui tous luy conseilloient de le nier, & luy demanda avec un visage constant & vne voix ferme, qu'il luy demandoit. Le Potestat regardant ceste cy & la voyant belle de beau maintien, & selon que ses parolles tesmoignoient de grand cœur, commença d'auoir compassion d'elle, doutant qu'elle ne confessast chose, par laquelle il fust contraint pour faire son deuoir, de la faire mourir. Mais ne pouuant toutesfois delayer qu'il ne l'enquist de ce dont elle estoit accusée, il luy dist : Madame, vostre mary (comme vous voyez) est icy qui se plaint de vous, disant qu'il vous a trouuee en adultere avec un autre homme, & pource il demande que selon la rigueur d'un edict que nous auons, ie vous en face punir, & par consequent mourir : mais ie ne le puis faire si vous ne le confessez, & parainfi regardez bien comment vous respondrez & me dites s'il est vray, ce dont vostre mary vous accuse.

La Dame sans point s'estonner respondit plaisamment Monsieur il est vray que Regnaut est mon mary, & qu'il m'a trouué ceste nuit passée entre les bras de Lazarin, où i'ay esté plusieurs autres fois par bonne & parfaicte amitié que ie luy porte, & cecy ie ne nieray iamais : mais vous sauez bien, & i'en suis certaine, que les loix qu'on fait en vn pays doivent estre communes, & faictes avec consentement de ceux à qui elles touchent, ce qui n'est pas auenu de ceste-cy : car elle n'est seulement rigoureuse que contre les pauvres femmes, qui pourroient beaucoup mieux que les hommes satisfaire à plusieurs, & outre ce, quand elle fut faite, il n'y eut femme qui seulement y consentist : mais aussi qui iamais y ait esté appelée, au moyen dequoy elle ne se peut appeller à bon droit que mauuaise, & si vous voulez estre executeur d'icelle au preiudice de ma personne, & de vostre conscience, il est en vous de faire ce qu'il vous plaira : mais auant que vous procediez à donner aucune sentence, ie vous supplie qu'il vous plaise me faire vne petite grace, c'est à sçauoir que vous demandiez à mon mary, si toutes & quantesfois qu'il luy a pleu receuoir plaisir de moy, ie ne luy ay pas fait abandonner ma personne. A quoy Regnaut sans attendre que le Potestat le luy demandast, respondit soudainement, que sans aucune doute sa femme toutes les fois qu'il l'en auoit requise, ne luy auoit

iamais refusé aucun plaisir qu'il desirast prendre d'elle. Alors la dame continuant son propos incontinent dist : Le vous demande doncques monsieur le Potestat, s'il a tousiours pris de moy, ce qui luy a pleu, & qui luy a esté besoin, que deuois ie, ou doy faire du demourant? Le doy-ie ietter aux chiens? N'est-il pas plus raisonnable que i'en face plaisir à vn gentilhomme qui m'ayme plus que soy mesmes que le laisser perdre ou gaster? Il y auoit là vne telle examination & d'une si grande & renommee dame comme ceste-cy estoit, presque tous ceux de la ville de Prato, lesquelz oyant vne si plaifante demande crierent soudainement (apres auoir ry leur saoul) tous d'une voix que la dame auoit raison, & qu'elle disoit tresbien, tellement qu'auant qu'ils partissent de là l'on modifia par l'auis du Potestat, l'edit si cruel & fut dit qu'il s'entendoit seulement de celles qui pour argent feroient tort à leurs maris. Au moyen dequoy Regnaut demourant confuz d'une si sole entreprise, se partit de l'auditoire, & la dame ioyeuse & deliure, estant quasi reschappee du feu, s'en retourna toute glorieuse en sa maison.





NOUVELLE HVICTIESME.

*Pour se moquer de quelque mal-plaisantes laide-
rons, qui ne trouue rien beau ne plaisant
qu'elles mesmes.*

*Fresco conseilla à sa niece que si ceux qui sont
plaisans à voir luy faschoient, comme elle di-
soit que elle ne se mirast iamais.*

LA nouvelle que raconta Philostrate piqua au commencement, avec vn peu de honte les cœurs des Dames qui l'escoutoient, dont la rougeur qui leur monta au visage, en donna vray tesmoignage, à la fin en se regardant l'vne l'autre, & ne se pouuans à peine tenir de rire, elles en souzriant l'acheuerent d'escouter : mais apres qu'elle fut acheuee, la Royne se tourna vers ma dame Emilie, & luy commanda qu'elle fuiust. Laquelle en soufflant comme si elle se leuoit de dormir, commença ainsi. Mes desirables dames, pource qu'vn long penser m'a

tenue grand piece fort loïn d'icy, ie me passeray (pour obeïr à nostre Royne) d'une moindre nouvelle que ie n'eusse paraventure fait, si i'eusse eu le cœur icy, en vous contant la sotte faute d'une ieune fille, avec vn plaissant mot & correct, que luy dist vn sien oncle si elle eust esté de si bon esprit qu'elle l'eust entendu.

Vn homme donc qui se nomma Fresco de Chelatico, auoit vne niece nommee par mignardise Frachon. Laquelle encor qu'elle fust de belle taille, & eust beau visage (non pas pourtant de ces angeliques que nous voyons plusieurs fois) se reputoit neantmoins si grande chose & si noble, qu'elle auoit prins vne coutume de blasmer les hommes & les femmes, & tout ce qu'elle voyoit, sans auoir aucun esgard à soy-mesmes, qui estoit aussi mal plaissante, facheuse & depiteuse, que nulle autre qu'on eust sceu veoir : car on ne pouuoit faire aucune chose à son gré, & outre tout cecy elle estoit si fiere & hautaine, que quand elle eust esté de la maison royale de France, cela eust esté encor trop, & quand elle alloit par la rue, tout luy puoit, de sorte qu'elle ne faisoit iamais autre chose que se tordre le nez, comme si tous ceux qu'elle voyoit ou rencontroit luy puoient. Or laissons à part plusieurs siennes conditions malplaissantes, & ennuyeuses. Il aduint vn iour qu'elle s'en estant retournée à la maison où son oncle estoit, elle toute pleine de mignardise &

ne faisant que souffler, s'alla seoir aupres de son oncle qui luy demanda. Franchon que veut dire cecy? qu'estant aujourd'huy feste tu t'en foy si tost retournee à la maison? A qui elle toute tombant par pieces de mignardise, respondit : Il est vray que ie m'en suis venuë ainsi tost, parce que ie ne pense point qu'il y eust iamais en ceste ville tant d'hommes & de femmes si malplaisantes & facheux comme il y a aujourd'huy, & n'en voy pas vn passer par la rue qui ne me desplaie comme ie ne say quoy, & ne pense pas qu'il y ait femme au monde, à qui les personnes malplaisantes ennuyent tant qu'à moy : tellement que pour ne les voir ie m'en suis ainsi tost venuë. A laquelle, Fresco, à qui les puantes façons de faire de sa niece faschoient desesperément dist : Ma fille si les malplaisans te deplaisent si fort comme tu dis, fay si tu veux viure ioyeuse, que tu ne te mires iamais. Mais [elle plus vuide de sens qu'une canne, & qui pensoit autant scauoir que Salomon, n'entendit ce que vouloit dire le mot de son oncle, ne plus ne moins qu'un mouton eust fait : ains dist qu'elle se vouloit mirer comme les autres, & ainsi elle demoura en ceste grosse lourderie, & encor y est.





NOVVELLE NEUVVIESME

*Monstrant la difference des lettrez avec les
ignorans.*

*Messire Guido Caualcant dist avec vn honnest
mot iniure à certains cheualiers Florentins qui
l'auoient surprins.*



COGNOSSENT la Royne que madame Emilie estoit quitte de sa nouuelle, & qu'il ne restoit qu'à elle à dire, hors mis celuy qui par priuilege auoit à parler le dernier, elle commença ainsi : Gracieuses dames, vous m'avez aujourd'huy osté vne couple de nouuelles pour le moins, dont i'en pensois dire l'une, toutesfois il m'en est encor demouré vne, en la conclusion de laquelle est contenu vn tel mot, que parauenture il ne s'en est point encores conté vn de si grande intelligence.

Vous deuez doncques sçauoir qu'il y eut au temps passé plusieurs belles & louables coustumes en nostre cité, dont il n'en est pas demouré aujourd'huy vne, Dieu mercy & l'auarice, qui

avec les richesses est tellement cruë en icelle, qu'elle les en a toutes chassées, entre lesquelles y en auoit vne telle, qu'en diuers lieux de Florence, s'assembloient les bonnes maisons du quartier, & faisoient leur compagnie d'un certain nombre de personnes en regardant d'y mettre ceux qui aisément pouuoient supporter la despence aujourd'huy l'un, & demain l'autre & ainsi mettoient par ordre la nappe chacun son iour à toute la compagnie, là où quelquefois ilz inuitoient & faisoient honneur aux gentilhombres estrangers, quand il y en arriuoit, & pareillement à des citoyens, ilz se vestoient aussi d'une forte au moins vne fois l'an, & s'en alloient les plus nobles ensemble à cheual par la ville, où quelquefois faisoient quelque tournois ou autre fait d'armes : mesmement és iours des principales festes de l'année. Entre lesquelles compagnies y en auoit vne de messire Bette Brunelesqui, en laquelle messire Bette & ceux de sa compagnie auoient fort tasché d'y tirer Guido filz de messire Caualcant de Caualcanti, & non sans cause : car outre ce qu'il estoit des meilleurs dialecticiens que le monde soustint, & parfait Philosophe naturel (desquelles choses la compagnie ne se soucioit gueres) si estoit il aussi tresgentil & fort honneste gentilhomme bien parlant, & toute chose qu'il vouloit faire, & qui appartenoit à gentilhomme, il la fauoit mieux faire que nul autre, & avec tout cecy il estoit trefriche, & si fauoit faire honneur à qui-

conques il pensoit en son entendement le mériter, autant que langue le sauroit exprimer : mais iamais messire Bette n'auoit tant sceu faire de l'auoir tiré en leur compagnie : pensant luy & ses compagnons que cecy auint, de ce que messire Guido speculant quelquefois, deuenoit fort retiré d'auec les hommes, & pource qu'il tenoit quelque peu de l'opinion des Epicuriens, le menu peuple disoit que toutes ses speculations n'estoient seulement que pour chercher si on pourroit trouuer que Dieu ne fust point. Or auint vn iour que partant messire Guido de l'Eglise sainct Michel d'horté, & s'en venant par le cours des Adimari iusques à sainct Iehan, qui estoit quasi son chemin ordinaire, estant lors autour l'Eglise sainct Iean, ces grandes sepultures de marbre, qui sont aujourd'huy à saincte Reparee, & plusieurs autres, & luy entre les colonnes de porfire qui y sont, & ses sepultures, & la porte de sainct Iean qui lors estoit fermee, messire Bette trauerfa à cheual auec sa compagnie la place de saincte Reparee, voyant messire Guido parmy ces sepultures, & dit : Allons le harfeller. Parquoy donnans des espérons aux cheuaux, comme s'ilz l'eussent voulu affaillir, furent quasi premier sur luy qu'il s'en aperceust : & luy commencerent à dire, Guido, tu refuses d'estre de nostre compagnie, mais quoy ? quand tu auras trouué que Dieu n'est point, qu'auras tu fait ? Aufquelz Guido se voyant enuironné d'eux, soudainement leur

dit : Messieurs, vous me pouuez faire en vostre maison ce qu'il vous plaist. Et ayant mis la main sur vne de ces sepultures qui estoient grandes, print son fault, & se ietta de l'autre part, comme celuy qui estoit fort agile. Et quand il se fut desuelopé d'eux, il s'en alla. Ceux-cy demourerent tous estonnez, se regardant l'un l'autre, & commencerent à dire qu'il estoit sans entendement, & que ce qu'il auoit respondu ne venoit point à propos : car ilz n'auoient non plus à faire là où ilz estoient que tous les autres citoyens, ne messire Guido moins que piece d'eux. Aufquels messire Bette dist : C'est vous autres qui este sans entendement, si uous ne l'avez entendu il nous a honnestement & en peu de parolles, dit la plus grande iniure du monde : par ce que si vous y regardez bien, ces sepultures sont les maisons des morts, pource qu'on y met les morts, & y demourent, lesquelles il dit que c'est nostre maison, pour nous faire cognoistre que nous & les autres hommes idiots, & non lettrez, sommes pis que morts, à comparaison de luy, & des autres hommes sauans, & par ainsi estans icy entre ces sepultures, nous sommes en nostre maison. Alors chacun entendit ce que messire Guido auoit voulu dire, & en eurent honte, ne iamais plus ne l'agasserent, & tindrent de là en auant messire Bette pour subtil & entendu cheualier.



NOUVELLE DIXIESME

*Pour monstrier de quelz abus on vse souuent sous
le manteau de religion.*

*Frere Oignon promet à certains paysans, de
leur monstrier la plume de L'ange Gabriel, au
lieu de laquelle trouuant des charbons, il leur
dist, que c'estoit de ceux dont saint Laurens
fut rosti.*



VAND chacun de la compagnie fut
eschapé de dire sa nouuelle, co-
gnoissant Dioneo, que c'estoit à
luy à dire la sienne sans attendre
trop solennel commandement,
apres qu'il eut imposé silence à ceux qui
louoient le mot qu'on auoit ouy de messire
Guido commença ainsi : Honnestes Dames,
combien que par mon priuilege il me soit
permis de parler de ce qui plus me viendra à
gré, si n'entend-ie toutesfois, de me vouloir
separer de ceste matiere, dont vous toutes

avez fort bien parlé à propos. Mais fuyant voz brisees, ie delibere de vous monstrier combien cautelement & avec vn soudain rempart, vn des religieux de sainct Antoine, euita vne honte que deux ieunes hommes luy auoient preparee : & ne vous deura ennuyer de ce que pour bien vous dire la nouuelle complete, ie feray vn peu long, si vous regardez au soleil qui est encor au milieu du ciel.

Certalde, comme parauenture vous pouuez auoir entendu, est vn village de la vau d'Else, assis en nostre domaine de Florence : lequel encor qu'il soit petit, il a pourtant esté autrefois habité de gentilzhommes, & gens aysez : là où vn des religieux de S. Antoine nommé frere Oignon, auoit de long temps accoustumé d'aller, pour recueillir les aumosnes, que les fots leurs faisoient tous les ans vne fois : tant pource qu'il trouuoit bonne pasture, qu'aussi pource qu'il y estoit volontiers veu : plus parauenture pour le nom qu'il portoit, que pour autre grande deuotion : d'autant que ce terroir produit les meilleurs oignons de toute la Toscane. Ce frere Oignon estoit de petite stature, roufseau, vn visage allegre, & le meilleur coquin du monde : & outre ce (encor qu'il n'eust aucun sçauoir) il estoit si parfaict & prompt parleur, que qui l'eust cogneu, non seulement l'eust il estimé vn grand rhetoricien : mais eust dit qu'il estoit luy mesmes Ciceron, ou bien Quintilien : & si estoit compere de tous

ceux du païs, ou amy, ou bien voulu. Lequel fuiuant sa coustume y alla au mois d'Aoust vne fois entre les autres. Et vn dimenche matin estans toutes les bonnes gens d'autour, hommes & femmes venus à la messe, à la principale eglise, il s'auança quand il veit qu'il en estoit temps, & dist : Messieurs & dames, vostre coustume est, comme vous sçauiez d'enuoyer tous les ans aux pauvres du baron monsieur S. Antoine de voz blez & auoynes : les vns peu, & les autres beaucoup, chacun selon son pouuoir & sa deuotion : à fin que le benoist S. Antoine soit garde de voz bœufs, asnes, pourceaux, & de voz brebis : & outre ce, vous auez accoustumé de payer, mesmement ceux qui sont escritz en nostre confrairie ce peu de deuoir qu'on paye vne seule fois l'an. Pour lesquelles choses recueillir, ie suis enuoyé par mon supérieur : c'est à sçauoir monsieur l'Abbé : & par ainsi avec la benediction de Dieu, vous viendrez apres midy quand vous orrez sonner les cloches icy, hors de l'Eglise, là où à la mode accoustumee ie vous feray la predication & baïferez la croix : & d'auantage pource que ie vous cognoy tous tresdeuots du baron monsieur S. Antoine ie vous monstrey de grace speciale vne treffaincte & belle relique, laquelle moymesme ay iadis aportee de la terre sainte d'outre mer, sauoir est, vne des plumes de l'ange Gabriel : laquelle demoura en la chambre de la vierge Marie, quand il luy vint

faire l'annonciation en Nazareth. Et cecy dit, il se teut & s'en retourna ouir la messe. Or ainsi qu'il disoit toutes ces belles choses, il y auoit entre plusieurs autres qui estoient à l'Eglise, deux bons compagnons cauts & fins l'un nommé Iean de Bragoniere, & l'autre Blaïse Piffin : lesquels apres qu'ilz eurent ry entr'eux de la relique de frere Oignon (encor qu'ilz fussent bien fort ses amis & de sa compagnie) delibererent entr'eux mesmes de luy bailler quelque trouffe de ceste plume : & ayant sceu que frere Oignon disnoit ce matin là au chasteau avec quelque sien amy, si tost qu'il fut à table, ilz descendirent incontinent en la rue, & s'en allerent au logis où frere Oignon estoit descendu, en deliberation que Blaïse amuseroit le garçon seruiteur du beau pere, & que Iean cherchoit ceste plume parmi les besongnes de frere Oignon : pour voir quelle elle estoit, & pour la luy oster : à fin d'entendre par apres, ce qu'il en diroit au peuple. Ce garçon, lequel aucuns appelloient Gucchio Balena & aucuns autres Gucchio Imbrate, & quelques vns Gucchio Pourceau, estoit si mauuais garçon, qu'il n'est pas à croire qu'un peintre qui se nommoit Lipotopo en fist iamais un tel : duquel frere Oignon auoit accoustumé souuentefois faire des contes, & dire entre ses compagnons : Mon garçon a en soy neuf choses telles que si Salomon, Aristote, ou Seneque en eussent eu seulement l'une d'icelles, elle eust

eu la puissance de troubler toute leur vertu, tout leur sens & toute leur saincteté : pensez donc quel homme il doit estre, puis qu'il en a neuf, & qu'en luy n'y a vertu, sens, ne aucune saincteté. Et quand on demandoit quelquesfois à frere Oignon, quelles estoient ces neuf choses, luy qui les auoit mises en rime respondit : Je les vous diray.

Il est lent, fouillart & menteur,
Pareffeux, mesdissant, trompeur,
Sans foin, sans esprit, sans valeur.

Sans ce qu'outre ce que ie vous en dy, il a quelques autres tromperies avecques ceux cy qui se taisent pour le mieux, & ce dont il faut plus rire de luy, est qu'il veut prendre femme par tout où il se trouue, & maison à louage : & pource qu'il a la barbe grande, noire, & bien grasse, il cuide estre si beau & agreable, qu'il pense que toutes les femmes qui le voyent deuiennent amoureuses de luy : & qui le laisseroit faire il laisseroit tomber sa ceinture pour courir apres elles : bien est vray qu'il me sert de beaucoup : car personne ne parle iamais à moy en si grand secret que ce soit, qu'il n'en vueille ouir sa part : & s'il auient que quelqu'un me demande quelque chose, il a si grand peur que ie ne sache respondre, que soudainement il respondra le pre-

mier, ouy ou non, comme il iuge qu'il soit conuenable. Or laissant frere Oignon cest habille varlet à son logis, il luy commanda qu'il gardast bien que personne ne touchast à ses besongnes, & mesmement à ses besaces, parce que les choses sacrees estoient dedans : mais Gucchio Imbrate qui estoit plus amoureux d'estre en cuisine que les rossignols ne sont d'estre sur les vertes branches : & mesmement quand il fauoit qu'il y auoit quelque chambriere, luy ayant veu en celle de l'hoste, vne grosse garce grace, racourcie, & mal faicte, qui auoit deux tetasses ressemblans deux paniers à porter fiens, avec vne face qui sembloit qu'elle fust des Baronchi, toute suante, pleine de gresse & enfumee, il descendit en celle cuisine (ne plus ne moins que fait l'autour sur la charongne) laissant la chambre de frere Oignon ouuerte, & toutes ses choses à l'abandon : encor que ce fust au mois d'Aoust (qu'il fait grand chaut) toutesfois il se meit à seoir aupres du feu, & commença à entrer en propos avec ceste-cy qui se nommoit Nutte : & luy dire qu'il estoit gentilhomme par procureur, & qu'il auoit des escus plus de milanteneuf, sans ceux qu'il auoit à payer autrui, qui estoient auant plus que moins, & qu'il fauoit tant dire & faire de choses que merueilles, & sans regarder à vn sien capuchon, sur lequel y auoit tant de graisse, qu'on en eust bien affaisonné la chaudiere du haut pas : & à vne fienne

iaquette toute rompuë, & rapetassée, & autour du col & deffouz les effelles tant esmaillee de fueur avec plus de taches & de plus diuerfes couleurs, que ne furent iamais les draps de foye de Tartarie ou des Indes, & les foulliers tous rompus, & ses chausses deffirees, luy dist (comme si quasi il eust esté le sire de Castillon) qu'il la vouloit habiller tout de neuf, & la tirer de la captiuité de seruir & de demourer avec autrui : pareillement (sans auoir grands heritages) la reduire en esperance de meilleure fortune : & plusieurs autres choses qu'il luy dist, lesquelles encores qu'il les vomist fort affectionnément, toutesfois elles conuerties en fumée (comme faisoient la grande partie de ses entreprises) tournerent à la fin à néant. Voyant doncques les deux ieunes compagnons, Guccio Pourceau occupé autour de Nutte, ilz en furent trescontens : parce que leur peine estoit demy acheuee : & ne trouuans aucune contradiction, quand ilz furent entrez dans la chambre de frere Oignon, d'autant qu'elle estoit ouuerte, la premiere chose qui leur vint entre mains, en cherchant, ce fut la besace où estoit la plume voyans laquelle ouuerte, ilz trouuerent vn petit coffre en vn grand enueloppement de taffetas, dedans lequel (quand ilz l'eurent ouuert) ilz trouuerent vne plume de la queue d'un perroquet, laquelle ilz iugerent deuoir estre celle qu'il auoit promis monstrier à ceux de Certalde : & certes il le pouuoit en ce temps

là ayfément faire accroire : car encores n'estoient passees iusques en Toscane, sinon bien peu des lasciuitez d'Egypte, comme elles ont faiët depuis en grande abondance, à la ruine de toute l'Italie. Et combien qu'elles fussent lors vn peu congneues de quelques vns, si est-ce que les habitans de celle contree n'en sçauoient presque rien, ains y durant encores la pure simplicité des Anciens, non seulement ilz n'auoient point veu de perroquetz : mais la plus grand'part des habitans n'en auoient iamais ouy parler : contentez que furent doncques les deux ieunes hommes d'auoir trouué la plume, ilz la prindrent : & pour non laisser le coffre vuide, eux voyans des charbons en l'vn des coings de la chambre, ilz l'en emplirent, puis l'ayant refermé & tout raccoustré comme ilz l'auoient trouué, s'en vindrent avec la plume les plus ayfes du monde, sans auoir esté apperceuz de personne, & commencerent à attendre que deuroit dire frere Oignon, quand il trouueroit des charbons au lieu de la plume. Les hommes & les femmes simples qui estoient à l'Eglise, oyans qu'ilz deuoient voir la plume de l'Ange Gabriel, apres que la Messe fut dictée, s'en retournerent à leurs maisons, & l'ayant dict l'vn voisin à l'autre, & l'vne comere à l'autre, incontinent que chacun eut dîné, tant d'hommes & tant de femmes coururent au Chasteau, qu'à peine y pouuoient ilz entrer : attendans en grande deuotion de voir

ceste plume. Quand frere Oignon eut bien dîné, puis apres reposé son vin, il se leua vn peu apres midy : sçachant la multitude grande de payfans qui estoient venuz pour voir la plume, il enuoya dire à Guccio Imbrate qu'il vint là hault avecques les clochettes, & qu'il apportast ses besaces, lequel apres qu'il se fut desueloppé (non sans grande peine) de la cuisine & de Nutte la chambriere, y alla avec les choses qu'on demandoit, là où estant arriué, parce que le trop d'eau qu'il auoit beu, luy auoit fait deuenir le ventre gros il s'en alla par le commandement de frere Oignon sur la porte de l'Eglise, où il commença à sonner fort ses clochettes. Et quand tout le peuple fut assemblé, frere Oignon (sans s'estre apperceu qu'on eust rien touché à ses besongnes) commença sa predication, & dist mille choses pour seruir à son propos : & quand il vint à vouloir monstrier la plume de l'Ange Gabriel, ayant premierement faict en grande deuotion la confession, il fit allumer deux torches, & en desueloppant tout doucement le taffetas (s'estant premierement osté le capuchon de la teste) il tira le petit coffret & l'ouurit, apres auoir premierement dict quelques paroles à la louange & recommandation de l'Ange Gabriel & de sa relique, & le voyant plein de charbons, il ne soupçonna pas que son varlet eust faict cela, car il sçauoit bien qu'il n'auoit pas l'esprit pour ce faire, & si ne le maudit point d'auoir mal

gardé qu'autrui l'eust fait : mais maugreant en soy-mesmes de luy auoir baillé les choses à garder, le cognoissant comme il faisoit paresseux, desobeissant, nonchalant, & sans entendement, il haussa sans point rougir le visage, & les mains au Ciel, & dist, si haut qu'il fut ouy de tous. O Dieu louee soit tousiours ta puissance, & apres ayant refermé le coffre, se retourna vers le peuple & dist : Messieurs & Dames vous deuez sçauoir que quand i'estoye encores fort ieune, ie fus enuoyé par mon superieur en ces quartiers où le Soleil apparoit, & me fut donné charge avec expres commandement, que ie cherchasse tant que ie trouuasse les priuileges du Porchelaine, lesquels encor qu'ilz ne coustassent rien à féeller, sont trop plus vtiles à autrui qu'à nous : au moyen dequoy m'estant mis en chemin partant de Venise, & m'en allant par le bourg des Grecz, & de là cheuauchant par le royaume de Garbe, & par Baldacque, i'arriuay en Parion, d'où non sans grande soif, i'arriuay apres quelque temps en Sardaigne : mais pourquoy vous vois-ie deuiser de tous les pays que i'ay cherchez, i'aborday apres que i'euz passé le bras de saint George en Truffie & en Bouffie, qui sont pays fort habitez, & avec grand peuple : & de là ie m'en vins en la terre de mensonge, où ie trouuay beaucoup de freres de nostre religion & de plusieurs autres : lesquels alloient tous fuyans la peine & le malayse, pour l'amour de Dieu, se soucians peu des peines & trauaux

d'autrui, s'ilz voyoient qui luy en vint profit, ne despendans autre argent en ce pays finon monnoye sans coin, & de là ie passay en terre de la Brusse là où les hommes & les femmes vont à galloches par dessus les montaignes, reueftans les pourceaux de leurs boyaux mesmes, & vn peu par delà ie trouuay des gens qui portoient le pain dedans les bastons, & le vin dedans les sacs, au partir d'auec lesquels i'arriuay aux montaignes de Bachus là où toutes les eaux courent en bas, & en brief de temps ie m'y fourray si auant que ie me trouuay en Indie Pastenade, là où ie vous iure par l'habit que ie porte sur mon dos, que ie vis voller les serpettes, choses incroyables à qui ne l'auroit veu : mais de cela ne me laissera point mentir Maso del Saggio grand marchand, que ie trouuay en ce pays là cassant des noix, & vendant les coquilles en destail, toutesfois moy ne pouuant trouuer ce que i'alloye cherchant, par ce qu'il fault aller par eau de ce lieu iusques là, i'arriuay en m'en reuenant en ces terres sainctes, là où l'an de l'Esté le pain frais y vaut quatre deniers, & le chault on l'y donne pour neant : Et là où ie trouuay le venerable pere Messire ne me blasmez s'il vous plaist, tresdigne patriarche de Ierusalem : lequel pour la reuerence de l'habit que i'ay tousiours porté du baron monsieur sainct Antoine, voulut que ie visse toutes les sainctes Reliques qu'il auoit en sa garde, dont il y en auoit tant que si ie vous

les vouloye toutes conter, ie n'en viendroye à bout en plusieurs lieux : mais toutesfois pour ne vous laisser desconforter, ie vous en diray quelques vnes. Il me monstra premierement du doigt du sainct Esprit auffi sain & auffi entier qu'il fut iamais, & le museau du Seraphin qui apparut à sainct François, & vn des ongles du Cherubin, & vne des costes du Verbum caro, boute toy aux fenestres & des habillemens de la saincte foy catholique, & quelques rayons de l'Estoille qui apparut aux trois Roys en Orient, & vne fiolle de la fueur de sainct Michel, quand il combatit le Diable, & la maschouere de la mort du Lazare & plusieurs autres. Et pource que ie luy donnay liberalement le double des plaines de Montmoreau en vulgaire, & de quelques chapitres de cheurerie, lesquelz il auoit longuement cherchez, il me fit participant de ses sainctes Reliques, & me donna vne des dentz de saincte Croix, & en vne petite fiolle quelque peu du son des cloches du temple de Salomon, & la plume de l'Ange Gabriel, dont ie vous ay desia parlé auecques vne des galoches de saint Guerard de grand ville, que ie donnay n'y a pas longtems à Florence Guerard de Boufy qui luy porte vne tresgrande deuotion, & si me donna encor des charbons, auec lesquelz fut rosti le bien-heureux martir monsieur sainct Laurens, lesquelles choses rapportay toutes deça deuotement auecques moy. Il est vray que mon superieur n'a iamais souf-

fert que ie les aye monstrees, iusques à tant qu'il a esté deuement certifié si c'estoient elles ou non : mais maintenant que par certains miracles qu'elles ont faict, & par lettres qu'il a receu du patriarche, il en a esté bien certifié, il m'a donné permission de les monstrier, & ne m'en voulant fier à autrui, ie les porte tousiours avecques moy. Vray est que ie porte la plume de l'Ange Gabriel, afin que elle ne se gaste, en vne petite boiste, & les charbons avec lesquels fut rosty sainct Laurens, en vne autre qui luy ressemble tant que plusieurs fois il m'aduient de prendre l'une pour l'autre, comme il m'est presentement aduenue : parce que pensant auoir la boiste où estoit la plume, i'ay apporté celle où sont les charbons, que ie ne pense point auoir esté faite, ains me semble estre certain que ç'a esté de la volonté de Dieu & que luy mesmes m'a mis entre mains celle des charbons : me souuenant tout à ceste heure que la feste sainct Laurens est d'icy à deux iours : & par ainsi voulant nostre Seigneur que en vous montrans par moy les charbons avec lesquels sainct Laurens fut rosty, la bonne deuotion que vous deuez auoir à luy, se reclame en voz cœurs, il m'a faict prendre, non pas la plume que ie deuoye icy apporter, mais les benoistz charbons estaintz de l'abondante humeur de ce sainct corps, & par-ainsi mes enfans bienheureux, ostez voz bonnetz, & vous approchez icy deuotement pour les voir : mais ie veux

bien que vous sçachiez premierement que quiconque est marqué de ces charbons en signe de Croix, il peut viure certain toute celle annee, que feu ne le touchera qu'il ne le fente. Et apres qu'il eut ainsi parlé en chantant vne louange de sainct Laurens, il ouurit la boiste, & monstra les charbons, lesquelz apres que la folle multitude eut quelque temps regardé reueremment & avec grande admiration, tous avec vne tresgrande presse s'approcherent de frere Oygnon, en donnant meilleures offrandes qu'ilz n'auoient accoustumé, le priant chacun qu'il les en marquast. Parquoy frere Oygnon ayant prins en sa main ces charbons, commença à faire sur leurs robbes de toile blanche & sur leurs iacquettes & voylles des femmes, les plus grandes croix qu'il estoit possible, affermant qu'autant qu'ilz diminuoient à faire ces croix, autant croissoient ilz puis apres en la boiste, ainsi qu'il auoit esprouué par plusieurs fois. Et en telle maniere ayant croisé non sans tresgrand profit tous les Certaldois, il se mocqua par son soudain aduis, de ceux qui s'estoient cuydez mocquer de luy, en luy ostant la plume, lesquelz ayans esté à sa predication, & ouy la nouuelle eschappatoire qu'il auoit trouuee, & avec quelles parolles il l'auoit dicté, auoient tant ry que les maschoueres leur cuyderent tomber. Et apres que le peuple fut party, lesdictz Brogoniere & Pessin s'en allerent vers frere Oygnon à qui avec la plus grande chere du

monde, ilz descouvrirent ce qu'ilz auoient fait, & luy rendirent sa plume, laquelle l'annee enfuyuant ne luy valut moins que luy auoient valu ce iour les charbons. Ceste nouvelle donna egallement à toute la compagnie vn tref-grand plaisir & foulas, & fut fort ry par tout de frere Oygnon, & mesmement de son pelerinage, & des Reliques qu'il auoit aussi bien veu comme apportees, puis voyant la Royne qu'elle estoit acheuee, elle se leua debout : & ayant osté la couronne de dessus sa teste, la mit en riant sur celle de Dioneo, disant : Il est temps Dioneo que tu espreuues quelque peu, quelle charge c'est que d'auoir femmes à gouverner & guider : pource fois Roy, & nous gouuerne, de sorte qu'à la fin nous ayons à nous contenter de ton gouuernement. Lequel ayant prins la couronne respondit en riant : Vous en pouuez auoir veu plusieurs fois (ie dy des Roys d'eschetz) trop plus precieux que ie ne suis : & pour certain si vous me vouliez obeir comme vn vray Roy veut & doit estre obey, ie vous feroye iouyr de la chose sans laquelle pour certain iamais bonne chere n'est accomplie : mais laissons à part ces parolles, ie gouuerneray comme ie scauray. Et ayant faict appeller le maistre d'hostel comme on auoit accoustumé pour venir parler à luy, il luy commanda par ordre ce qu'il auroit à faire, tant que son gouuernement dureroit, & apres il dist : Honnestes Dames, on a deuisé desia en tant de

diuerſes manieres de l'induftrie humaine, & des accidens diuers que ſi Licifque ne fuſt tantoft venue icy, qui avec ſes parolles m'a trouué matiere pour noſtre deuſ demain, ie doute que i'euffes longuement ſongé à trouuer vn theſme pour deuſer. Elle comme vous auez ouy, diſt qu'elle n'auoit voisine qui fuſt allee pucelle à ſon mary, & diſt encor plus qu'elle ſçauoit bien combien & quelles tromperies les mariees faiſoient à leurs maris : mais laiſſant à part la premiere partie qui eſt œuvre d'enfans, ie penſe que la ſeconde doiue eſtre plaiſante à deuſer, & par ainſi ie veux que demain on parle (puis que Licifque nous en a donné occaſion) des tromperies que les femmes ont iadis faiçt par amour, ou par leur ſaluation, à leurs marys : ſoit qu'ilz s'en ſoient apperceuz ou non. Le parler d'une telle matiere ſembloit à aucunes des Dames qu'il fuſt mal ſeant à elles, & le prioit qu'il changeaſt de propos, aufquelles il reſpondit : Mes Dames, ie congnois auſſi bien que vous, ce que ie vous ay enchargé, & à le changer ne me peut eſmouuoir ce que vous voulez alleguer, conſiderant que le temps eſt tel, que ſe gardans ſeulement les hommes & les femmes de faire aucune choſe deſhonneſte, il leur eſt loifible de parler & deuſer de tout ce qu'on veut. Or ne ſçauiez vous pas qu'au moyen de la malice du temps où nous ſommes, les iuges ont abandonné leurs ſieges, les loix tant diuines qu'humaines ſe taiſent, & eſt don-

nee ample licence à vn chacun d'y conseruer sa vie. Parquoy si vostre honnesteté s'eslargist quelque peu en parler & deuiser, non pas pour fuyure iamais ne faire aucune chose deshonneste, mais pour donner plaisir & recreation à vous & à autrui, ie ne voy point avec quel argument, au moins qui ayt quelque raison, qu'aucun vous en puisse reprendre à l'aduenir : dauantage vostre compagnie qui a esté treshonneste depuis le premier iour qu'elle est assemblee iusques à present, ne me semble point auoir esté maculee pour chose qu'on y ayt dicte, ny ne se maculera avec l'ayde de Dieu, outre plus qui est celuy qui ne congnoisse vostre honnesteté, laquelle non seulement les propos & deuis ne pourroient faire desuoyer du droit chemin, mais ne aussi la terreur de la mort : Et à vous dire la verité, qui sçauroit que vous ne voulussiez deuiser quelques fois de ces follies, il soupçonneroit que vous fussiez en cecy coupables, & que cela vous gardast d'en oser parler. Et d'autre part considerez quel bel honneur vous me feriez, qui ayant esté obeissant à toutes, & maintenant m'ayant faict vostre Roy, vous me voulussiez mettre la loy au poing, & ne deuiser point de la matiere que i'auroye proposee. Laissez doncques, mes Dames, ce soupçon, plus cuisant à ceux qui sont pleins de mauuaises pensees, qu'à vous autres, & que chacune en la bonne heure pense de dire la plus belle. Quand les Dames eurent ouy cecy, elles dirent

qu'ainfi fist comme il luy plairoit, parquoy le Roy donna congé à chacune de faire ce qu'il voudroit iusques à l'heure de souper. Et pource que le Soleil estoit encores fort hault d'autant que les nouvelles qu'on auoit dict auoient esté contees, Dioneo se mit à iouer aux tables avec les autres deux ieunes hommes, & madame Elisse ayant tiré à part les autres Dames leur dict, Depuis le temps que nous auons esté icy, i'ay tousiours eu desir de vous mener en vn lieu fort pres d'icy, où ie pense que piece de vous autres n'a iamais esté, & se nomme la vallee des Dames, & encor n'ay-ie veu vne heure propice pour vous y mener, sinon maintenant, tant est encor le Soleil hault & par ainfi s'il vous plaist d'y venir, ie m'asseure quand vous y ferez que vous ferez trescontentes d'y auoir esté. Les Dames respondirent qu'elles estoient toutes prestes d'y aller, & ayans appellé vne de leurs chambrières se mirent en chemin sans en sonner mot à piece des hommes, & n'eurent cheminé gueres plus de demie lieuë qu'elles n'arriuerent en la vallee des Dames, dedans laquelle elles entrerent par vne voye fort estroicte de l'vn des costez, par où couroit vn ruisseau tresclair, & veirent ladicte vallee tant belle & si plaifante, mesmement en ce temps là qu'il faisoit grand chault qu'il n'est pas possible au monde d'en deuifer vne pareille. Et selon que l'vne d'icelles Dames m'a depuis conté la plaine qui estoit en la vallee estoit aussi ronde comme

si elle eust esté faicte par compas, combien qu'elle resemblast artifice de nature, & non de main d'homme, & auoit de circuit vn peu plus d'vn quart de lieuë enuironnee de six petites montaignes non point trop hautes : au dessus de chacune desquelles on voyoit vn palays faict quasi à la mode d'vn petit Chasteau, le coustau desquelles montaignes descendoit vers la plaine en diminuant de degré en degré, comme nous voyons venir és Theatres du haut d'iceux, les degrez iusques au plus bas succeffiuent par ordre tousiours en estroicissant leur cercle : & estoient ces coustaux, ceux que le Soleil de midy regardoit tout pleins de vignes, d'Oliuiers, d'Amandiers, de Cerifiers & de Figuiers, & de plusieurs autres manieres d'arbres portans fruit, sans qu'il y eust vn poulce de terre perdu, les autres montaignes que la Bise fraploit estoient toutes couuertes de petitiz bois, de cheneaux, de fresnes, & d'autres arbres verds & droictz, le plus qu'il estoit possible. La plaine apres sans y auoir autre entree que celle par où les Dames auoient passé, estoit pleine de Sapins, de Cypres, de Lauriers & de quelques Pins si bien mis en ordre comme si quelque grand ouurier en matiere de planter les eust plantez, & avec ce, peu ou point de Soleil, lors qu'il estoit haut, ne pouuoit entrer iusques au fons, lequel fons estoit vn pré d'herbe tresmenue & plein de petites fleurettes vermeilles, & plusieurs autres : & outre tout ce que dessus, ce qui donnoit non

moindre plaisir qu'autre chose, estoit vn petit ruisseau, lequel d'une des vallees qui deuisoit deux de celles petites montaignes, tomboit en bas à grandz faultz qu'il faisoit en descendant par vne veine de ladicte vallee qui estoit de roche viue : & en tombant faisoit vn bruit fort delectable à ouyr : & en ialissant sembloit de loing argent vif qui reiallist de quelque chose pressée ou espraincte, & ainsi comme il arriuoit au bas en la petite plaine, il estoit là recueilly en vn beau petit canal courant bien fort iusques au milieu de la plaine, où se faisoit vn petit lac comme vous voyez quelque fois en forme de viuier les Citoyens de nostre Cité, dedans leurs vergiers & iardins quand ilz ont la commodité. Ce petit lac n'estoit point plus profond qu'est la hauteur d'un homme iusques à l'estomach, & sans auoir en soy aucune mesure, monstroït que le fons estoit d'un grauier fort menu, lequel aucun qui par fortune n'eust eu autre chose à faire eust peu aysément conter & n'y voyoit pas seulement le fons de l'eau qui le vouloit regarder : mais aussi on y voyoit tant de poisson courir çà & là, qu'outre le plaisir c'estoit chose admirable, & n'estoit point fermé d'autre riue que du pré mesme, qui le rendoit d'autant plus beau à l'entour comme plus il se sentoït de l'humidité. Et l'eau qui surabondoit ce petit lac apres qu'il estoit plein, estoit receue par vn autre petit canal, par lequel en sortant hors de la petite vallee, elle s'en couroit aux

parties plus basses du lieu. Quand doncques les Dames furent arriuees en ce beau lieu, & qu'elles l'eurent regardé par tout & fort loué, elles se delibererent pour le grand chault qu'il faisoit, en voyant deuant elles le petit lac, ne soupçonnant aussi d'estre apperceues de se vouloir baigner. Parquoy apres auoir commandé à leur chambriere qu'elle s'allast tenir sur la voye par où lon entre en ceste vallee, & semblablement qu'elle regardast bien si quelqu'un viendroit pour les en aduertir, elles se despouillerent toutes sept, & entrerent dedans ce petit viuier qui cechoit leurs blancs corps, ne plus ne moins qu'un verre delié, cacheroit vne rose vermeille, lesquelles estans dedans & ne se troublant point l'eau pour tout cela, elles commencerent tant qu'elles peurent à courir çà & là apres les poissons pour en prendre avec les mains, lesquels auoient mal aysément où se cacher. Et apres qu'elles eurent demouré quelque peu en tel passetemps, & qu'elles en eurent prins quelques vns, elles fortirent d'iceluy & se reuestirent : puis sans pouoir louer le lieu plus qu'elles l'auoient desia loué (leur estant aduis qu'il estoit temps de s'en retourner au logis) elles se mirent en chemin au beau petit pas, ne parlans d'autre chose que de la beauté du lieu. Et estans arriuees de fort bonne heure au palays, elles trouuerent encores les trois ieunes hommes qui iouoyent là où elles les auoient laissez, ausquelz madame Pampinee

dist en riant. Nous vous auons aujourd'huy bien trompez. Comment dist Dioneo? commencez vous premierement à faire qu'à dire? Sire respondit madame Pampinee, ouy certes : & luy raconta tout au long dont elles venoient, & comment le lieu estoit faict : & combien il estoit loing de là, & ce qu'elles y auoient faict. Le Roy oyant conter la beauté du lieu eut fort grand desir de le voir, & fit soudainement commander qu'on seruist à soupper, lequel acheué avec grand plaisir & contentement de tous, les trois gentilzhommes avec leurs seruiteurs laisserent les Dames & s'en allerent en ceste vallée, où ayant tout considéré, & n'y ayant piece d'eux iamais esté que celle fois, ilz le louerent pour vne des plus belles choses du monde. Et apres qu'ilz se furent baignez & reuestuz, ilz s'en retournerent au logis, parce que la nuit approchoit, où ilz trouuerent les Dames, qui dançoient vne dance au chant de madame Flammette. Et apres qu'elle fut acheuee ilz entrerent en propos avec elles de la vallee des Dames, dont ilz dirent beaucoup de bien & de louange, au moyen dequoy le Roy faisant appeller le Maistre d'hostel luy commanda que le lendemain le disner y fust prest, & qu'on y portast quelque liët, si quelcun vouloit dormir ou se reposer sur le midy. Apres cecy ayant faict apporter de la clarté, du vin & des confitures, & qu'ilz eurent faict vn peu de collation, il commanda que chacun se mist à

dancer. Et ayant Pamphile pris par son commandement vne dance, le Roy se retourna vers madame Elisse, & luy dist gracieusement : Ma belle Dame vous m'auez faict aujourd'huy l'honneur de me donner la couronne, & ie le vous veux faire ce soir de la chanson, & par ainsi dictes en vne telle qu'il vous plaira. A qui madame Elisse en souzriant respondit que volontiers, & avec vne douce voix commença ainsi.

Amour si tes griffes i'eschappe,
Croire ne puis
Que iamais autre croc me happe.

I'entray ieunette en tes combats,
Pensant que ce ne fust que paix,
Et mis toutes mes armes bas
Comme aux asseurez faire fais :
Mais toy tyran aspre & mauuais
Me vint depuis
Combattre & iecter souz ta trappe.

Puis moy ainsi prise en tes lacs,
Tu me mis és mains (par malheur)
De celuy qui nasquit helas
Pour ma mort pleine de douleur,
Auquel a si peu de douceur
Qu'ouye ne fuis
Par plaints & souspirs que ie trappe.


Au vent va ce que prie & pleure,
Nul ne m'oyt, nul ne veut m'ouyr :
Dont mon tourment croist à toute heure
De viure sans pouuoir mourir,

Fais donc pour m'oster tel languir
Ce que ne puis:
Rends le moy pris à ton estappe.


Sinon aumoins vueille moy traire
Des liens nouez d'esperance,
Je te prie Seigneur de le faire,
Et lors auray-ie confiance
D'estre encor' belle à mon vſance,
Et dueil remis
Je prendray blanche & rouge cappe.

Après que ma-dame Elisse eut faict fin à sa chanſon avec vn ſouſpir fort piteux, encores que tous s'eſmerueillaffent de telles parolles, ſi n'y eut-il celui pourtant qui ſe peult aduiſer quelle occaſion elle pouuoit auoir de chanter ainſi. Alors le Roy qui eſtoit en ſes gogues fit appeller Tindaro, & luy commanda qu'il tiraſt ſa cornemuſe, au ſon de laquelle il fit dancer pluſieurs dances, puis eſtant deſia vne bonne partie de la nuit paſſee, il dict à chacun qu'ilz ſ'allaffent coucher.





SEPTIESME IOVRNÉE.



SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE

SEPTIEME TOURNÉE



SEPTIESME IOVRNÉE.

La septieme iournee du Decameron, en laquelle on deuise foubz le gouuernement de Dioneo, des tromperies que les femmes ont fait à leurs maris, soit par amour, ou pour euitier quelque mal ou scandale, soit qu'ilz s'en soient apperceuz ou non.

TOUTES les Estoiles n'apparoissoient plus du costé du Soleil leuant, fors celle-là que nous appellons l'Estoille du iour, qui luysoit encores parmy la blancheur de la poincte d'iceluy, quand le Maistre d'hostel s'estant leué s'en alla avec tout le bagage en la vallee des Dames, pour y apprestier tout ce qui estoit necessaire selon le commandement que luy auoit faict son Seigneur. Apres lequel partement le Roy ne tarda gueres à se leuer pour le bruit du cariage qui l'auoit esueillé, & quand il fut leué, fit semblablement leuer les Dames & les autres deux gentilzhommes,

& se mirent tous en chemin, ainsi que le Soleil ne faisoit que se leuer, durant lequel chemin il leur sembla n'auoir encor si gayement ouy desgoiser les Rossignolz & autres oyseaux comme ilz firent ceste matinee là, de tous lesquels accompagnez ilz s'en allerent iusques en la vallee des Dames, où il leur sembla qu'ilz furent mieux receuz de plusieurs d'iceux Rossignolz qu'eux-mesmes ne se resiouissoient d'y estre venuz. Et là ilz enuironnerent toute la dicte vallee, & de rechef recommencerent à la regarder d'un bout à l'autre, laquelle leur sembla d'autant plus belle qu'elle n'auoit faict le iour precedent, comme l'heure de ce iour estoit lors plus conforme à la beauté d'icelle, & apres qu'ilz eurent rompu leur ieusne avecques vins excellens & quelques confitures de massépains: ilz commencerent à chanter, afin que les oyseaux ne les surpassassent en cela, respondant tousiours la vallee avec eux les mesmes notes: mais apres qu'il fut heure de disner, & que les tables furent dressees souz les beaux arbres prochains du petit lac, & qu'on eut couuert, chacun se fait comme il pleut au Roy, voyans pendant qu'ilz disnoient, les poissons nager par le lac à grandes troupes, ce qui leur donnoit quelquefois autant d'occasion de deuiser comme de regarder. Mais apres qu'on eut acheué de disner, & que les tables furent leuees, eux encore plus ioyeux que deuant, recommencerent à chanter, & estans en plusieurs

lieux de la petite vallee, les lietz dressez tous enuironnez & fermez par l'aduis du maistre d'hostel de ces farges qu'on apporte de France, & enuironnez & cloz de paillons, chacun qui voulut pouuoit avec la licence du Roy aller reposer, & qui ne le vouloit faire, il luy estoit permis de prendre ses autres plaisirs accoustumez à son gré. Mais estant desia venue l'heure qu'ilz se furent tous leuez, & qu'il estoit temps de se remettre à deuiser & faire des contes, chacun se fait comme le Roy voulut ordonner, sur les tapis qu'on auoit faict estendre sur l'herbe, tout aupres du lieu où ils auoient disné. Et apres le Roy commanda à madame Emilie qu'elle commençast. Elle le fit franchement en fourziant, & dict ainsi.





NOUVELLE PREMIERE

Reprenant la simplicité d'aucuns maris, & montrant la ruse que peuuent auoir quelques femmes.

Iean le Lorrain ouyt de nuict heurter à son huys, parquoy il esueilla sa femme, elle luy faisant accroire que c'estoit vn esprit, ilz s'en allerent tous deux le coniurer avec vne oraison, depuis n'ouyrent heurter.



SIRE, ce m'eust esté chose trefaggreable que quelque autre que moy eust donné, s'il vous eust pleu, commencement à vne si belle matiere comme est celle dont nous deuons parler. Mais puis qu'il vous plaist que i'asseure toutes les autres, ie le feray volontiers & me parforceray (mes cheres Dames) de dire choses qui vous puisse estre vtile à l'aduenir : parce que si les autres femmes sont aussi paou-

reuses comme moy, & mesmement de ces espritz, desquelles toutes nous autres generallyment auons paour (combien que ie ne sçay sur mon Dieu que c'est, & si ne trouuay encor iamais personne qui le sceust) vous pourrez en notant bien ma nouuelle apprendre vne saincte & bonne oraison, qui sert à les chasser & faire fuir : quand il vous en viendrait quelcun.

Il y eut iadis à Florence en la rue sainte Brancasse, vn cardeur de laine, nommé Iean le Lorrain, homme plus heureux en son art que sage en autres choses : parce que tenant luy, quelque peu du simple, il estoit souuentes fois fait Capitaine de ceux de son mestier, au quartier de sainte Marie nouuelle, & les receuoit en sa maison quand ilz faisoient leurs assemblees : outre ce il auoit plusieurs fois d'autres telz petitz offices, dont il s'estimoit bien estre quelque chose plus que les autres, & cecy luy aduenoit, parce qu'il donnoit souuentesfois (comme homme ayse qu'il estoit) de bons repas aux beaux peres de sainte Marie nouuelle, lesquels pource aussi que l'un en tiroit vne paire de chausses, l'autre vn habit, & l'autre vn capuchon, luy enseignoient souuent tout plein de bonnes oraisons, & luy donnoient la paternostre en vulgaire, & la chanson de saint Alexis, les lamentations saint Bernard, l'hymne de madame Matilde, & plusieurs autres semblables choses, lesquelles il tenoit chèrement & les gardoit toutes soigneusement, pour le

salut de son ame. Cestuy-cy auoit vne femme trefbelle & desirable, qui se nommoit dame Tesse, fille de Manucio de la Cucullia, sage & fort bien aduisee, laquelle cognoissant la simplicité de son mary, & estant amoureuse de Federic de Neri, Pegolotti (qui estoit beau ieune homme & fraiz) & luy d'elle, donna ordre par le moyen d'une sienne chambriere, que Federic la viendroit voir en vn fort beau lieu, que son mary auoit pres Florence, nommé Camerata, où elle se tenoit tout l'Esté, & Iean y venoit quelque fois souper & coucher: puis s'en retournoit le lendemain à sa boutique, & quelquefois y demouroit avec ses compaignons. Federic qui desiroit grandement ceste rencontre, ayant eu assignation de la Dame, y alla vn soir, & n'y venant point le mary pour celle nuit il soupa à son ayse avec la Dame, & coucha en grand plaisir avec elle, qui luy apprint pendant qu'il la tenoit toute nuit entre ses bras demie douzaine des oraisons de son mary. Mais ne faisant elle son conte, ne Federic pareillement que ceste fois là deust estre la derniere (comme elle auoit esté la premiere) ilz prindrent vne ordre & vne conclusion ensemble en la maniere que vous orrez: afin qu'il ne fallust que la chambriere l'allast querir à chacune fois. C'est que ledict Federic prendroit garde tous les iours qu'il yroit ou reuiendroit d'un sien lieu, qui estoit vn peu plus hault que celui de la Dame, à vne vigne qui

estoit ioignant la maison d'elle : & quand il verroit le tais d'une teste d'Asne à la poincte d'un des eschallatz de la vigne, ayant le museau tourné vers Florence, qu'il vint assurement : & que pour certain il coucheroit ce soir avec elle : & s'il ne trouuoit l'huys ouuert, qu'il heurtaist tout bellement trois fois, & elle luy ouuriroit : mais s'il veoit le museau du tais tourné à l'opposite vers Fiesole, qu'il n'y vint point, parce que ce seroit signe que Iean y feroit. Et faisant en ceste maniere, ilz coucherent plusieurs fois ensemble, mais vne fois entre les autres, que Federic auoit assignation de souper avec madame Tesse, qui auoit tresbien faict cuire deux gros chapons, il aduint que Iean qui ne deuoit point venir, y vint fort tard, dont elle fut fort marrie, & souperent luy & elle ensemble d'un peu de lard qu'elle auoit fait bouillir à part. Et ce pendant elle fit porter par sa chambriere en vne seruiette blanche, les deux chapons bouillis, & beaucoup d'œufz frais, & vn flacon de bon vin, en vn sien iardin, où lon pouuoit aller sans passer par la maison, & où elle auoit quelque fois accoustumé de souper avec Federic, & dist à sa chambriere qu'elle mist tout cela au pied d'un pescher qui estoit aupres d'un preau : mais elle estoit si courroucée de ce que son mary estoit venu, qu'elle oublia de luy dire qu'elle attendist iusques à ce que Federic viendrait, afin de luy dire que Iean estoit venu, & qu'il prist au


iardin tout ce que dessus. Parquoy s'en estans allez elle & Iean coucher, & pareillement la chambriere, Federic ne tarda gueres qu'il ne vinst, & heurta tout bellement vne fois à l'huys, qui estoit si prochain de la chambre, que Iean l'ouyt incontinent, & la femme aussi : mais à celle fin que Iean n'eut point de soupçon d'elle, elle fit semblant de dormir, & seiournant vn peu Federic il heurta la seconde fois, dequoy s'esmerueillant fort Iean, il poussa vn peu sa femme, & luy dist : Tesse, oys-tu ce que i'oy ? il semble qu'on heurte à nostre huys. Heurter (dist sa femme) nostre-dame Iean mon amy, ne sçais-tu pas que c'est vn esprit, dont i'ay eu ces nuictz passees la plus grande peur qu'on eust iamais : voire telle qu'aussi tost que ie l'oyoye, ie mettoye la teste souz la couverture, ne iamais ie n'auoye la hardiesse de la tirer dehors s'il n'estoit iour tout clair. Va, va, ma femme (dist Iean) n'ayes point de peur, si ce en est vn : car quand nous nous sommes mis au liêt, i'ay dict le *Te lucis & Intemerata*, & tant d'autres bonnes oraisons, & outre ce, i'ay semblablement faict le signe de la Croix à tous les coings du liêt, au nom du Pere, du Filz, & du Saint-Esprit, tellement qu'il ne fault point auoir de peur quelque puissance qu'il ayt, qu'il nous puisse nuire. La femme afin que Federic ne prinst parauenture quelque autre soupçon, & ne se courrouçast contre elle delibera en effect de se leuer, & le luy faire entendre que Iean y

estoit, & dist ainsi à son mary : Vrayement tu en és bien à tout tes parolles : quant est de moy ie ne me tiendray iamais fermement asseuree, si nous ne le coniuurons puis que tu és ceans. Iean dist : Et comment se coniure-il ? Dist la femme, ie le sçay tresbien coniurer : car l'autre iour quand i'allay gaigner les pardons à Fiesolle, vne de ces recluses, qui est (mon amy Iean) la plus saincte chose (& i'en appelle Dieu à tesmoing) me voyant ainsi paoureuse des espritz, m'enseigna vne bonne & saincte oraison : & dist qu'elle l'auoit esprouuee plusieurs fois auant qu'elle fust recluse, dont tousiours elle s'en est bien trouuee : mais Dieu sçache si iamais i'eusse eu la hardiesse de l'aller esprouuer seule, toutesfois maintenant que tu és ceans, ie veux que nous l'allions coniurer. Iean dist qu'il en estoit content : & s'estans leuez, s'en vindrent tout bellement à l'huys, auquel estoit encores dehors Federic, qui desia soupçonnoit en attendant. Et quand ilz furent arriuez à l'huys la femme dist à Iean : Tu cracheras maintenant quand ie te diray. Bien, dist Iean : & la femme commença son oraison, & dist : Esprit, esprit, qui vas ainsi de nuict, tu és icy venu la queue droite, & avec la queue droite t'en retourneras, va t'en au iardin, au pied du gros pescher, tu trouueras deux gras chapons, & cent œufz de ma geline, metz le nez au flacon, & t'en va sans faire mal, n'a moy, n'a Iean mon mary. Et cecy dict, elle

dist à son mary : Crache Iean, & Iean cracha. Et Federic qui estoit dehors, & oyoit cecy, estant desia fort de ialousie, auoit avec toute sa melancolie si grande volonté de rire, qu'il creuoit, & disoit tout bellement, quand Iean crachoit : Les dents puisses tu cracher. La femme apres qu'elle eut ainsi coniuré trois fois l'esprit, s'en retourna au liēt avec son mary. Federic qui s'attendoit de souper avec elle, & n'ayant encor soupé, & ayant bien entendu les parolles de l'oraïson, s'en alla au iardin, & quand il eut trouué au pied du pescher les deux chappons, le vin, & les œufz, il les emporta chez soy, & soupa à son bel ayse. Et plusieurs fois apres se retournant avecque s'amy, ilz rirent bien fort ensemble de cest enchantement. Il est bien vray qu'aucuns dient que la Dame auoit bien tourné le museau du test de l'Asne vers Fiezole : mais vn payſan en passant par la vigne l'auoit heurté d'un baston, & l'auoit faict tourner plusieurs tours, & à la fin il estoit demouré tourné vers Florence : & par ainsi Federic cuydant estre appellé, estoit venu. Aussi dit lon que la Dame auoit faict l'oraïson en ceste maniere : Esprit, esprit, va t'en en la bonne heure, car ce n'est pas moy qui ay tourné la teste de l'Asne, ains a esté quelque autre, que Dieu le mette en mal-an, & ie suis icy avec Iean mon mary. Parquoy il s'en alla sans coucher, & sans souper : mais vne mienne voisine qui est femme fort vieille, me dist que

l'une & l'autre furent veritables, selon qu'elle auoit ouy dire quand elle estoit petite fille, mais que le dernier n'estoit pas aduenu à Iean le Lorrain, ains à vn qui se nomma Iean de Nelle, qui demouroit à la porte Saint-Pierre, non moins suffisant laueur de poix, qu'estoit Iean le Lorrain, & par ainsi mes cheres Dames, il est à vostre choix de prendre celle des deux oraisons qui plus vous plaira : & toutes deux si voulez : car elles ont tresgrande vertu à semblables choses, comme vous auez ouy par experience. Apprenez les doncques parce qu'elles vous pourront parauenture seruir quelque fois.





NOUVELLE DEUXIESME.

*Qui monstre quelles deffaiçtes peuuent auoir ceux
qui sont surprins en amours, selon qu'eux &
les surpreneurs sont aduisez.*

*Peronnelle cacha vn sien amy par amour, en vn
grand vaisseau de terre, & voyant retourner
son mary au logis, qui disoit l'auoir vendu,
elle luy dist qu'elle l'auoit aussi vendu à vn
homme qui estoit dedans pour voir s'il estoit
entier; par quoy apres qu'il en fut forty, ilz le
firent racler au mary, & puis l'amy l'emporta
en sa maison.*



A nouuelle de madame Emilie fut
escoutee avec tresgrande risee, &
l'oraïson fut louee de tous pour
bonne & saincte, laquelle estant
acheuee, le Roy commanda à Phi-
lostrate qu'il fuyuist, lequel commença ainsi :
Mes trescheres Dames, les tromperies que les
hommes vous font, & mesmement les marys,

font si grandes, que quand il aduient aucunes-fois que quelqu'une en faict aucunes à son mary, vous ne deuriez pas seulement estre contentes que cela fust aduenu, ou de le sçauoir par apres, ou bien l'ouyr dire à quelqu'un, mais vous le deuriez aller publier par tout, afin que les hommes congneussent que s'ilz ont de l'entendement, que les femmes en ont aussi comme eux : ce qui ne vous peut tourner sinon à profit, parce que quand quelqu'un sçait qu'un autre sçait comme luy, il n'entreprend pas si legerement de le tromper. Qui doute doncques que si ce que nous dirons aujourd'huy sur ceste matiere estoit par cy apres sceu par les hommes, ce ne leur fust tresgrande occasion de se chastier de vous tromper si outrageusement, congnoissans que vous sçauriez aussi bien tromper comme eux, si vous vouliez? Mon intention est doncques de vous dire ce qu'une ieune femme (combien qu'elle fust de fort basse condition) fit à son mary quasi en vn moment pour se sauuer.

Il n'y a pas encor long temps qu'à Naples vn pauvre homme print à femme vne belle & ieune fille, nommee Peronnelle, lesquelz en gaignant escharcement leur vie, luy avec son mestier de maçon, & elle filant sa quenouille, s'entretenoient le mieux qu'ilz pouuoient. Or aduint qu'un ieune homme, voyant vn iour ceste Peronnelle, & luy plaissant fort, il en deuint amoureux, & la sollicita tant, en vne

façon, ou en autre, qu'il s'appriuoisa d'elle, & pour pouuoir estre ensemble, ilz prindrent entr'eux cest ordre, sçauoir est que se leuant le mary d'elle tous les matins de bonne heure pour aller trauailler, ou pour trouuer de la besongne, il falloit que le ieune homme fust en quelque lieu qu'il le veist sortir dehors, & que aussi tost qu'il seroit sorti, qu'il entraist en la maison, qui estoit en vne rue fort solitaire, nommee Auorio. Et ainsi le firent plusieurs fois : mais il aduint vn matin entre les autres, qu'apres que le bon homme fut sorti dehors, & l'amy qui se nommoit Jeannet Striguario, entré dedans sa maison, se iouant avec Peronnelle, peu de temps apres le mary qui n'auoit accoustumé de retourner de tout le iour, s'en retourna à la maison, & trouuant l'huys fermé subitement heurta, & apres auoir heurté, il commença à dire en soy-mesmes : Mon Dieu ie te remercie, car encor que tu m'ayes faict pauvre aumoins tu m'as faict ceste grace d'auoir rencontré vne bonne & honneste ieune fille pour femme, voyez comme elle a tost fermé son huis quand ie suis sorti, à fin que personne n'y peust entrer, qui luy fist facherie. Peronnelle ayant ouy son mary, qu'elle cogneut à sa façon de heurter dist : Helas mon amy Jehannet, ie suis morte : car voicy mon mari que Dieu maudie, de ce qu'il est retourné, & ne say que cecy veut dire : car ne reuient iamais à telle heure que maintenant, parauenture qu'il vous a veu quand

vous estes entré, mais pour l'amour de Dieu (comment qu'il en doive aller) entrez en ce grand vaisseau de terre que vous voyez là, & ie luy iray ouvrir, & verrons ce qu'il voudra dire d'estre si tost reueu ce matin au logis. Jehannet entra soudainement dedans le tonneau, & Peronnelle courant à l'huis alla ouvrir à son mary, auquel avec vn mauuais visage elle dist : Que veut dire cecy que tu retournes si tost ce matin à la maison ? à ce qu'il me semble, tu ne veux faire rien d'aujourd'huy : puis que ie te voy retourner avec tes outils en la main, & si tu veux faire ainsi, dequoy viurons nous ? dequoy aurons-nous du pain ? penfes tu que ie souffre que tu m'engaiges ma cotte & mes autres pauvres habillemens ? moy qui ne fay iour & nuict que filler, tant que la chair m'est toute tombee des ongles, pour auoir seulement autant d'huile qu'il faut pour faire luire nostre croiset ? mary, mary, il n'y a voisine icy à l'entour qui ne se moque de moy, & qui ne s'esbahisse de tant de peine comme est celle que i'endure, & tu t'en reuiens à la maison avec les mains pendantes, là où tu deurois estre à la besongne : & cecy dit commença à plourer, & à dire de rechef : Helas pauvre & malheureuse que ie suis, en malheure nâquis ie bien, & en malaventure ie vins ceans, où i'eusse peu auoir vn ieune homme tant honneste garçon, & ie ne le vouluz point pour prendre cestuy-cy, qui ne pense point qu'elle

femme il a espousee : les autres se donnent du bon temps avec leurs amis par amours, & n'y en a pas vne qui n'en ait, l'une deux, & l'autre trois, & triomphent & monstrent à leurs maris la Lune au lieu du Soleil, & moy miserable pource que ie suis bonne, & qui ne pense point à telles follies, ie souffre mal, & malaventure. Je ne sçay pourquoy ie ne prens de ces amoureux comme font les autres. Je vueil bien que tu l'entendes a bon escient mon mari, que si ie vouloye faire mal, ie trouueroye bien avec qui : car il en est de bien gorriers qui m'ayment & promettent amitié, & m'ont enuoyé dire & offrir beaucoup d'argent, & des habillemens ou des bagues si i'en vueil : mais mon cœur ne le peut souffrir, parce que ie ne suis point fille d'une femme qui ait fait tel mestier, & maintenant tu t'en retournes quand tu deurois estre à trauailler. A qui le mary dist : Pour Dieu ma femme ne te melancolie point tu dois croire que ie congnoy bien qui tu es, & outre ce ie m'en suis encor mieux apperceu ce matin, il est vray que ie suis parti de bonne heure pour aller trauailler, & il appert bien que tu ne sçais pas (comme ie ne sçauoye moymesmes) qu'il est aujourd'hui la feste de sainct Galleri qui est chomable, parquoy ie m'en suis retourné à ceste heure à la maison : mais neantmoins i'ay donné ordre, & trouué moyen que nous aurons du pain pour plus d'un mois : car i'ay vendu à ceste homme de bien que tu vois icy

avec moy, nostre grand vaisseau de terre, qui nous a defia tant de temps (comme tu fais) tenu la maison empeschée, & m'en donne huit fols. Alors Peronnelle dist : Tu me fais encor plus enrager toy qui es homme & vas deçà & delà, & qui deurois savoir que c'est que du monde n'as vendu ce tonneau que huit fols, lequel moy qui ne suis qu'une pauvre femme n'ayant esté quasi iamais hors de l'huis, voyant l'empeschement qu'il nous faisoit en la maison l'ay bien vendu dix à un homme de bien, lequel ainsi que tu retournois est entré ceans pour voir s'il est entier. Quand le mary ouy cecy, il fut plus que content, & dist à celui qui estoit venu pour l'avoir : Bon homme va t'en donc en la bonne heure, tu vois que ma femme l'a vendu à un autre dix, où tu ne m'en voulois bailler que huit. Le bon homme dit, en la bonne heure & s'en va. Lors Peronnelle dist à son mari : Vien t'en ça haut, puisque tu es ceans, & faites vostre marché ensemble. Jehannet qui avoit les oreilles ouvertes pour ouyr si en aucune chose il a besoin de craindre ou de se pourvoir, ayant ouy les parolles de Peronnelle se ietta soudainement hors du tonneau & quasi comme s'il n'eust rien entendu du retour du mary, commença à dire : Où est tu bonne femme ? Auquel le mary (qui defia venoit) dist, me voicy, que demandes tu ? Jehannet luy dist. Qui es tu ? Je demandoye la femme avec qui j'ay fait le marché de ce ton-

neau : Dist le bon homme : Frere mon amy, marchande assurement avec moy, car ie suis son mary. Lors Iehannet dist : Le vaisseau me semble bon & entier, mais vous diriez que vous avez tenu de l'ordure dedans, il est tout barbouillé de ie ne say quelle chose si seiche, que ie ne le puis oster avec les ongles, & parainfi ie ne le voudroye point prendre si premiere-ment ie ne le voyoye net. A cela ne tiendra (dit Peronnelle) que le marché ne soit fait. Mon mary le nettoiera tout. Ouy dea dist le mary. Et ayant posé à terre ses oustils, & s'estant despouillé en chemise, il se fit allumer vne chandelle, & bailler vne ratissoire, puis quand il fut dedans il commença à racler, & Peronnelle (comme si quasi elle eust voulu voir ce qu'il faisoit) ayant mis la teste par la gueulle du tonneau qui n'estoit gueres grande, d'auantage l'un des bras avec toute l'espaule, commença à dire, racle bien icy, & icy & encores là, voys tu bien qu'il en est encores demouré icy vn morceau? Et ce pendant qu'elle estoit en ceste maniere, & qu'elle enseignoit, & monstroït à son mary de fourbir & faire net le vaisseau, Iehannet, lequel n'auoit entierement accomply son desir celle matinee quand le mary reuint, & voyant qu'il ne le pouuoit faire comme il le desiroit, s'opiniastra de l'acheuer comme il pourroit : parquoy s'estant aproché d'elle qui tenoit la gueulle du tonneau toute bouchée il executa son desir plein de ieunesse

en la maniere des cheuaux fauuges eschauffez en amours faillent par les grandes campagnes les iuments de Parthe, lequel desir print fin au mesme instant, quasi que le vaisseau fut raclé, luy descouplé, elle la teste sortie du vaisseau, & le mary forty dehors. Au moyen dequoy Peronnelle dist à Iehannet : Tien bon homme ceste chandelle, & regarde s'il est net à ton gré, Iehannet ayant regardé dedans, dist qu'il estoit bien, & se tenoit content, & luy ayant baillé dix fols, le fit porter en son logis.





NOUVELLE TROISIÈME.

*Pour aduertir qui a femme, de ne laisser hanter
chez luy prestres ne moynes, quelques comperes
qu'ilz soient & pour cause.*

*Frere Regnaut estant couché avec sa commere,
y fut trouué par le mary d'elle : auquel ilz
firent accroire qu'il enchantoit les vers à son
fillot.*



HILOSTRATE ne sceut parler si
couuertement des iumens de Par-
the, que les Dames (qui estoient
toutes de bon entendement) n'en
rissent faisant toutesfois semblant
de rire d'autre chose. Mais apres que le Roy
cogneut que la nouuelle estoit acheuee, il
commanda à Ma-dame Elisse qu'elle dist la
sienne, laquelle deliberee d'obeyr commença
ainsi : Plaifantes Dames, l'enchantement de
l'esprit de ma-dame Emilie m'a remis en me-

moire vne nouvelle d'un autre enchantement, lequel combien qui ne soit aussi beau comme fut cestui-là, ie le conteray toutesfois presentement, par ce que ie n'en say point d'autre qui vienne à nostre propos.

Vous devez sçavoir qu'il y eut à Siene un ieune homme de fort bonne grace, & d'honneste maison qui se nommoit Regnaut, lequel aymant grandement vne sienne voyfine, fort belle femme, mariee à un riche homme, & esperant que s'il auoit moyen de parler à elle sans soupçon, qu'il en auroit tout ce qu'il desireroit, toutesfois ne s'en voyant aucun, & estant la femme enceinte il delibera de vouloir estre son compere. Parquoy s'estant accointé du mary, il le luy dist par le plus honneste moyen, dont il se sceut auiser, & ainsi fut fait. Estant donques Regnaut deuenu compere de ma-dame Agnes & ayant quelque permission plus coulouree de pouoir parler à elle s'estant asseuré par ce moyen il luy fait entendre de bouche, ce que long temps au parauant elle auoit cogneu de son intention par les gestes de ses yeux, mais cela luy seruit de peu combien qu'il ne despleust aucunement à la dame de l'auoir escouté. Or aduint peu de temps apres (qui qu'en fut l'occasion) Regnaut se rendit religieux, & bonne ou mauuaise qu'il eust trouué la pasture de la religion, il perseuera en icelle, & combien que durant quelque temps apres qu'il se rendit religieux, il eust

abandonné l'amitié qu'il fouloit porter à sa commere & certaines autres fiennes vanitez, toutesfois par succeſſion de temps il les reprint, ſans pour tout cela laiſſer l'habit, & commença à prendre plaifir de ſe montrer, & veſtir de bons habillemens & d'eſtre en toutes ces choſes mignon & propre & à compoſer chanſons, ſonnetz, ballades & à chanter avec tout plain d'autres choſes ſemblables, mais qu'eſt-ce que ie dy de noſtre frere Regnaut de qui nous parlons? Qui ſont les autres qui ne ſont auſſi comme luy? Helas (vituperé de ce pauvre monde perdu) ilz n'ont point de honte d'eſtre gras de apparoir vermeils & coulourez au viſage, de monſtrer qu'ilz ſont delicats & pleins de douceur & humilité en habillemens & en toutes leurs choſes, & marchent non pas comme columbes : mais la creſte leuee comme cocqs qui s'enflent le iabot, & qui pis eſt, laiſſans à part qu'ils ont leurs chambres fournies de petites boites pleines de conſerues, de parfuns excellens, & d'autres pleines de diuerſes compositions avec des ſiolles d'eaux & huilles artificiels, enſembles des barrillets de maluoifie & de vin Grec, & autres vins treſprecieux, tellement qu'elles ne reſemblent pas (à ceux qui les voient) chambres de religieux, ains pluſtoſt boutiques d'eſpiciers ou de parfumeurs, ilz n'ont point de honte que chacun ſçache qu'ilz ſont gouteux & pensent qu'on ne cognoiſſe pas, que force ieufnes, groſſes viandes, & peu, &

viure sobrement, font deuenir les personnes maigres deliez & plus sains, & si toutesfois quelqu'vns en sont malades, au moins n'est-ce pas de gouttes, ausquelles on a accoustumé d'ordonner pour medecine la chasteté, & toute autre chose appartenante à la vie d'un religieux modeste. Ilz cuident aussi que personne ne congnoisse que outre le peu manger, les longues vieilles, le prier & discipliner, ne doyue rendre les hommes pâles & affligez, & qu'on ne sçache bien que saint Dominique & saint François se sont bien vestuz sans auoir trois habits pour vn, non pas taincts en laine, ne d'autres fins draps excellens : mais fait de grosse laine & de couleur naturelle pour chasser le froit seulement, & non pas pour apparoirre, ausquelles choses nostre Seigneur vueille pouruoir comme il est besoin pour les ames des gens simples qui les nourrissent. Ainsi doncques retournant frere Regnaut en ses premiers appetits, il commença à visiter sa commere fort souuent & luy estant cruëe la hardiesse : il commença avec plus grande instance qu'il n'auoit fait au commencement, à la solliciter de faire ce qu'il desiroit. La bonne dame se voyant ainsi fort pressée, & luy semblant frere Regnaut parauenture plus beau qu'il ne faisoit au parauant, estant vn iour fort importunée de luy, elle vfa des propres termes, qu'vsent toutes celles qui ont volonté de faire ce qu'on leur demande, & dist : Comment frere Regnaut, les

beaux peres font-ilz telles choses? A qui frere Regnaut respondit : Ma-dame, quand i'auray osté cest habit de dessus mon doz (qui m'est chose aysee à faire) ie vous ressembleray vn homme fait comme les autres, & non point religieux. La dame feit la petite bouche, comme si elle vouloit rire, & dist : He Dieu malheureuse que ie suis, vous estes mon compere, comment ce feroit cecy? Ce feroit vn trop grand mal, & ay plusieurs fois ouy dire que c'est trop grand peché, & pour certain si ce n'estoit cela ie feroye tout ce que vous voudriez. A qui frere Regnaut dist : Vous estes vne sotte, si vous laissez à le faire pour cela, ie ne dy pas que ce ne soit peché : mais nostre Seigneur en pardonne bien de plus grand à qui se repent. Mais dites moy, qui est le plus prochain parent de vostre filz ou moy qui l'ay tenu sur les fonts de baptesme, ou vostre mary qui l'ha engendré? La dame respondit que c'estoit son mary. Et vous dites vray dist le beaupere, & toutesfois vostre mary ne couche il pas avec vous? Ouy dist la Dame. Ainsi doncques moy qui ne suis pas de si pres à vostre filz comme est vostre mary, ie puis aussi bien coucher avecques vous comme il fait. La dame qui n'estoit point logicienne, & à qui il falloit peu de chose, pour la ietter hors des gonds, creut ou fit semblant de croire que le beaupere disoit verité, & respondit : Qui est-ce (compere) qui sçauroit respondre à voz sainctes

parolles? Et apres cela elle se condescendit (nonobstant le compere) à faire ses plaisirs : combien que ce ne fut pour vne fois seulement, mais soubz la couverture du comperage ayant plus de commodité pource que le soupçon en estoit moindre, se retrouuerent plusieurs & diuerses fois ensemble. Neantmoins il aduint vne fois entre les autres que estant frere Regnaut venu à la maison de sa commere, & voyant qu'il n'y auoit lors personne qu'une petite chambriere de la dame, fort belle & plaisante, il enuoya son compagnon avec elle au plancher des pigeons pour leur enseigner la patenostre, & luy & la dame qui tenoit son petit garçon par la main, entrerent en la chambre, ou s'estans enfermez, ilz commencerent à passer le temps sur vn petit liët sur lequel lon s'asseoit, & estans en ceste maniere, la fortune voulut que le mary retourna, qui sans estre ouy de personne fut incontinent à l'huis de la chambre, & heurta & appella sa femme. Laquelle oyant cecy dist : Helas ie suis morte, voicy mon mary : maintenant s'apperceura il de l'occasion de nostre accointance. Frere Regnaut estoit depouillé, c'est à dire en iacquette, sans son habit, & sans son capuchon, lequel oyant cecy, dist : Vous dites vray ma commere : Helas si ie estoie seulement vestu, nous trouuerions quelque excuse : mais si vous luy ouurez & il me trouue ainsi, nous n'en sçaurions point trouuer. La dame fut pourueüe soudainement


de ce qu'elle deuoit dire, & luy dist : Or vous vestez, & quand vous serez vestu prenez vostre filiol entre voz bras, & escoutez bien ce que ie diray, afin que voz parolles s'accordent apres avec les miennes, & laissez moy faire. Le bon homme de mary n'auoit quasi acheué de heurter que sa femme respondit, ie vay à vous moy amy, & s'estant leuee s'en alla avec vn bon visage, à l'huis de la chambre, qu'elle ouurit & dist : Mon mary ie vous vueil bien auertir que frere Regnaut nostre compere est icy venu, & Dieu l'a enuoyé ceans : car pour certain s'il ne fust venu, nous auions aujourd'huy perdu nostre petit filz. Quand le sot de mary ouit cecy, il s'esuanouit & dist : comment Helas? mon mari dist la dame, il luy est venu au commencement vn soudain esuanouissement, dont ie cuidoye qu'il fust mort, & ne sçauoye que me faire ne que me dire, sinon que frere Regnaut nostre compere est suruenue en cest instant & l'ayant pris entre ses bras m'a dit : Comere ce sont vers qu'il a au corps, qui s'aprochent du cœur & le tueroient tresbien, qui n'y remedieroit, mais n'ayez peur : car ie les enchanteray de sorte qu'ilz mourront tous, & auant que ie parte d'icy, vous verrez vostre enfant aussi sain que vous le vistes iamais. Et pource que vous faisiez icy besoin pour dire certaines oraisons, & que la chambriere ne vous a sceu trouuer, il les a fait dire à son compaignon, au plus haut lieu de sa maison, & luy & moy

sommes entrez ceans, parce que personne du monde fors la mere de l'enfant, ne peut estre present à vn tel mistere, si nous y sommes enfermez, afin que ame ne nous empeschast, encor l'a il entre ses bras, & pense qu'il n'attend autre chose, sinon que son compagnon ayt acheué de dire les oraisons, & lors tout sera fait, parce que l'enfant est desia tout reuenu en foy. Le cornu de mary, croyant ces choses-cy, en eut les yeux de l'entendement tellement bouschez, avecques l'affection qu'il auoit à l'enfant qu'il ne pensa point à la tromperie, que sa femme luy auoit faite : mais ayant ietté vn grand soupir dist : le le vueil aller veoir. N'y va point (dist la dame) car tu gasterois tout ce qui a esté fait, demeure vn peu ie vueil voir si tu y peux encores aller & puis ie t'appelleray. Frere Regnaut qui auoit tout ouy, & s'estoit reuestu à son bel ayse, auoit prins l'enfant entre ses bras, & quand il eut preparé les choses à son gré, il appella, Hau commere, n'ay-ie pas ouy le compere ? Le benest de mary respondit, Ouy monsieur. Alors dist frere Regnaut : Venez ça, lors le bon sot y alla : auquel le beau pere dist. Tenez vostre filz sain par la grace de Dieu, là où ie pensois tout à ceste heure, que vous ne le verriez vif à vespres. Vous donnerez ordre de faire mestre vne statue de cire de sa grandeur, à la louange de Dieu deuant l'image de monsieur sainct Ambrois par les merites duquel nostre


Seigneur vous en a fait ceste grace. L'enfant voyant son pere courut incontinent à luy, & luy fit feste comme font petits enfans. Lequel l'ayant prins entre ses bras, plorant ne plus ne moins que qui l'eust tiré de la fosse, commença à le baïser, & à rendre grace à son compere, qui luy auoit gueri. Le compagnon de frere Regnaut qui auoit enseigné, non seulement vne patenostre : mais paraduenture plus de quatre, à la chambriere & luy auoit donné vne petite bourslette de fil blanc que luy auoit donné vne nonnain, l'ayant fait sa deuote, estoit venu tout bellement, quand il ouyt appeller le mary, en la chambre de sa femme, à vn lieu par où il pouuoit entierement veoir & ouyr ce qu'on y faisoit, & voyant que tout estoit en bon termes, s'en vint en bas & quand il fut entré en la chambre il dist : Frere Regnaut, i'ay dit toute les quatre oraisons dont vous m'avez donné charge. A qui frere Regnaut dist : Mon frere mon amy tu as bonne alaine, & as bien fait, de moy quand mon compere est arriué ie n'en auoye encor dit que deux : mais nostre Seigneur tant pour ta peine que pour la mienne, nous a fait ceste grace, que l'enfant est guery. Le cocu de mary feit apporter du vin & du meilleur, avec force confitures, & traita le compere & son compagnon, de ce dont ilz auoient plus grand besoin que d'autre chose : puis les ayans conduits iusques hors sa maison, leur dist à Dieu, & sans aucune

intermiffion ayant fait faire l'image de cire
l'enuoya attacher avec les autres deuant la
figure de monfieur fainct Ambrois : mais non
pas celuy de Milan.





NOTES





NOTES

CINQVIESME IOVRNÉE.

NOUVELLE PREMIERE.

Boccace n'imite pas toujours nos anciens conteurs, et beaucoup de ses contes peuvent être comparés, non pas à ceux des trouvères et des troubadours, mais bien aux fictions d'auteurs anciens tels que Lucien et Petrone. Or parmi les contes de Boccace qu'on peut comparer aux contes de Lucien et de Petrone, on n'en rencontre point de meilleur ni de mieux écrit que l'histoire de Chymon. L'idée première semble sortie de la vingtième idylle de Théocrite ou de la dixième

lettre d'Eschine, où on lit que l'Athénien Chymon enleva Callirione, fille du fleuve Scamandre.

En 1499 Béroald publia cette nouvelle, traduite en latin. Elle a servi de thème à plusieurs pièces du théâtre italien, espagnol, anglais et allemand.

NOUVELLE DEUXIÈME.

1—84. — *Qu'il y a auprès de la Sicile une petite Isle qu'on appelle Lipare.* — La plus grande des îles de l'archipel Lipari, situé dans la mer Tyrrhénienne au nord de la Sicile. Elle a environ vingt-quatre kilomètres de circonférence. Lipari, la capitale, très puissante dans l'antiquité, fut tour à tour asservie par Denys-le-Tyran, par Carthage et par Rome. Prise en 1340 par Robert I^{er}, roi de Naples, puis détruite en 1544 par Barberousse (Kaïr-Eddyn), elle fut bientôt rebâtie.

2—85. — *Le menerent à Tunes.* — Tunes ou Tunesienne, aujourd'hui Tunis, célèbre dans l'antiquité par la bataille qu'y perdit Régulus contre Xantippe. L'importance de cette cité date de la destruction de Carthage. Les Normands, toujours hardis et entreprenants, voulurent y établir des comptoirs, mais Abd-el-Moumen les en chassa en 1159. A l'époque de Boccace, Tunes appartenait donc aux Arabes. Saint Louis prit cette ville comme but de la dernière croisade, et y mourut de la peste en 1270.

3—86. — *D'une ville appelee Suse.* — Sousse ou mieux Sousa, à cent dix kilomètres S. E. de Tunes.

4—87. — *Dist qu'elle estoit de Trapani.* — Ancienne Drepanum, en Sicile, à quatre-vingts kilomètres O. de Palerme. D'après la Fable, son nom lui vient de ce que Saturne, chassé du ciel, y laissa tomber sa faux, en grec

drepanon. Pendant la première guerre punique, ce fut, avec Lilybée, la dernière ville que Carthage garda en Sicile.

5—89. — *Roi de Tunes qui se nommoit Mariabdile*. — Ce Mariabdile est-il un souverain fictif ou véritable? Question difficile à résoudre, les documents faisant défaut sur les souverains résidant à Tunes. L'*Art de vérifier les dates*, lui-même, ne donne aucune indication à ce sujet.

NOUVELLE TROISIÈME.

1—97. — *Ursins*. — Les Ursins, ou Orsini, constituaient une famille très ancienne dans les États de l'Église et rivale des Colonna, tant par ses richesses que par ses influences politiques. Elle était guelfe, soutenait la cause des papes et l'indépendance italienne.

Le premier Orsino connu est Jordano Orsino, qui, après avoir rendu de grands services à la Cour de Rome, en qualité de général, fut fait cardinal en 1145 et envoyé près de l'empereur Conrad, comme légat, en 1152. L'année suivante, son neveu devint préfet de Rome, et, en 1277, sous le nom de Nicolas III, un Jean Gaëtan Orsino devint pape. Ce pontife, en répandant les bienfaits autour de lui, accrut la puissance de sa famille dans de grandes proportions. Lorsqu'il mourut, deux ans après son élection, des troubles éclatèrent dans Rome. Ses parents voulaient lui donner un successeur favorable à leur parti. Mais une faction, ayant à sa tête Charles d'Anjou, roi de Sicile, et Richard Annibaldi, s'éleva contre eux. Les débats ne durèrent pas moins de six mois. Les ennemis des Ursins l'emportèrent enfin, et firent élire un ancien chanoine et trésorier de l'église Saint-Martin de Tours, le cardinal français Simon, né à Mont-Pincé en Brie, et qui, en souvenir sans doute de son ancienne paroisse, prit le nom de Martin IV. Boccace fait probablement ici allusion à ces

troubles qui agitèrent Viterbe et Rome pendant la vacance du Saint-Siège.

NOVVELLE QVATRIESME.

1—107. — *La Romaine*. — La Romagne, ancienne province des États de l'Église, ayant Ravenne pour chef-lieu. En 1221, le comté de Romagne fut conféré à deux comtes de Hohenlohe par Frédéric II. En 1275, après la chute des Hohenstaufen, la maison de la Polenta s'appropriâ le domaine.

2—107. — *Messire Litio de Valbonne*. — Ce conte paraît être basé sur une anecdote racontée par un commentateur de Dante, Laudino. D'après son dire, en effet, un gentilhomme de la famille de Valbonne trouva une de ses filles couchée avec un amoureux, dont il fit son gendre avant de le laisser sortir de chez lui.

NOVVELLE CINQVIESME.

1—116. — *Ian*. — Jano, à 11 kilomètres S. E. de Pesaro.

2—116. — *Fayence*. — Il s'agit de Faenza, à 27 kilomètres S. O. de Ravenne et non de Fayence, à 19 kilomètres N. E. de Draguignan, et premier endroit de France où l'on ait fabriqué la faïence. Les Allemands la ravagèrent au XIII^e siècle. Boccace fait évidemment allusion à ces désordres.

NOVVELLE SIXIESME.

1—126. — *Vsquie*. — Aujourd'hui Ischia, à l'entrée du golfe de Naples, l'ancienne *Ænaria insula* sous laquelle la Fable nous montre Typhée enseveli après avoir été foudroyé.

2—126. — *Procida*. — Ile entre Ischia et le continent.

3—127. — *Federic de Sicile*. — Frédéric I^{er} d'Aragon, d'abord chargé du gouvernement de la Sicile par son frère Jacques, lorsque celui-ci, en 1291, alla prendre possession du royaume d'Aragon. Quand Jacques eut traité de la Sicile avec les Français, déjà maîtres de Naples, Frédéric refusa de la livrer, et les Siciliens le proclamèrent roi en 1296.

4—127. — *Depuis la Minerue iusqu'à la Scalee en Calabre*. — Depuis Minerbino, que l'on a cru longtemps être l'ancienne Cannes, jusqu'à Scalea, construite sur l'emplacement de la Talao des Sybarites.


5—131. — *Roger Doria*. — La famille des Doria remonte aux premiers temps de l'histoire de la république de Gênes. Quelques-uns de ses membres furent effectivement au service des rois de Sicile.

6—132. — *S'il n'estoit pas Jean de Procide*. — C'est le neveu de Jean de Procida qui en 1282 sonna les fameuses vèpres siciliennes. (Voir la note 2 de la novelle sixiesme, de la devxiesme iournée 1, tome I, page 299.)

NOVVELLE SEPTIESME.

1—146. — *La Iazze*. — Ancienne ville de l'Anatolie, sur les confins de la Syrie.







TABLE

QVATRIESME IOVRNÉE.

NOVVELLE SIXIESME.

Denotant les accidens de fortune & les puissances d'amour aussi. — Vne ieune fille nommee Andree ayment vn ieune homme nommé Gabriel, luy raconta vn songe qu'elle auoit fait, & luy vn autre à elle, & mourant soudainement Gabrielle entre ses bras, elle & sa chambriere furent prises ainsi qu'elles le portoient deuant sa maison par les ministres de la seigneurie, où elle dist comme le faict estoit allé, & voulant le Poteſtat la prendre à force, elle ne le voulut souffrir, dont son pere qui en ouyt les nouuelles, monstra son innocence, & la fit deliurer. Et elle refusant apres cela de plus viure au monde, se rendit religieuse I

NOVVELLE SEPTIESME.

Qui fait entendre qu'amour & mort vsent egaleement de leur force tant contre pauvres & roturiers que contre riches & no-

bles. — Simonne ayant Pasquin estant avecque luy en un iardin, aduint que Pasquin se frotta les dents d'une feuille de sauge : dont il mourut : icelle Simonne fut prise de la Iustice, & se frotta pareillement d'une de ces feuilles de sauge les dents dont semblablement elle mourut

14

NOUVELLE HVICTIESME.

Monstrant encores la sotise de qui pense esteindre l'amour de celuy qui ayme ardamment, avec les inestimables puissances d'amour. — Hierosme ayant une ieune fille nommee Siluestre s'en alla contrainct par les prieres de sa mere à Paris : retournant duquel il trouua s'amie mariee : en la maison de laquelle il entra secretement, & mourut aupres d'elle dedans le liect, puis estant porté en une eglise pour estre enterré, elle mourut semblablement sur luy.

22

NOUVELLE NEVFVIESME.

Pour signifier en quelle fin peuuent encourir ceux qui aymant contre raison, faisant tort à l'amitié & au mariage ensemble. — Messire Guillaume de Rossillon donne à manger à sa Femme le cœur de messire Guillaume Gardastain qu'il auoit tué & qu'elle aimoit. Ce qu'elle sachant par apres se ietta d'une haute fenestre en bas, & mourut, puis fut enterree avec son amy

32

NOUVELLE DIXIESME.

Comprenant qu'aucunes fois aduenture plustost que raison, iecte l'homme hors de diuers perilz, & principalement en cas d'amour. — La femme d'un Chirurgien mit pour mort en une huche un sien amy, qui auoit beu d'une eau qui faict endormir les gens, dedans laquelle huche deux larrons vsuriers l'emporterent en leur maison, puis se resueillant c'est amy, & estant prins pour larron, la chambriere de la Dame s'alla accuser à la iustice, de l'auoir mis en ceste huche & par ce

moyen il eschappa d'estre pendu, & les larrons pour l'auoir desrobé furent condamnez en amende pecuniaire . . . 38

CINQVIESME IOVRNÉE.

La cinquiesme Iournée du Decameron, en laquelle on deuise souz le gouuernement de ma-Dame Flammette de ce qu'est aduenu heureusement à quelque amoureux apres plusieurs grandes mal-aduentures . . . 61

NOVVELLE PREMIERE.

En laquelle est demonstté que souuentes fois l'amour faict l'homme sage & vaillant. — Chymon deuint sage par estre amoureux, & conquist par force s'amy Ephigene sur la mer, dont il fut mis en prison à Rhodes, & vn nommé Lysimaque l'en tira hors, avec lequel il print de rechef Ephigene & Cassandre au milieu de leurs nopces, & s'enfuyrent avec elles en Candie, dont apres les auoir espousees ilz furent rappelez en leurs maisons . . . 64

NOVVELLE DEUXIESME.

Pour denoter la fermeté d'un vray amour, & comment fortune abaisse quelque fois les hommes pour en fin les releuer à plus haut estat. — Constance ayment Martuccio Gomito, oyant qu'il estoit mort, se meit seule par desespoir en vne barque qui fut transportee du vent à Suse en Barbarie & de là s'en alla à Tunes, où elle le trouua encores viuant, auquel elle se descouurit, & luy estant en grande autorité du conseil priuè du Roy espousa ladite Constance, & s'en retourna riche avec elle en l'Isle de Lipare . . . 83

NOVVELLE TROISIESME.

Qui monstres encores les puissances de fortune & d'amour. — Pierre Boccamasse s'enfuyant avec vne fille qu'il aymoît,

nommee Angeline rencontra des brigans en chemin, dont la fille s'enfut par vne forest, d'où elle fut menee en vn chasteau & Pierre prins par les brigans, des mains desquelz il echappa depuis, & apres arriua par accident audit chasteau où estoit Angeline, qu'il espousa : & puis s'en retournerent ensemble à Rome 94

NOVVELLE QVATRIESME.

Signifiant la prudence d'aucuns qui cherchent à couvrir plus-tost vne honte qui leur est aduenue par autrui, qu'en le punissant la publier à chacun. — Richard Menard trouué par messire Licio de Valbonne couché avec sa fille, l'espousa & vesquirent depuis en bonne paix & amitié avec le pere d'elle 106

NOVVELLE CINQVIESME.

Par laquelle on peut voir les querelles qui procedent d'amour, & en partie, la sincerité d'un loyal amy. — Guy de Cremonne allant de vie à trespas, laissa à Iaquemin de Pauie vne sienne fille, laquelle Ieannot de Seuerin & Minguin de Mingale aymerent en la ville de Fayence, dont ilz s'entrebattirent depuis, estant recongneue pour soeur de Ieannot, elle fut donnee pour femme à Minguin. 115

NOVVELLE SIXIESME.

Comprenant qu'Amour peut mener l'homme en telz perilz, qu'à grande peine en peut-il eschapper. — Iean de Procide estant trouué avec vne ieune fille qu'il aymoît, laquelle auoit esté donnee au Roy Federic de Sicile, fut lié à vn poteau pour deuoir estre bruslé, dont toutesfois il echappa, estant recongneu par Rogier Dorie Admiral de Sicile & espousa ladicte fille. 125

NOVVELLE SEPTIESME.

Pour signifier les diuers trauaux & perilleux accidens causez

par ces deux tant puissans Seigneurs Amour & Fortune Tirans de la vie humaine. — Theodore deuenu amoureux de Violante fille de messire Emeri son maistre. l'engrossa dont il fut condamné à estre pendu & estranglé, & ainsi qu'on le menoit fouhaitant iusques au gibet, il fut recongneu par son pere, parquoy il fut deslié & espousa s'amy. . . . 135

NOUVELLE HVICTIESME.

Derotant qu'amour fait l'homme non seulement prodigue, mais encor ennemy de soymesme, & que souuentesfois l'aventure apporte tel effect que l'esprit humain ne pourroit faire le semblable. — Anastaise des honnestes en aymant vne fille des Trauersaires despendit grandement de son bien, sans toutesfois estre aymé, & à la priere de ses parens s'en alla d'un sien lieu aux champs, nommé Quassi : où il veit chasser par un cheualier, vne ieune fille qu'il tuoit : & puis la faisoit deuorer aux chiens. Si inuita ledit Anastaise ses parens, & ceux de celle qu'il aymoît, pour venir disner avec luy, auquelz il feit pareillement voir despecer ceste ieune fille parquoy craignant celle qu'il aymoît qu'un tel inconuenient luy aduint, elle print Anastaise pour mary. . . . 147

NOUVELLE NEVFVIESME.

Sous laquelle se demonstre la courtoisie d'un vray amant, & la magnanimité d'une vaillante Dame. — Federic des Albertgui, amoureux d'une femme de laquelle il n'estoit point aymé, despendit tout son bien en gentilleses & honnestetez, se consommant entierement : tellement qu'il ne luy demeura qu'un faucon : & n'ayant autre chose pour donner à disner à s'amy qui le vint veoir, il le feit rostir : dont elle sachant ceste honnesteté, changea d'opinion, & le print à mary, le faisant riche homme. . . . 157

NOUVELLE DIXIESME.

Reprenant la malice des femmes impudiques, & reprouuant la

Sodomie. — Pierre de Vinciolo estant allé souper vn iour hors de sa maison, sa femme fit venir vn ieune gars qu'elle aymoît, lequel fut trouué & surpris par le mary qui cogneut la tromperie de sa femme avec laquelle il demoura neantmoins d'accord, pour sa meschanceté & ordure . . . 168

SIXIESME IOVRNÉE.

La Sixiesme Journée du Decameron, en laquelle on deuise sous le gouuernement de ma-Dame Elisse, de ceux ou celles qui avec quelque plaissant mot (quand on les a voulu piquer) se sont reuenchez ou bien qui avec prompte responce, ou soudaine rencontre ont euité perte, danger ou moquerie . . . 189

NOVVELLE PREMIERE.

Reprenant la sottise d'aucuns, qui se mettent à raconter chose de laquelle ils ne peuuent venir à bout. — Vn Cheualier promet à madame Horette de la porter en croupe sur son cheual & de luy conter vne bonne nouuelle en chemin, mais voyant la Dame qu'il le disoit de mauuaise grace, elle le pria de la descendre à pied . . . 193

NOVVELLE DEUXIESME.

Qui demonstre qu'une requeste doit estre ciuile deuant qu'estre octroyee, à qui que soit. — Ciste boulenger avec vne parolle qu'il dist à messire Geri Spine, lui fit recognoistre vne inconsiderée demande qu'il auoit faicte audict Ciste . . . 197

NOVVELLE TROISIESME.

Pour monstrier que les mocqueurs à tort, sont souuent mocquez à droict. — Madame Nonne de Pulcy fit taire vn Euesque de Florencce avec vne prompte responce faicte à vne gaudisserie vn peu moins qu'honneste qu'il auoit dict à ladiete Dame. 203

NOVVELLE QVATRIESME.

Signifiant qu'une plaisante responce appaise souuentesfois le cœur d'un homme courroucé. — Quiquibio, cuisinier de messire Conrad Iean Filiassi par vne soudaine parolle qu'il dist à son maistre, conuertit son courroux en ris : & eschappa la punition dont messire Conrad l'auoit menacé . . . 207

NOVVELLE CINQVIESME.

Par laquelle on voit que qui veut parler d'autrui, doit premierement prendre garde à soy-mesme. — Messire Forest de Rabatte & Maistre Iotte Peintre venant ensemble de Mugel, se gaudirent l'un l'autre de leur laideur . . . 212

NOVVELLE SIXIESME.

Qui reprend couuertement ceux qui ne font cas que d'une noblesse de race. — Michel Escalse prouua à certains ieunes hommes qui firent vne gageure contre luy, que ceux de la lignee des Baronchi estoient les plus nobles du monde, ou de Maremmes, & en gaigna vn souper . . . 216

NOVVELLE SEPTIESME.

Là où est monstré que vaut vne verité franchement confessee, avec excuse facecieuse. — Ma-dame Philippe estant trouuee avec vn sien amy par son mary fut citee deuant le Iuge, dont elle se deliura avec vne prompte & plaisante responce & fit moderer le statut fait au parauant contre les femmes . . . 220

NOVVELLE HVICTIESME.

Pour se moquer de quelques mal-plaisantes laiderons, qui ne trouuent rien beau ne plaisant qu'elles mesmes. — Fresco conseilla à sa Niece que si ceux qui sont mal-plaisans à voir luy faschoient, comme elle disoit, que elle ne se mirast iamais . . . 225

NOVVELLE NEUVVIESME.

*Monstrant la difference des lettrez avec les ignorans. — Mef-
sire Guido Caualcant dist avec vn honnestes mot iuiure à
certains cheualiers Florentins qui l'auoient surprins . 228*

NOVVELLE DIXIESME.

*Pour monstrier de quelz abus on vse souuent sous le manteau
de religion. — Frere Oignon promet à certains payfans, de
leur monstrier la plume de l'ange Gabriel, au lieu de la-
quelle trouuant des charbons, il leur dist que c'estoit de ceux
dont saint Laurens fut rosti 232*

SEPTIESME IOVRNÉE.

*La septiesme Iournée du Decameron, en laquelle on deuise
soubz le gouuernement de Dioneo, des tromperies que
les femmes ont fait à leurs maris, soit par amour, ou
pour euitier quelque mal ou scandale, soit qu'ilz s'en
soient apperceuz ou non. 259*

NOVVELLE PREMIERE.

*Reprenant la simplicité d'aucuns maris, & monstrant la ruse
que peuuent auoir quelques femmes. — Iean le Lorrain ouyt
de nuict heurter à son huys, parquoy il esueilla sa femme,
elle luy faisant accroire que c'estoit vn esprit, ilz s'en allerent
tous deux le coniurer avec vne oraison, depuis n'ouyrent plus
heurter 262*


NOVVELLE DEUXIESME.

*Qui monstre quelles deffaiçles peuuent auoir ceux qui sont sur-
prins en amours, selon qu'eux & les surpreneurs sont aduisez.
— Peronnelle cacha vn sien amy par amour, en vn grand
vaisseau de terre, & voyant retourner son mary au logis,*

qui disoit l'auoir vendu, elle luy dist qu'elle l'auoit aussi
 vendu à vn homme qui estoit dedans pour voir s'il estoit
 entier : parquoy apres qu'il en fut sorty, ilz le firent racler
 au mary, & puis l'amy l'emporta en sa maison . . 270

NOVVELLE TROISIESME.

Pour aduertir qui a femme, de ne laisser hanter chez luy
 prestres ne moynes, quelques comperes qu'ilz soient & pour
 cause. — Frere Regnaut estant couché avec sa commere, y fut
 trouué par le mary d'elle : auquel ilz firent accroire qu'il
 enchantoit les vers à son filot 278





Achevé d'imprimer

Le trente octobre mil huit cent quatre-vingt-deux

PAR

CHARLES UNSINGER

POUR

ALPHONSE LEMERRE, ÉDITEUR

A PARIS


THE UNIVERSITY OF CHICAGO

IN THE DEPARTMENT OF THE HISTORY OF ARTS

CHARLES W. BARTON

ALPHONSE L. BARTON, EDITOR

1912




PETITE BIBLIOTHÈQUE LITTÉRAIRE
(AUTEURS ANCIENS)


Volumes petit in-12 (format des Elzéviros)
imprimés sur papier de Hollande.
Chaque volume 5 fr.


Chaque ouvrage est orné d'un portrait-frontispice gravé à l'eau-forte.


- | | |
|--|--------|
| HAMILTON, Mémoires de Grammont, avec une notice et des notes par MOTHÉAU. 1 volume. | 5 fr. |
| HORACE, traduction de LÉCONTE DE LISLE avec le texte latin. 2 vol. | 10 fr. |
| HEPTAMÉRON DES NOUVELLES de Marguerite d'Angoulesme, royne de Navarre. Texte des Manuscrits avec notes, variantes et glossaire par F. DILLAYE. Notice par A. FRANCE. 3 vol. Chaque volume. | 5 fr. |
| LE SAGE. <i>Histoire de Gil Blas de Santillane</i> , avec notice et notes par A. POULET-MALASSIS. 4 volumes. Chaque volume. | 5 fr. |
| 16 Eaux-fortes dessinées par HENRI PILLÉ et gravées par LOUIS MONZIÉS, pour illustrer <i>Gil Blas</i> . Prix | 25 fr. |
| LE SAGE. <i>Le Diable boiteux</i> , avec notice par A. FRANCE. 2 vol. | 10 fr. |
| 9 Eaux-fortes pour illustrer <i>le Diable boiteux</i> , dessinées par H. PILLÉ et gravées par L. MONZIÉS. Prix. | 15 fr. |
| LE SAGE. <i>Théâtre</i> , avec notice et notes par F. DILLAYE. 1 vol. | 5 fr. |
| RACINE. Œuvres complètes, avec notice par A. FRANCE. 5 vol. Chaque volume. | 5 fr. |
| 13 Eaux-fortes d'après GRAVELOT, pour illustrer les Œuvres de Racine. Prix | 15 fr. |
| SCARRON. <i>Le Roman comique</i> , avec notice par A. FRANCE. 2 vol. | 10 fr. |
| SHAKESPEARE. Œuvres complètes traduites par FRANÇOIS-VICTOR HUGO. 17 vol. Chaque volume. | 5 fr. |
| VOLTAIRE — <i>Romans</i> avec une préface et des notes par F. DILLAYE. 3 vol. Chaque vol. | 5 fr. |
| 21 Eaux-fortes d'après MONNET et MARILLIER, gravées par MONZIÉS, pour illustrer les <i>Romans de Voltaire</i> . Prix | 25 fr. |


PARIS. — UNSINGER, imprimeur, rue du Bac, 83











BIBLIOTHEQUE NATIONALE DE FRANCE



3 7531 03328252 7